

Mea owera Iesu sapuwo to Mataio ro gisioidiro

Iesu aramio negenege neio masiro ro iamo

¹ Iesu Keriso gu Aberaham ra Deibidi ra aboudo orobu-die, ina nedi masiro sirio ro na-iamo neio Iesu Keriso nasa naminami ie.

² Aberaham ro garasomai Aisaki, Aisaki ro garasomai Iakobo, Iakobo ro garasomai Iuda nou naminiramio mutu.

³ Iuda ro girasomai-ma Peresi ra Seraha ra, neitiro mamu Tama. Peresi ro garasomai Hesoroni, Hesoroni ro garasomai Rama.

⁴ Rama ro garasomai Aminadabi, Aminadabi ro garasomai Nasoni. Nasoni ro garasomai Saromoni,

⁵ Saromoni ro garasomai Boasi, Reihebi nou mamu e. Boasi ro garasomai Obedi, nou mamu Ruti, Obedi ro garasomai Iesi.

⁶ Iesi ro garasomai eputa dubu Deibidi, eputa dubu Deibidi ro garasomai Soromoni, Uria orobo garamu ato.

⁷ Soromoni ro garasomai Rehobomu, Rehobomu ro garasomai Abaia. Abaia ro garasomai Asa,

⁸ Asa ro garasomai Iehosope. Iehosope ro garasomai Iehora, Iehora ro garasomai Usia.

⁹ Usia ro garasomai Iotemi, Iotemi ro garasomai Ahasi. Ahasi ro garasomai Hesekaia,

¹⁰ Heseakaia ro garasomai Manase. Manase ro garasomai Amoni, Amoni ro garasomai Iosaia,

¹¹ Iosaia ro garasomai Iakonaia nu niramio mutu.

Taie nedi tau ro nato neibi arua Iu urubia mutu, boso urubia ro Babironi duriomoro to aise giwadau-rimo.

¹² Neio edi tau ato gorowameai-rimo Babironi duriomoro rido womu tato Iesu mamu ro na-goroto, nedi aramio negenege ro neio ie. Iakonaia ro garasomai Siaritiere, Siaritiere ro garasomai Serubabere.

¹³ Serubabere ro garasomai Abiudu, Abiudu ro garasomai Eriakimi. Eriakimi ro garasomai Asoro,

¹⁴ Asoro ro garasomai Sadoko. Sadoko ro garasomai Akimi, Akimi ro garasomai Eriudi.

¹⁵ Eriudi ro garasomai Ereasa, Ereasa ro garasomai Matani. Matani ro garasomai Iakobo,

¹⁶ Iakobo ro garasomai Iosepa. Iosepa ro gedea Maria, Iesu nou ro goroto. Nedi dubu ro Iesu nou Keriso to asorotiti-dumo, ibo owamo nou Godi ro kohodowa dubu e.

¹⁷ Ina ioudo kiwasoro ato Aberaham aboudo Deibidi aboto nou 14 aramio negenege ie. Deibidi aboudo womu tato Babironi duriomoro to beda tau ato giwadau-rimo nou 14 aramio negenege. Ina Babironi duriomoro to beda tau ato giwadau-rimo ioudo womu tato Keriso ia aboto, nou 14 aramio negenege ie.

Iesu Keriso na-goroto

¹⁸ Iesu mamu ro edi tau ato na-goroto tanaro idaibo mino to gororosioidiro-rimo. Nou mamu

Maria gabo Iosepa aboto gemowou-rimo edea ri. Kaupoti iato ata tanaro ro gororosioihiro, neitiro kereredea tato moro ato, Maria niro nato gowea. Iedi bamuai ro Maria niro turi ato Tarena Urio edi korosa ro neito gororosioihiro.

¹⁹ Nou uramu Iosepa mea tuputupu dubu e, nou ubi tato ie Maria siripo kowai urubia sosoro gabo ato, ina noudo ie nou kimaragoihiro giworohuti Maria nou ro piro se ararubia ri.

²⁰ Nou edi kimaragoihiro giworohuti, Godi edi sowake urio ro Iosepa aboto nato gorowapotai-ro. Nou ro hiwo to giauri sowake urio. Sowake urio ro ibo, 'Iosepa oro Deibidi nasa ie, oro etou kimaragoihiro siriosirio mutu omihiro? Oro tere na ie Maria oro ro ararubia ate, oro orobo ie aise ba-dadabuai. Mabu nedi mere niro ro nou ro na-gowea Tarena Urio edi korosa ro neito gororosioihiro.

²¹ Nou ro dubu mere ama-oroto-ri, Iesu to ba-diduti, maumo owamo ibo lawe Godi ro urubia kiapopo ie. Mabu nou simara urubia neio simara ubauba aboudo nedi mere ro nou ro amadi-iapopo-ri.'

²² Kibase Abera Naramu ipusu owera dubu ro edi owera ro na-gisihihiro Tarena Buka ato, tanaro morobise to noti gororosioihiro-dumo ibo,

²³ *Owera neito ma-dirowihiro-rimo! Irimo besere niro ama-owea-ri, nou ro dubu mere ama-owahau-ri. Neio ro Emanuera to amadima-asoro-ri, maumo owamo ibo 'Godi nimo mutu tomihiro'.*

²⁴ Iosepa norou aboudo na-geribua-ro, Abera Naramu edi sowake urio ro edi owera to

gemowapotai-ro nou ro tanaro durupi to aise gosioidiro. Nou ro iato Maria niro mutu aise gadabuai.

²⁵ Iedi tau ro ioudo Iosepa Maria mutu atu moro ato irobuti-ma pua, neitiro erere moro ato imidirotiti-do womu tato Maria toutou ti-goi. Taie Iosepa ro edi bamuai mere ro Iesu to aise giduti.

2

Kiboni sapuwo to auna umoro urubia Iesu emowabu ri saiki kidiowado moro rido gou-birimo

¹ Iesu mamu ro Beterehema sabowa ato goroto. Beterehema sabowa Iudia duriomoro ato owamo. Iedi tau ro nato eputa dubu to Herodi ro gomidiro, Iudia duriomoro nou ro giauri. Taie kiboni sapuwo to karatamudiro auna umoro na peteibi ro saiki kidiawado moro rido na-gou-birimo, Ierusarema sabowa to ta-gorowateai-birimo.

² Neibi ro ibo, 'Iedi bamuai ro mamu ro dese to na-owahau, boira Iu eputa dubu to edi na ro nama-ararasoro-ri? Kiboni nou sapuwo to saiki kidiawado sapuwo rido kebase ta-nowea-bimo na-imewia-die, ina saiki korioduti moro to neito nowasoro-diebimo nou emowabu ri.'

³ Nedi owera ro eputa dubu ro na-girorowai, Ierusarema sabowa urubia mutu, neio ubauba kimaragoidiro ro girobai.

⁴ Taie tuturu to owamo pua eputa dubu Herodi ro Godi ra urubia ra turituri awawo urubia, Mose sabi kitamudiro urubia mutu,

owera neio aboto nou ro nato gemeiriai neio ou ri nou aboto. Neio na-gou-rimo, taie nato gimodowa ibo, 'Godi ro kohodowa dubu koroto moro boira? Tarena Buka ato beda sosoro owera gowapotai-rimo?'

⁵ Nou neio ro ibo gemowameai-rimo, 'Nou mamu ro Beterehema sabowa ato ama-oroto-ri, Iudia duriomoro ato na-owamo. Mabu nedi owera ro tiamo Tarena Buka ato Godi ipusu owera dubu Maika nou ro kebase ta-gisioidiro ibo,

⁶ *Beterehema sabowa oro! Iuda duriomoro ato na-owamo, oro masiro mutu e. Arua sabowa Iuda duriomoro ato na-iamo, oro idaibo sosoro pua. Eputa dubu to edi dubu ro nama-ararasoro-ri, oro aboudo amadi-osuruwo-ri. Nou sipisipi kimowotoi dubu sosoro ie, Isiraere urubia nou ro ama-iauri-ri.'*

⁷ Taie nedi owera ro eputa dubu ro na-girorowai, nou ro nedi auna umoro na peteibi ro iato piro se gidabuai-biro. Nou ro ibo, 'Nibi ro nedi kiboni ro beda tau ato gowea-bimo keba se?

⁸ Beterehema sabowa to ba-dou-bimo. Nedi mere ro mea ia se ba-dosora-bimo, namabimo-owea-ri neito ba-dorowameai-birimo mo emowapotai ri. Mo ibose anama-ou-ri nou emowabu ri.'

⁹⁻¹⁰ Taie nedi owera ro eputa dubu aboudo na-girorowai-birimo, neibi iato aise gasiriai-birimo, iedi atu kiboni ro nou se gobodoro-birimo, saiki kidiawado moro rido na-gimewia-ro. Neibi ro na-giauri-birimo iedi kiboni ro aise gouwado, womu tato kiboni tupu

se ti-gotobowa bamuai korobu moro abato. Taie neibi auna ia kamade mutu aise godoro-birimo bamuai kainai korobu moto to.

¹¹ Taie iedi bamuai kainai ro sosoro na-gowea-birimo mamu Maria mutu, neibi kauhio to na-girimusubuwa-birimo, Iesu iato gemowabu-birimo. Taie tako rido awawo wisa namabu gorodi, meamea nibo dehoru teibo mutu, neibi ro na-giehuti-birimo, ata inisensi to asoro-dumo, ina ata mura to asoro-dumo, iedi bamuai kainai ro iato gomio-birimo.

¹² Ata tau neibi hiwo to Godi ro owera nato gimowapotai-bi ibo, 'Nibi edi gabo rido gou-diebimo, ioudo orowameai ate Herodi aboto, ata gabo rido ba-dorowameai-bimo simara duriomoro to!'

Neibi ro iedi owera ro na-girorowai-birimo, taie ata gabo rido imese gaimai-birimo.

Iesu bamuai mamu mutu Isipi duriomoro to giwadau-ma

¹³ Iedi auna umoro dubu peteibi ro na-gasiriai-birimo, ina nou saro gabo ato Abera Naramu edi sowake urio ro nato gou-ro hiwo to Iosepa aboto. Nou ro ibo, 'Iosepa deribua, mere ra mamu ra Isipi duriomoro to ba-diwadau-ma, mere kainai Herodi ro kopia aboudo. Nibi iato aise ba-domidiro-bimo womu tato owera mo aboudo namabimi-irorowai-ri nibi korowameai sapuwo to. Mabu nedi bamuai ro Herodi ro osora opia ri emahuwo.'

¹⁴ Nedi owera ro Iosepa ro na-girorowai, neitiro nou ro iato iwediouti-ma pua, duwo ato giwadau-marou ioudo Isipi duriomoro to.

¹⁵ Taie neibi iato aise imidirotiti-bimo womu tato neibi ro na-girorowai-birimo ibo eputa dubu Herodi ta-garaburai. Kibase Abera Naramu ipusu oweru dubu edi oweru ro na-gisioidiro Tarena Buka ato, tanaro morobise to noti gororosioidiro ibo, *Mo mere ta-nemowapotai Isipi duriomoro rido osuruwo ri.*

¹⁶ Herodi umoro na-goi ibo nedi auna umoro dubu peteibi ro neibi ro nou a-gasaubuti-birimo, iato nou punugo ta-garauduti serawo ri. Taie nou ro boso koroho urubia nato gimowapotai imese dubu bamuai kainakaina sirio, 2 kisimisi rido na-ororuwo-die iopiauti ri, Beterehema sabowa ato na-orowomidiro, ibose gomo ato edi sabowa ro giamo. Mabu nedi auna umoro na peteibi ro Herodi kibase neibi ro ibo gemowapotai-birimo, netewa teibo kisimisi teibo ta-gororoporeai-rido kiboni nato gimewia-ro.

¹⁷ Kibase Godi ipusu oweru dubu Ieremaia edi oweru ro na-gisioidiro, tanaro morobise to noti gororosioidiro-dumo ibo,

¹⁸ *Auna iamo Rama sabowa ato ta-girorowai-dumo! Idobi diamo iato taro-die! Kamade tato tau iato ta-gereredea! Rasere ro pamo dubu mere kainakaina idobi imerete! Nou ubi tato ie urubia ro kemadoho. Mabu boira? Mabu ata dubu mere ata eremeserai pua.*

Iosepa ro giwameai-marō mere ra mamu ra Isipi duriomoro rido

¹⁹ Herodi na-garaburai, iato nou saro gabo ato, hiwo to Abera Naramu edi sowake urio ro ina Iosepa aboto nato gorowapotai-ro,

²⁰ nou ro ibo, 'Iedi mere ro mamu mutu neido ba-diwameai-ma Isiraere duriomoro to. Mabu nou edi urubia ro ubi na-iamotiti nou opia ri, neio abora pua ie, ta-gorowaburo-dumo.'

²¹ Taie Iosepa ro nedi owera ro na-girorowai, neibi na-geremododiai-birimo, taie ioudo imese gaimai-birimo Isiraere duriomoro to.

²² Ina ipi gabo ato owera nou ro nato girorowai ibo, 'Abora Iudia duriomoro ato eputa dubu to Herodi simara mere Akerasi nou ro omidiro, abera bobo nou ro gorobai.' Kaupoti nedi owera ro Iosepa ro na-girorowai, nou abato tere kimaragoidiro nato gereredea. Taie Iudia duriomoro to korowameai gabo aise goropai-ro. Ina iato Godi ro Iosepa aboto owera hiwo to nato garo-ro ibo, 'Iudia duriomoro to owou ate, Gariri duriomoro to ba-dowou!'

Taie nou Gariri duriomoro to aise gou,

²³ ito na-gorowateai, Nasareta sabowa to aise gemobodiai, iato imidirotiti-bimo. Keba se Godi ipusu owera urubia ro edi owera ro na-gisioidiro-rimo Tarena Buka ato, tanaro morobise to noti gororosioidiro-dumo ibo, 'Nou Nasareta dubu to amadima-asoro-ri.'

3

Abera Naramu gabo Ioane ro gemaipo-ro

¹ Iesu edi tau ro nato ta-gomidiro, obo to kiwarumiauti dubu Ioane goto se duriomoro ato giasiai-ro, Iudia duriomoro ato na-owamo.

² Nou ro ibo imowautiti, 'Derewesegerai-mo ubauba aboudo! Mabu Godi ro kiwaboi tanaro aupise neito ta-gorowateai-die.'

³ Urubia dubu nou se ie Ioane, Godi ipusu oweru dubu Aisaia ro keba ia se nou gowapotai-ro ibo, *Urubia dubu goto se duriomoro ato tiaiauti, ibo Abera Naramu gabo tuputupu se mea se demowou-mo nou kou moro ie.*

⁴ Ioane ro kemoro takamai obotama musugamusuga nou iroidirotiti, ibose nou obotama bage to erematahirawadotiti. Nou ro pugo, nogobe mutu nou ihotiti.

⁵ Taie urubia sirio nou aboto nato gou-rimo obo to iwarumiauti ri. Arua urubia Ierusarema sabowa rido gou-rimo, arua urubia Iudia duriomoro rido, ibose Iodeni oromo bara ato edi sabowa ro giamo, iedi urubia sirio ro aise goroho-rimo Ioane aboto.

⁶ Taie neio ubauba iato giwapotaidiro-rimo, iato neio Ioane ro Iodeni oromo turi ato obo to aise giwarumiauti.

⁷ Ioane ro na-giwia Parasi urubia sirio, Sadusi urubia mutu, arua urubia obo to kiwarumiauti moro ato, nou ro ibo, 'Nio imese auna karatigi urubia ie, nio imese bagawe merebusere ie! Nio etu aboudo girorowai-rimo ibo, Godi edi auna ia serawo ro na-ou-die nou aboudo orowadaudiro rie?

⁸ Nio ro durupi to meamea tanaro namadimi-isioidiro-ri, nio neio ro amadimi-iwapotaidiro-ri ibo, nio ro morobise to ubauba ta-gimeserai-dumo, ina Godi aboto ta-gerewesegerai-dumo.

⁹ Idaibo sosoro kimaragoidiro na-iworohuti-dumo ibo, "Nimo modobo ato norowomidiro, ata ubauba tato ie, nimo Aberaham aramio merebusere ie. Nimo Godi ro

ubauba wisa imio-ri pua, nimo nou urubia ie.”
Idaibo sosoro kimaragoidiro nio abato kiamo
modobo ia pua! Nio mo ro mimowapotai-ro
Godi aboudo napo ie Aberaham orio aramio
merebusere nadi rido kemesioidiro.

¹⁰ Godi ro susura kabi kebase ta-gowotobowa,
beda ota ra meamea iopu kiasesuti tato nou ro
kiebuti aboto ie. Taie era to aise ama-ihere-ri.

¹¹ Nio mo ro obo to niwarumiauti ubauba
aboudo kerewesegere sapuwo to ie. Kaupoti mo
saro rido ata mea dubu tou-die, nou auna
pupuwo dubu e, mo marasio. Nou tamaka mo ro
kemerebidiro modobo pua. Nio nou ro Tarena
Urio to ama-iwarumiauti-ri, ibose era to
ama-iwarumiauti-ri.

¹² Nou ro saboro sosoro poke ta-gorobai-die,
abora nou tu ato ateidiro-die. Nou abora
eremododiai woiti takamai kiamotuti aboto ie.
Meamea woiti iopu kiaremo moto to neito
ama-iwodouti-ri. Ina woiti takamai nou ro
womu tato womu tato kiriware era to aise
ama-iatowo-ri.’

Iesu obo to Ioane ro gowarumia

¹³ Iedi tau ro nato Iesu Gariri duriomoro rido
godori-ro Iodeni oromo to, Ioane ro obo to
owarumia rie.

¹⁴ Kaupoti nou edi ubi ro Ioane ro binio to
gemowabeouti. Ioane ro ibo, ‘Mo oro ro
kowarumia ie. Ibo pua oro mo ro kowarumia.
Mabu boira oro mo aboto na-wou-die?’

¹⁵ Kaupoti nou Iesu ro ibo gemowameai,
‘Tanaro patu ibose to mororosioidiro-mo.
Neitiro ro Godi ubi tanaro se momuo se
kemesioidiro, io mea gabo ie.’

Taie Ioane ubi aise goi, Iesu nou ro obo to aise gowarumia.

¹⁶ Nou obo rudo edi kerehidiro ro na-gerehidiro-ro, naio ata tanaro ro gororsioidiro, toboro magere korodobura se gowea. Taie ioudo nou ro nato gowea, Tarena Urio nato gororuwo-ro dumu pawa sosoro, Iesu ato aise gomi.

¹⁷ Iato toboro rido owera kodu ro gou-ro ibo na-gutura-ro, 'Ma-dowea-mo! Nou mo ia mere ie, mo auna nirimagare ie, kamade mutu, nou aboto.'

4

Iesu Satani ro na-gowaibirio

¹ Taie ioudo Iesu Tarena Urio ro goto se duriomoro to aise gewedei Satani ro iato owaibirio rie.

² Nou goto se duriomoro ato ohona kiho tato duwo sirio saiki sirio neito imidirotiti. Taie nou auna sogoi ro nato gorobai.

³ Tutura to owamo pua iedi kowaibirio dubu ro nou ro gereredea-ro nou owaibirio ri. Nou ro ibo, 'Oro Godi mere ie, nedi nadi sirio ro ma-dimowapotai dokou to mararapoi-mo.'

⁴ Iesu ro Satani ibo gemowameai, 'Tarena Buka ato owera keba se ibo ta-gisioidiro-rimo, *Urubia dubu keremiro ohona kiho ato se owamo pua. Kaupoti Godi matagoro rido beda owera ro osuwodutiti-dumo, morobise keremiro nato towamo.*

⁵ Taie Iesu ina Satani ro aise gemowameai-ro tarena sabowa to imese gowou. Iesu nou ro Tarena Moto koikoi ato aise gowotobowa.

⁶ Satani ro ibo, 'Oro Godi mere ie, neido ma-derepeduai. Mabu Tarena Buka ato owera keba se ta-gisioidiro-rimo ibo, *Godi sowake urio sirio ama-itiodorai-ri, oro neio ro amadimo-orobidiro-ri mea mino to amadimo-owororuwo-ri. Oro sairo nadi ato iteamoidiro-ri pua.*'

⁷ Iesu ro Satani ina ibo gemowameai, 'Ibose Tarena Buka ato owera kebase ta-gisioidiro-rimo ibo, *Modobo pua Abera Naramu Godi oro ro kowaibirio.*'

⁸⁻⁹ Taie Iesu Satani ro ina aise gowioro ohu ia podo to, nou ro nato gemowawuti duriomoro sirio. Nou ro ibo, 'Ma-diraroweauti, meamea duriomoro sirio ro iamo-die. Oro namadi-iroborea-ri mo aboto, ina mo namadi-emowabu-ri, nedi awawo duriomoro sirio ro oro mo ro anama-emapoi-ri.'

¹⁰ Iesu ro ibo, 'Satani mo aboudo neido daragare! Mabu owera Tarena Buka ato kebase ta-gisioidiro-rimo ibo, *Oro ro modobo ie Abera Naramu Godi nou se kemowabu, ibose nou ubi tanaro se kisioidiro.*'

¹¹ Taie iato Iesu Satani ro aise gemeserai, tuturu to owamo pua sowake urio sirio ro gou-rimo, Iesu neio ro aise gowarebai-rimo.

Iesu Keriso kimowauti woko na-gitamuai

¹² Iesu ro na-girorowai ibo Ioane dibura to ta-gedea-dumo, taie nou Gariri duriomoro to aise gorowameai-ro.

¹³ Nou kebase Nasareta sabowa to gou, ina Nasareta sabowa na-gemeserai nou ioudo aise gou-ro Kapeniama sabowa to, taie nou iato nani komi ie. Kapeniama sabowa Gariri obo paruo

bara ato owamotiti. Nedi sabowa ro Seburuni ra Napatari ra duriomoro teibo neitiro abato owamotiti.

¹⁴ Keba se Godi ipusu owera dubu Aisaia ro edi owera ro na-gisioidiro Tarena Buka ato, tanaro morobise to noti gororosioioidiro-dumo ibo,

¹⁵ *Owera neito ma-dirowidiro-rimo! Nio etio ro orowomidiro Seburuni duriomoro ato ibose Napatari duriomoro ato, owera ibo ie nio sapuwo to. Nio gabo ie buru oromo to kohau ato, ibose Iodeni oromo sapuwo to kiabudiro. Nio nedi Gariri duriomoro ato na-irowomidirotiti, Iu owera karo tato urubia ibose bato irowomidirotiti, nedi owera ro nio aboto ie.*

¹⁶ *Neio duwoduwo maumo ato ta-irowomidirotiti, ina abora auna woroworo pina neio ro ta-gowea-dumo. Io morobise ie, nedi urubia ro neio ro kebase korowaburo tere auna se ematiti-mo, abora auna woroworo pina ta-gorowapotai-die neio aboto.*

¹⁷ Taie iedi tau ro nato Iesu ro urubia mea owera kimowauti aise gatamuai. Nedi mea kimowauti owera ro ibo ie, 'Ubauba aboudo ba-derewesegerai-mo! Mabu Godi ro kiwaboi tanaro nimo aboto aupise ta-gosiomai-die.'

Iesu ro keba kowasoro urubia giaubai

¹⁸ Ata tau Iesu Gariri obo paruo bara ato na-gadoro-ro, nou ro naramu ra neama ra nato giwia-ma, Saimoni, ata masiro Pita, nou neama mutu Enduru. Neitiro neti gidobi-rido, mabu neti kidobi neitiro woko ie.

¹⁹ Taie Iesu ro ibo, 'Dou-rido mo dowasoro-rido! Nitiro ro nakere beda sosoro

irobotiti-do, ina mo ro anama-itamudiro-mari urubia kirobo beda sosoro ra.'

²⁰ Taie iato neitiro ro nedi owera ro na-girorowai-rido, neti neitiro ro egenabo gibedidiro-rido, Iesu saro rido imese gowasoro-rido.

²¹ Iesu ina ioudo egea mere se giaubai-ro, nou ro ina naramu ra neama ra nato giwia-ma, Iemisi ra Ioane ra neitiro Sebedi mere teibo ie. Neitiro abera mutu pe ato neti gimotuputi-birimo odobia rie. Iesu ro nato girumai-ma, 'Dou-rido, mo dowasoro-rido.'

²² Taie neitiro ro nedi owera ro na-girorowai-rido, neitiro abera Sebedi pe ato neti mutu aise gemeserai-rido, Iesu saro rido imese gobodoro-rido.

Iesu ro urubia Gariri duriomoro ato gitamudiro

²³ Iesu Gariri duriomoro ato na-goroho, nou ro Iu urubia simara karadabu moto ato itamudiro-titi. Nou ro ibose mea owera Godi ro kiwaboi tanaro sapuwo to urubia ta-imowautiti. Nou ro awawo ia temeteme urubia, ibose erere temeteme ra mutu urubia, nou aboto ta-giworoho-rimo, meana aise giwaititi.

²⁴ Nou ro edi tanaro ro na-gisioidiro, nou sapuwo to owera Siria duriomoro gebari ato nato gorobodorouti. Taie neio ro ina erere temeteme ra mutu urubia nato giworoho-rimo. Urubia abato ubauba urio na-gorowomidiro, nakara se kerebesiouti urubia, togiri urubia, beda mutu ubauba temeteme urubia ra, neio Iesu ro meana aise giwaititi.

25 Ina auna dubu patu nato gou-rimo Gariri duriomoro rido, 10 sabowa bato giamo iedi duriomoro ro neido, Ierusarema sabowa rido, Iudia duriomoro rido, ibose Iodeni oromo sapuwo rido. Iedi urubia sirio ro Iesu neio ro saro rido aise gobodoro-rimo.

5

Godi ro meana idaibo urubia aboto iaiwotiti-die

1 Ina ioudo Iesu ro na-giwi urubia sirio nou aboto na-gou-rimo, nou iato aise gidiai damera ohu to. Taie nu iato aise gomi urubia nou ro itamudiro ri. Nou kowasoro urubia ro na-gowea-rimo neio saro rido aise gidiai-rimo nou aboto.

2 Taie Iesu ro urubia oweru kimowauti nato gatamuai, nou ro ibo gitamudiro.

3 'Urubia etio ra Godi sosoro gabo ato neio nakara se umoro ie ibo nimo rabesi urubia ie, neio Godi aboudo meana amadimi-iauri-ri. Mabu Godi ro kiwabo tanaro idaibo urubia nou ro ta-girapo odouti ri.

4 Urubia etio ra nitonito se na-irowomidiroiti, neio Godi aboudo meana amadimi-iauri-ri. Mabu neio Godi ro ido ama-iageawado-ri.

5 Urubia etio ra keremowabu tato na-irowomidiroiti, neio Godi aboudo meana amadimi-iauri-ri. Mabu neio Godi ro duriomoro ama-imapoi-ri.

6 Urubia etio ra auna ubi ro na-iamo Godi edi meamea tuputupu tanaro ro kororosoidiro aboto, neio Godi aboudo ibose meana amadimi-iauri-ri. Mabu neio tuputupu ubi tanaro wisana Godi ro ama-isioidiro-ri.

⁷ Urubia etio ra arua urubia nirimagare na-imati-dumo, nedi urubia ro Godi aboudo meana amadimi-iauri-ri. Mabu Godi ro wisana neio aboto nirimagare tanaro ibose to ama-isioidiro-ri.

⁸ Urubia etio ra ata ubauba ata neio niro turi ato kowamo tato, neio Godi aboudo meana amadimi-iauri-ri. Mabu neio ro Godi sosoro amadimo-owea-ri.

⁹ Urubia serawo tau ato muro etio ro iwaititi-dumo, neio ro Godi aboudo meana amadimi-iauri-ri. Mabu neio Godi ia ro merebusere to ama-iapoi-ri.

¹⁰ Urubia etio ra meamea tuputupu tanaro kisioidiro sapuwo to ubauba mino to na-iworohuti-dumo, neio Godi aboudo meana amadimi-iauri-ri. Mabu Godi ro kiwaboi tanaro idaibo urubia nou ro ta-girapoi odouti ri.

¹¹ Nio arua urubia ro ubauba owera na-imio-dumo, ibose bagea owera na-imasaubuti-dumo, ina ubauba mino to na-iworohuti-dumo, mabu nio mo kowasoro urubia ie, nio Godi aboudo meana amadimi-iauri-ri.

¹² Ina ba-dimaragoidiro-mo, idaibo tanaro Godi ipusu owera urubia aboto kebase etio ro gorowomidiro, neio aboto ta-gororosoidiro-rimo. Nio modobo ie auna ia auna ia kamade ro kiwati. Mabu nio sapuwo to auna wisa towamo-die Adiri sabowa ato, nio ro saiki ata nou amadimi-imade-ri.'

Damena ra erempa ra kimibiria urubia imabuti-die

¹³ Iesu ro owera ina aise gemoguwado ibo, 'Mo na-nowasoro-dumo nio damena topo sosoro ie,

urubia sirio nedi duriomoro ro nato na-orowomidiro neio sapuwo to ie. Kaupoti damena simara topo na-iasoperai, ina topo kowameai aboto ata gabo tato ie, ubauba imese koi ie. Taie iedi damena ro urubia koroho moro to aise kiherai ie, neio ro aise kituti ie.

¹⁴ Ina idaibo sosoro ie nio pina woroworo sosoro ie, urubia sirio nedi duriomoro ro nato na-orowomidiro, nio iauri-dumo. Ina ata sabowa damera ato na-owamo, nou koropirowa gabo tato ie, paease iauri-dumo urubia ro.

¹⁵ Ina urubia ro erempa kiwatuti ato, neio ro soboro gugu to kiatimo ra? E e neio ro kenene ato kiamiti ie, moto urubia ro iedi pina woroworo ro namabu mea se nato kiauri ie.

¹⁶ Ina idaibo sosoro ie, nio aboudo pina woroworo ro urubia sosoro gabo ato ba-miriwaretiti-mo. Ina noudo ie nio urubia ro namadimi-iauri-ri nio ro meamea tanaro namadimi-isioidiro-ri, neio ro nio Abera Adiri sabowa ato na-imidirotiti-die nou amadime-emowabu-ri.'

Iesu ro Tarena Buka owera morobise maumo giwapotaidiro-ro

¹⁷ 'Nio ibo gimaragoidiro-mo mo Godi ro neito na-nemeiriai-ro, nou ro edi sabi sirio ro Mose aboto na-giaiwai-ro imese na ito iasiai rie, ibose Godi edi ipusu owera urubia ro Tarena Buka ato edi owera ro gisioidiro-rimo iasiai ri. E e marasio mo sabi iasiai ri ou pua. Mo neito na-nou-ro neio edi owera ro morobise to kororosoidiro aboto nou-ro, ibo pua neio edi owera ro iasiai ri.

¹⁸ Morobise owera nou e mea se neito ma-dirowidiro-rimo! Toboro ra duriomoro ra nama-iamotiti-mari, Godi edi sabi sirio ro Mose aboto na-giaiwai-ro ararasoperai-ri pua, womu tato sabi edi ubi ato gimeiriai-ro tanaro noto amadimo-ororosioi diro-ri. Godi edi sabi sirio ro ata kainai titi ata, o ata kainai mako ata ararasoperai-ri pua, womu tato sabi edi ubi ato gimeriai-ro tanaro noto amadimo-ororosioi diro-ri.

¹⁹ Ina noudo ie Godi edi sabi sirio ro gaiwai-ro Mose aboto, etu ra ata sabi kainai ata kesebea ato, ina nou ro arua urubia idaibo sosoro na-itamudiro, nirimagare buro ie nedi dubu ro Godi edi kiwaboi maumo ro neito ama-odoro-ri sekere, kaupoti nou masiro tato dubu to ama-ararasoro-ri. Kaupoti etio ra Mose edi sabi sirio ro na-ibodoro-dumo ina urubia na-itamudiro-dumo, nedi urubia ro awawo masiro mutu e Godi ro kiwaboi maumo ato.

²⁰ Ina noudo ie nio mo ro auna owera ibo mimowapotai-ro, Parasi urubia, Mose sabi kitamudiro urubia, neio ro meamea tuputupu tanaro morobise to kisioidiro pua. Neio Godi edi kiwaboi maumo ro neito odouti-ri pua. Ina neio edi mino ro nio ro namadimi-ibodori-ri, Godi edi kiwaboi maumo ro neito nio imese odouti-ri pua. Kaupoti nio ro meamea tuputupu tanaro morobise to namadimi-isioidiro-ri, ibo pua nedi urubia ro neio sosoro, io nio Godi edi kiwaboi maumo ro neito amadimo-odouti-ri.'

Iesu ro serawo sapuwo to gitamudiro

²¹ 'Nedi owera ro nio ro kebase umoro ta-goi-rimo, nimo nasa naminami ro keba ia tau ato gimidai-rimo ibo, "*Urubia iopiauti mamō.*"

Urubia dubu ro ata na-opia, nu koto kiauri dubu aboto kowou ato nou koto kiauri dubu ro wisa ama-omia-ri.”

²² Kaupoti nio mo ia ro owera ibo mimowapotai-ro! Ata dubu serawo na-woi ata dubu aboto, nu koto kiauri dubu aboto kowou ato, nou koto kiauri dubu ro wisa ama-omia-ri. Ina ibose ata dubu ro ata dubu ubauba owera to na-ematubutai ibo, “Oro imese eputa tato ia ie!”, edi dubu ro auna koto to kowou e, koto kiauri urubia ro wisa amadimo-omia-ri. Ina ibose ata dubu ro ata dubu na-ematubutai ibo, “Oro imese ubauba ia ie!”, etu umoro ra edi dubu ro Godi ro era paruo to ama-atowea-ri.

²³ Ina noudo ie oro Tarena Moto to dao na-owou Godi aboto ematowo ri, ina oro kimaragoidiro to na-irariomaidiro-die ibo, ata dubu mo aboto serawo ie, ata tanaro na-nosioidiro nou aboto.

²⁴ Keba tanaro oro ro nou dosioidiro, dao demeserai patapata gomo ato, Tarena Moto rido dosuruwo-ro. Nedi dubu ro nou mutu nedi mibo ro hio ito kagodo, ina daradabuai-do. Taie oro saro to dorowameai Tarena Moto to, dao patapata ato ematowo ri.

²⁵ Ina ibose oro serawo dubu ro koto aboto na-owou, hio ito dadabuai. Iedi mibo ro ipi ato nou mutu hio ito doporeai-do. Nedi mibo ro oro ro hio ito koporeai tato, oro mea se, oro nou ro koto kiauri dubu aboto ama-owapotai-ri. Oro iato etou ra, oro nou ro pesomani tu to ama-edea-ri. Ina oro nou ro dibura to aise ama-edea-ri.

²⁶ Morobise owera nou e, neito ma-dirowidiro-rimo! Oro imese gorowaguwo

oro iato ama-imidirotiti-ri kosuruwo gabo tato ie, womu tato kosuruwo wisa momuo se nama-aiwai-ri.'

Kitamudiro oweru mau kereasebo sapuwo to

²⁷ 'Nedi oweru ro nio ro kebase umoro ta-goi-rimo ibo *Arua mamio o dubu mutu oroho mamio!*

²⁸ Kaupoti nio mo ia ro oweru ibo mimowapotai-ro! Ata dubu ubi na-iamo ata orobo mutu koroho, nedi dubu ro nou ro tanaro morobise to ta-emesioidiro.

²⁹ Ina noudo ie oro giropu maumo ato ata ubauba ubi tanaro ata na-owamo, hio ito dowagare, ba-deherai. Nu idaibo maumo emabuti-die oro ro ata orobo ata na-emodumia iedi idomari ro hio ito daubidiro ba-deherai. Sapuwo idomari kaubidiro ato, io ata nakomu tato ie. Ina oro modobo pua momuo durupi nou ro kemamuai era paruo to keherai, imese ubauba tanaro ia ie.

³⁰ Ibose ata ubauba tanaro ata oro abato na-owamo, hio ito dowagare ba-deherai. Nou idaibo maumo emabuti-die, oro ro ata ubauba tanaro ata na-osioidiro tumodi tu to, iedi tu ro ba-deherai. Sapuwo tu kasiai ato io ata nakomu tato ie, modobo pua durupi momuo se nou ro kemamuai era paruo to keherai, imese ubauba tanaro ia ie.'

Upi irarubo mamio

³¹ 'Nedi oweru ro Mose aboudo nio ro kebase ta-girorowai-rimo ibo, *Ata dubu ro orobo na-wararubia, modobo ie nou ro kararubia peba titi kisioidiro orobo aboto kaiwai. Taie nedi orobo ro nou ro nato kararubia ie.*

³² Kaupoti nio mo ia ro owera ibo mimowapotai-ro! Ina oro ro idaibo tanaro kosioidiro ato simara orobo aboto, oro nou ro mau kesebea tato, ina oro ro kararubia tanaro na-osioidiro, nou oro ro piro tanaro orobo to kapoi ie nou orio uramu ro nama-edea-ri. Ina ibose nedi orobo ro ata dubu ata ro nato na-edea, nedi dubu ro nou ro piro tanaro kosioidiro ie.'

Hodo kasaubiai ato Godi masiro dorogora se apoi mamō

³³ 'Ina ata owera ibo ie, nedi owera ro nio ro kebase umoro ta-goi-rimo. Nimo edi nasa naminami ro nedi owera ro keba ia tau ato neio ro gimidai-rimo ibo, *Oro ro beda hodo kemasaubiai ra asiai mamō. Oro ro kemasaubiai tanaro ata dubu aboudo na-wosioidiro, Abera Naramu masiro na-wapoi koko owai ri, durupi to aise gi-isioidiro-ri.*

³⁴ Kaupoti nio mo ia ro owera ibo mimowapotai-ro! Hodo kasaubiai ato, ata masiro apoi mamō. Hodo kasaubiai ato, Adiri sabowa masiro apoi mamō oro owera pupuwo kowai aboto. Mabu Adiri sabowa Godi komidiro moro ie.

³⁵ Ibose hodo kasaubiai ato, sopu duriomoro masiro apoi mamō oro owera pupuwo kowai aboto. Mabu nedi sopu duriomoro ro Godi sairo teibo nato iwotoititi-ma. Ibose hodo kasaubiai ato, Ierusarema sabowa masiro apoi mamō oro owera pupuwo kowai aboto. Mabu Ierusarema sabowa auna ia eputa dubu Godi nou komidiro moro ie.

³⁶ Ibose hodo kasaubiai ato, oro ro simara eputa apoi mamō oro owerā pupuwo kowai aboto. Mabu oro simara sobo muruwa keakea kowai, o garegare kowai, oro aboudo modobo pua.

³⁷ Ata namabu masiro apoi mamō, o ata dubu masiro apoi mamō, oro owerā pupuwo kowai aboto. Oro ro ibo gi-utura-ri, “Io, mo ro anama-osioihiro-ri,” o ata tau ibo gi-utura-ri, “E e, mo ro osioihiro-ri pua.” Arua owerā oro ro dorogora se nama-aro-ri oro kemasaubiai owerā pupuwo kowai aboto, io Satani aboudo amadidimo-ou-ri.’

Ubauba meana to gi-iwame-ri

³⁸ ‘Nedi owerā ro nio ro kebase ta-girorowai-rimo ibo, *Idomari kowaubidiro ato wisana ibose to kowaubidiro ie. Ibonoro iopu kowaubidiro ato wisana ibose to kowaubidiro ie.*

³⁹ Kaupoti nio mo ia ro owerā ibo mimowapotai-ro! Ubauba tanaro oro aboto etu ro osioihiro, wisana ubauba to emowameai mamō. Oro ata dubu ata ro na-iatoia, ina derewesegerai sapuwo tawe dao rido miatoia-ro.

⁴⁰ Oro sodo ata ro na-emediai, ina oro nou ro koto aboto na-owou, iedi namabu ro aise domia, inaIGINISI ibose domia.

⁴¹ Ibose oro ata gabamani dubu ata ro na-emediai mibo namabu egea mere se emowou ri, ipi ato emedea mamō sabowa to aise demowateai.

⁴² Ibose ata dubu ata namabu ri na-orowapotai oro aboto ematimai mamō aise domia. Ata dubu ata oro aboudo namabu doro to omidai ri, ematimai mamō aise dowarebai.’

Nasa urubia nirimagare aise gi-imati-ri

⁴³ ‘Owera nio ro kebase ta-girorowai-rimo ibo,
“*Nio simara gu urubia se gi-imati-ri nirimagare.*
Ina nasa urubia ba-dihoio-mo.”

⁴⁴ Kaupoti nio mo ia ro owera ibo
mimowapotai-ro! Nasa urubia nirimagare aise
gi-imati-ri. Ibose nio ubauba se etio ro
iworohuti-dumo, ina nio temeteme
na-imio-dumo, neio sapuwo to Godi aise
gi-ararato-ri neio meana iwaititi ri.

⁴⁵ Nio ro idaibo tanaro namadimi-isioidiro-ri,
nio Abera Adiri sabowa ato na-imidirotiti-die,
nio nou morobise merebusere to
amadima-ararapoi-ri. Mabu saiki nou ro
emeiriotiti-die ubauba urubia sapuwo to, ibose
meamea urubia sapuwo to. Ibose daroho
na-emeirio-die tuputupu tanaro kisioidiro
urubia sapuwo to, ibose kerewaekerewae tanaro
kisioidiro urubia sapuwo to emeirio-die.

⁴⁶ Nio simara urubia se nirimagare
na-imati-dumo, ina nio ro simara urubia se
na-iwarebai-dumo, nou sapuwo to Godi ro mea
wisa nio ama-iwameai-ri ra, a? Kerewaekerewae
urubia ro idaibo tanaro se tisioidirotiti-dumo.

⁴⁷ Neio ro simara urubia se nirimagare
na-imati-dumo, ina arua urubia idaibo meamea
tanaro na-isioidiro-dumo, neio nio ro
amadimi-irohodorai-ri ra? Io Godi umoro tato
urubia idaibo tanaro neio ro nou
isioidirotiti-dumo.

⁴⁸ Nio Adiri Abera imese meana ia ie, auna
nirimagare ia ie imese sirio urubia aboto. Ina
noudo ie nio nou sosoro korowomidiro modobo
ie, imese sirio urubia nirimagare kimati modobo

ie.'

6

Namabu tato urubia ibo gi-iwarebai-ri

¹ Iesu ro urubia ina ibo gimowauti, 'Mea se! Nio ro meamea tanaro kisioidiro ato, modobo pua nio ro urubia sosoro gabo ato kisioidiro, nio neio ro imowabu ri. Nio ro idaibo tanaro namadimi-isioidiro-ri urubia sosoro gabo ato, nio Abera Adiri sabowa ato na-omidiro-die nio nou ro wisa imowame-ri pua.

² Ina noudo ie nio ro namabu tato urubia beda tau ato iwarebidiro-dumo, aupi urubia ro umoro oi mamu. Piro se gi-isioidiro-ri nedi kiwarebai tanaro ro. Mabu karatigi urubia ro idaibo tanaro paea se isioidirotiti-dumo urubia ro iauri ri. Neio ro karadabu moto ato isioidirotiti-dumo, ibose auna gabo bara ato isioidirotiti-dumo urubia ro imowabu ri. Nio mo ro morobise oweru mimowapotai-ro! Nedi urubia ro wisa urubia aboudo momuo se imese imade-dumo, ido pua ie.

³ Kaupoti oro ro namabu tato urubia kiwarebai ato, tumodi tu ro beda tanaro osioidiro, pere tu umoro oi mamu.

⁴ Ina oro Abera nou auna umoro ie oro ro piro se beda meamea tanaro kisioidiro ra. Ina oro nedi meamea tanaro ro nou kisioidiro sapuwo to, wisa nou ro kemowameai ie.'

Godi aboto kararatoro oweru idaibo sosoro gi-aro-ri

⁵ 'Ina nio Godi aboto kararatoro oweru karo ato, karatigi urubia beda mino to iraratorotiti-dumo, ibo orowati mamu. Mabu

neio auna ubi ie karadabu moto ato Godi aboto iato kararatoro ie urubia sirio ro iauri rie. Oro mo ro morobise owera memowapotai-ro! Nedi urubia ro wisa urubia aboudo momuo se imese imade-dumo, ido pua ie.

⁶ Kaupoti Godi oro ro kararatoro ato, nakara moro to gi-ou-ri taie magere aise gi-opai-ri. Taie kiauri tato Godi nou aboto nato gi-araratoro-ri. Ina nimo edi atu Abera ro nou nakara se auna umoro ie oro ro piro se beda kararatoro owera karo ra, wisa nou ro kemowameai ie.

⁷ Ina ibose Godi aboto kararatoro owera karo ato, mabu tato kararatoro owera inaina aro mamu. Io Godi umoro tato urubia idaibo tanaro nou isioidirotiti-dumo. Mabu neio ibo imaragoidirotiti-dumo, tututu kararatoro owera karo ato neio Godi ro kimerewidiro ie.

⁸ Nedi urubia ro neio sosoro orowati mamu. Mabu nio edi Abera ro Godi kebase umoro koi ie nio abato beda nakomu ra modobo ato kiamo tato.

⁹ Ina noudo ie nio Abera Godi aboto kararatoro owera karo ato, idaibo mino to gi-araratoro-ri. Nimo Abera Godi Adiri ato na-omidiro-die, oro masiro imese sirio urubia ro ba-memowabutiti-mo mabu oro masiro tarena ie.

¹⁰ Ina oro ro kiwaboi maumo ato imese urubia sirio ba-mirowomidirotiti. Oro ubi tanaro imese urubia ro ba-misioidirotiti-mo nedi sopu duriomoro ro nato, beda sosoro isioidirotiti-dumo Adiri sabowa ato.

¹¹ Saiki gabagabo ato oro ro modobo ie nimo ohona simara modobo ato kimio.

¹² Nimo ia ro woki beda sosoro nimatiti-dumo ubauba, arua urubia ro na-isioidiro-dumo nimo

aboto, io nimo ubauba na-nisioidiro-dumo oro ro modobo ie idaibo sosoro kimatopeamuti.

¹³ Koko kiwaibirio tanaro aboudo oro ro modobo ie nimo kiwagarewado, ibose ubauba mabu dubu aboudo, oro ro modobo ie nimo kiwasiouti.'

Iesu ro kowasoro urubia kararatoro oweru ibo gitamudiro.

¹⁴ 'Nio aboto ubauba etio ro isioidiro-dumo, neio edi ubauba ro nio ro namadimi-imatopeamuti-ri, ina nio Abera Adiri sabowa ato na-omidiro-die, nio edi ubauba ro nou ro kimatopeamuti ie.

¹⁵ Ina ubauba nio aboto etio ro isioidiro-dumo, nio ro kimatopeamuti tato, nio edi Abera ro nou ro nio edi ubauba ro imatopeamuti-ri pua.'

Ohona kiho tato korowomidiro ato, tanaro ibo ie

¹⁶ 'Nio ohona kiho tato korowomidiro ato Godi kemaragoidiro aboto, kamade tato se orowomidiro mamu. Mabu karatigi urubia ro idaibo tanaro nou isioidirotiti-dumo, urubia umoro oi ri ibo neio ohona kiho tato diriwodiriwo se saiki tuturu orowomidiro-die, urubia ro imowabu rie. Nio mo ro morobise oweru ibo mimowapotai-ro! Nedi urubia ro wisa urubia aboudo momuo se imese imade-dumo, ido pua ie.

¹⁷ Kaupoti oro ia nakara se ohona kiho tato komidiro ato, obo diowa, mea mino to deremedi.

¹⁸ Idaibo oro urubia ro eibimai-ri pua ibo oro saiki tuturu omidiro-die kiho tato. Kaupoti oro ro kiauri tato Abera nu nakara se auna umoro ie

oro ro piro se beda meamea tanaro kisioidiro ra. Ina oro ro nou aboudo mea wisa komidai ie.'

Meamea namabu Adiri sabowa ato gi-iaremo-ri

¹⁹ 'Awawo mani namabu nedi sopu duriomoro ro nato na-iworohuti-dumo nakara se eremowoiriamuti mamō. Mabu kipiri genoho mutu neio ro ubauba aise kiwai ie, ibose neio esepa koititi ie. Ina piro urubia ro modobo se kowamo ie kiwopiro.

²⁰ Kaupoti nio ro simara ia sapuwo to meamea namabu modobo ie Adiri sabowa ato kiaremo. Mabu neio genoho ra kipiri ra ro iho-ri pua, ibose esepa oititi-ri pua. Ina piro urubia ro modobo pua kiwopiro.

²¹ Oro ro beda moro ato kiaremuti ra, oro edi giropu ro iato ibose to kowamo ie.'

Oro idomari teibo pina sosoro ie

²² 'Oro idomari teibo durupi sapuwo to pina sosoro ie. Oro ro idomari teibo mea se na-iworohuti-ma, oro durupi momuo se imese woroworo ia se koworohuti ie.

²³ Kaupoti oro idomari teibo duwoduwo se na-iworohuti-ma, oro edi durupi ro momuo se duwoduwo maumo ato ama-owamotiti-ri. Ina noudo ie beda woroworo ra oro durupi ato nou duwoduwo sosoro na-owamo, nedi duwoduwo ro imese sisibo ia ie!'

Godi ubi tanaro ina duriomoro namabu ubi tanaro

²⁴ 'Ata dubu ro modobo pua netewa teibo eputa dubu teibo ubi tanaro kimesioidiro-ma. Nou ro ata eputa dubu owera se kirowidiro ie, ina ata eputa dubu owera kirowidiro tato. Ina

idaibo sosoro ie, nio ro modobo pua Godi nio eputa dubu to kapoi, ibose duriomoro namabu nio eputa dubu to kapoi.'

*Beda mutu namabu ro iamo keremiro kiwaboi
sapuwo to neio sapuwo to modobo pua
kimaragoidiro siriosirio kiworohuti*

²⁵ Iesu ro owera inaina aise gemoguwado. Nou ro ibo, 'Ina noudo ie nio keremiro sapuwo to, ohona ra obo ra sapuwo to auna se imaragoidiro mamo, ibo beda ohona namadimi-iho-ri, beda obo namadimi-idio-ri, beda namabu namadimi-iroidiro-ri? Nio umoro ra ibo nio keremiro auna nakomu e. Kiho namabu, kiroidiro namabu awawo nakomu pua.

²⁶ Nio ro ma-diauri-mo pawa ohu ato na-irowadaudirotiti-dumo, neio ro kiho ota iopu nakara se keremobouti pua, ohona patu kisaubo pua, ibose neio ohona keremaremo moto tato ie. Kaupoti nio Abera Godi Adiri sabowa ato na-imidirotiti-die, neio ota iopu nou ro imiotiti-die. Auna nakomu etou ra, urubia ra o pawa ra?

²⁷ Ina nio kimaragoidiro siriosirio kiworohuti ato, nedi tanaro ro neito nio simara korowomidiro keremiro tuturu tau mere to kiwaboi ra? E e, idaibo gabo pоторо ia ie!

²⁸ Ina mabu boira nio durupi namabu aboto auna se na-imaragoidirotiti-dumo? Nio ro ma-dimaragoidiro-mo tumu kakamu na-isuwodutiti-dumo, neio woko kisioidiro pua, ibose neio obotama nakara se keremowaruwoidiro pua.

29 Kaupoti nio mo ro nedi owerā ro nou mimowapotai-ro, eputa dubu Soromoni nou egea namabu sirio dubu e. Kakamu idaibo sosoro na-imedutiti, Soromoni idaibo sosoro namabu to eremedutiti pua.

30 Tumu kakamu na-isuwoduti-dumo, neio Godi ro mea sosoro imedutiti. Neio tuturu tau to korowotoi pua, pamo na-owoi-dumo, taie era to kiherai ie. Ina nio Godi ro ubauba se ama-imedutiti-ri ra? Nio kimibiria imese kainai ia ie!

31 Ina noudo ie ohona ra obo ra aboto kimaragoidiro siriosirio iworohuti mamō. Idaibo beda ohona namadimi-iho-ri? Ina beda obo namadimi-idio-ri? Ina beda namabu namadimi-iroidiro-ri?

32 Mabu Godi umoro tato urubia idaibo namabu aboto auna se imaragoidirotiti-dumo. Ina nio Abera Adiri sabowa ato na-imidirotiti-die, nu auna umoro ie nio keremiro kiwaboī namabu, nou ro kimio ie.

33 Kaupoti auna tanaro nou e, nio ro Godi edi kiwaboī tanaro ro nio keremiro ato kebase nou kedeā modobo ie, nou edi tuputupu tanaro ro nou kisioidiro mutu. Ina nio edi keremiro kiwaboī namabu ro nio Godi ro imese ama-imio-ri.

34 Ina noudo ie ata kowaroho saiki nou edi kimaragoidiro siriosirio mutu namadi-ou-ri, modobo pua abora iedi kimaragoidiro siriosirio ro nou aboto kidabuai. Ina mabu boira nio ro ohu rido kowaroho saiki sapuwo to na-eremotomo-dumo? E e, idaibo orowati mamō. Kowaroho saiki nou simara mibo mutu amadi-ou-ri.'

7

Urubia idoromuti mamō

¹ ‘Arua urubia dorogara mabu ato idoromuti mamō. Tauo oro ia nakara se ma-derereauri, oro Godi ro ibose kodoromai modobo pua.

² Mabu oro ro urubia beda sosoro kidoromuti ra, oro Godi ro idaibo sosoro ama-odoromai-ri. Urubia oro ro beda modobo ato imodobowauti, ina oro Godi ro iedi atu modobo ro nato ama-emodobowauti-ri.

³ Ina oro namutuna idomari ato momoso na-emeauri, mabu boira oro ro edi momoso ro nou idomari rido eweihai ri na-warō? Ina oro ia nakara se simara idomari a-weremeauri ra?

⁴ Ina oro nakara se ma-deremowea, oro idomari ato ota agagi towamo.

⁵ Oro imese karatigi dubu e. Kibase ota agagi oro idomari ato na-owamo, nou ba-dereweihai. Ido oro mea se nato ama-irarowo-ri, taie oro namutuna idomari ato momoso na-owamo, oro ro nato amadi-eweihai-ri.

⁶ Urubia etio ra auna ubi tato na-iamo Godi edi owera ro nou aboto, neio soka ra giro ra sosoro ie, neio Godi owera imio mamō. Nou idaibo sosoro ie Godi edi tarena namabu soka kimowehere ie, ibose auna mani namabu giro kimowehere ie. Nou idaibo sosoro tanaro kisioidiro ato, soka ra giro ra ro aise kituti ie, ina iato etou ra neio aise kerewesegerai ie oro aboto, oro neio ro durupi kowasomai ie.’

Mea se kararatoro tanaro ibo ie

⁷ ‘Auna se dararatorotiti-mo, ina nio Godi ro nato amadi-imio-ri. Binio to dosora-mo, nio ro nato amadimi-iwia-ri. Magere damo ato kohe to

auna se dorowapotaiddiro-mo, nio aboto magere nato amadi-orodobura-ri.

⁸ Mabu auna se etio ro kararatoro ra, neio Godi ro nato kimio ie. Binio to etio ro kiosora ra, neio Godi aboudo kiauri ie. Ibose magere damo ato kohe to auna se etio ro orowapotaiddiro-dumo, neio aboto Godi ro magere kodobura ie.

⁹ Mamio abeamio, merebusere dokou ri na-utura-dumo nio ro goto kere kimaudai ra?

¹⁰ Ibose merebusere nakere ri na-utura-dumo, nio ro bagawe kimia ra?

¹¹ Mamio abeamio, nio meamea mamio abeamio pua, imese ubauba ia ie. Kaupoti nio nirimagare mutu e, merebusere aboto nio ro meamea ohona kimio ie. Abera Godi nio sosoro pua, nou imese meana ia ie. Nou auna ia nirimagare mutu kimio ie meamea namabu nou aboto na-orowaro-dumo!'

Ohu ia korotomu oweria ie

¹² 'Godi ro edi sabi sirio ro na-giaiwai-ro Mose aboto, ibose Godi ipusu oweria urubia ro edi oweria ro gisioiddiro-rimo, morobise to nedi oweria ro neito imese ta-gimatahirai, nou e. Nio ubi beda sosoro iamo arua urubia ro nio kiworohuti aboto, io arua urubia idaibo sosoro ba-diworohuti-mo.'

Magere teibo tiamo-ma

¹³ 'Keremiro magere imese kurukuru ia ie, ina auna magere imese boroboro ia ie. Auna gabo magere imese wagawaga ia ie, ibose gabo imese boroboro ia ie. Ina nedi magere ro sirio ia urubia ro odoutiti-dumo. Kaupoti nedi gabo ro

neido etio ro odoro-dumo neio era paruo emou-dumo.

¹⁴ Kaupoti ata gabo, nu magere imese kurukuru ia ie, womu tato womu tato keremiro koweia aboto. Nedi keremiro kurukuru magere ro neido dodoro-rimo. Neito etio ro odoutiti-dumo neio sirio koko tau amadimi-iaurititi-ri keremiro na-emou-dumo, ina sipu tato urubia ro aritiawado-dumo.'

Nio ro urubia neito kieibimo ie neio ro beda tanaro isioidiro-dumo

¹⁵ 'Mea se deremowotoi-mo Godi ipusu owera urubia to amia urubia taratigi-dumo. Neio kimibiria urubia to aratigi-dumo. Kaupoti neio serawo soka sosoro ie, urubia neio ro iohi rie, ina iopiauti rie.

¹⁶ Neio ro beda tanaro ra namadimi-isioidiro-ri nio ro namadimi-iwia-ri, nio ro nato amadimi-ieibimo-ri, neio beda sosoro urubia ra. Urubia ro woimu deimi iopu goino hodo rido kidoho ra? Ibose buni iopu badari ota rido kidoho ra?

¹⁷ Ina atu sosoro tanaro ibo kororosioioidiro ie meamea ota rido meamea ota iopu ro kisuwoduti ie. Ibose ubauba ota rido ubauba ota iopu ro kisuwoduti ie.

¹⁸ Meamea ota rido ubauba ota iopu kisuwoduti modobo pua, gabo tato ie. Ina ibose ubauba ota rido meamea ota iopu kisuwoduti modobo pua.

¹⁹ Beda ota sirio ra meamea deimi iopu kisuwoduti tato, neio Godi ro ama-iebuti-ri taie era to aise ama-ihere-ri.

²⁰ Ina idaibo sosoro ie, nedi karatigi urubia ro neio beda tanaro namadimi-isioidiro-ri, nio umoro neido amadimo-oititi-ri.'

Mo umoro pua nio

²¹ 'Mo sirio urubia ro Abera Naramu to kasoro ie, kaupoti neio arua Godi edi kiwaboi tanaro ro neito odouti-ri pua. Ina mo abera Adiri sabowa ato na-omidiro-die nou ubi tanaro etio ro isioidiro-dumo, io neio ro se amadimo-odouti-ri.

²² Iedi koto saiki ro nama-orobai-ri, mo sirio urubia ro Abera Naramu to anamadima-asororo-ri. Kaupoti nedi urubia ro Godi ubi tanaro isioidiro-ri pua. Neio ro ibo amadima-aro-ri, "Abera Naramu, Ei Abera Naramu! Oro edi ipusu oweru ro nimo ro na-nimowautiti-mo nimo oro ro ta-niaurititi-ro. Oro edi pupuwo korosa ro neito nimo ro ubauba urio urubia aboudo ta-nimabodoidiro-ri-mo. Ibose nimo ro sirio pupuwo korosa tanaro oro edi pupuwo korosa ro neito ta-nisioidiro-ri-mo."

²³ Kaupoti neio mo ro paea mata se nama-imowapotai-ri ibo, "Nio ubauba tanaro kisioidiro urubia ie. Mo umoro pua nio. Daragare-mo mo aboudo!" '

Moto kididi dubu teibo sapuwo to nou totomu e

²⁴ 'Ina noudo ie mo kitamudiro oweru sirio etio ro irowidiro-dumo, ina durupi to na-isioidiro-dumo, neio muro dubu sosoro ie. Nou ro moto na-gididi damera goto ato gididi, kokoho ta-gemowaititi nadi sosoro itoititi.

²⁵ Daroho na-gou-ro, abata obo imese ta-gioro-ro, ibose surama erere sapuwo rido imese pupuwo ia se gihuduti-ro. Iedi moto ro

nato gederiouti, kaupoti nou koko se gotoi, ederiai pua. Mabu iedi moto ro kokoho damera goto ro ta-gemowaititi.

²⁶ Kaupoti mo kitamudiro owera etio ro irowidiro-dumo ina durupi to kisioidiro tato, nedi urubia ro kimaragoidiro tato dubu sosoro ie. Nou ro moto pusuru goto ato gididi,

²⁷ daroho na-gou-ro, abata obo imese ta-gioro-ro, surama imese pupuwo ia se gihuduti-ro. Iedi moto ro nato gederiouti. Modobo pua, iedi moto ro auna diamo mutu garaburuti.'

²⁸ Iesu ro nedi kitamudiro owera sirio ro kimowauti na-goporeai, iedi topira gebari ro gorobu auna kimaragoidiro ro giopia, nou edi kitamudiro ro nou sapuwo to.

²⁹ Mabu nou edi kitamudiro ro imese pupuwo korosa mutu e. Nedi korosa ro Godi aboudo gou-ro, Mose sabi kitamudiro urubia sosoro pua.

8

Katio dubu Iesu ro meana gowai

¹ Iesu podo ohu rido na-gororowo-ro, nou urubia sirio ro gobodoro-rimo saro rido.

² Taie ata katio dubu Iesu aboto nato gou-ro, nou sosoro gabo ato kauhio to aise girimusubua. Nou ro ibo, 'Abera Naramu, oro ubi ato mo meana dowai-ro. Mo katio demowagare-ro!'

³ Iesu ro nou owera na-gemororowai, tu iato gituturai iedi dubu ro nou aboto, taie iato gowasomai. Nou ro ibo, 'Mo ubi ie oro meana kowai. Abora oro meana doi!'

Nedi atu tau ro nato Godi edi pupuwo korosa ro neito iedi dubu ro meana aise goi.

⁴ Taie nou Iesu ro nedi owera ro neito gemowapotai, 'Owera neito ma-dirorowai-ro, oro ro ata dubu ata umoro owai ate ibo mo modobo ta-noi. Kaupoti oro mo ro a-notiodorai Godi ra urubia ra turi dubu aboto. Nou aboto se ba-dorowapotai ibo mo meana ta-noi. Taie Mose ro beda owera gisioidiro Tarena Buka ato kematowo namabu sapuwo to, nou aboto nato ba-diaiwai. Idaibo tanaro oro ro nama-osioidiro-ri, urubia umoro nato amadimo-oi-ri ibo oro meana ta-woi.'

Roma boso eputa dubu kimibiria mutu e

⁵ Iesu Kapeniama sabowa to na-godoro, Roma boso eputa dubu nou aboto nato gou-ro. Iesu nou ro nato gemodowa, mabu nou ubi ie nou ro owarebai ri.

⁶ Nou ro ibo, 'Abera Naramu, mo sowake dubu auna temeteme ro owati, koroho modobo pua.'

⁷ Taie iedi dubu ro owera Iesu ro ibo gemowameai, 'Mo anamadi-ou-ri nou meana owai ri.'

⁸ Ina nedi dubu ro Iesu owera ibo gemowameai, 'E e! Abera Naramu, mo modobo pua. Oro auna dubu e. Oro mo moto to kou modobo pua. Kaupoti owera se demeiriai nou meana koi sapuwo to, ina nou meana ama-oi-ri.

⁹ Mo umoro ie mabu mo eputa dubu mutu e, mo ro nou woko nemesioidirotiti. Ibose boso koroho urubia neio mo ro niauri. Mo ro ata dubu aboto kutura ato ito ou ri, nou ito aise kou e. Ina ata dubu aboto kutura ato neito ou ri, nou neito aise kou e. Sowake koroho dubu aboto

kutura ato woko osioidiro ri, nou ro aise kosioidiro ie.'

¹⁰ Iesu ro iedi owerā na-girowidiro, nou iato kimaragoidiro ro gopia. Nou saro rido edi urubia ro gobodoro-rimo, neio aboto iato gerewesegerai. Nou ro ibo, 'Nio mo ro morobise owerā mimowapotai-ro. Isiraere urubia abato mo egea se nirohotiti, mo ro ata dubu ata owea pua, mo sapuwo to idaibo sosoro pupuwo kimibiria mutu.

¹¹ Nio mo ro a-nimowapotai Iu owerā karo tato urubia sirio erere duriomoro rido amadidimo-oroho-ri. Soriomu ohona neio ro amadimi-iho-ri Aberaham, Aisaki, Iakobo neibi mutu Godi edi kiwaboi maumo ro nato.

¹² Godi edi kiwaboi tanaro ro Iu urubia do sekere ie, kaupoti neio ito odouti-ri pua. Neio Godi ro amadi-ihere-ri duwoduwo ia maumo moro to. Taie auna idobi diamo iato aise ama-ereredeā-ri, temeteme iamo matagoro karabowa iato amadimo-oroho-ri.'

¹³ Taie Iesu ro ibo Roma boso koroho eputa dubu aboto, 'Oro abato kimibiria beda sosoro na-owamo oro edi sowake dubu ro nou sapuwo to, tanaro ibose to amadimo-ororosoidiro-ri. Ba-dorowameai.'

Iedi atu tau ro nato nou edi sowake dubu ro meana aise goi.

Iesu ro sirio urubia meana giwaititi

¹⁴ Iesu Pita moto to na-gorowateai, nou ro Pita emapura abere se gowea na-gorobu kabena ro gowati.

¹⁵ Iedi orobo ro tu ato aise gorobai. Nou ro edi tau ato gorobai, iedi orobo ro kabena ro aise

gemeserai. Taie nou ioudo na-geribuwa-ro, Iesu kowasoro urubia mutu ohona iato gimitai-bi.

¹⁶ Taie edi adimo duwoduwo ro nato, ubauba urio edi urubia sirio abato na-gorowomidiro Iesu aboto namuturubi ro nato giworoho-rimo nou ro meana iwaititi ri. Iesu ro ubauba urio aise gimowapotaiddiro urubia aboudo osuwoduti ri. Taie neio ioudo aise gosuwoduti-rimo. Ibose nou ro imese temeteme urubia meana ta-iwaititi.

¹⁷ Iesu ro nedi tanaro ro na-gisioidiro, Godi ipusu oweru dubu Aisaia kebase beda oweru gisioidiro Tarena Buka ato, nedi tanaro ro morobise to noti gororosioiddiro-dumo. Aisaia ro ibo, *Nou ia ro nakara se gimidai nimo edi durupi ubauba ro. Ibose nimo edi temeteme sirio ro nou ro nimo aboudo ta-giwagarewado.*

Iesu kowasoro ato oro ro koko kiauri ie

¹⁸ Auna topira Iesu ro na-gowea-ro, taie kowasoro urubia nou ro nato gimowapotai obo paruo sapuwo to iabu ri.

¹⁹ Tuturu to owamo pua Mose sabi kitamudiro dubu kaupoti Iesu aboto nato gou-ro. Nou ro ibo, 'Oro beda moro to nama-oroho-ri, oro anama-owasoro-ri.'

²⁰ Ina nedi dubu ro Iesu ro ibo gemowameai, 'Tumu soka neio kirobuti moro mutu e, pawa ibose neio toto mutu e. Kaupoti Imese Urubia Kiauri Dubu nou korobuti moro tato ie.'

²¹ Ina Iesu edi urubia ro gowasoro-rimo neio ata ro ibo, 'Abera Naramu, mo kebase sabowa to nama-orowameai-ri abera oromano nama-owarebai-ri. Nou nama-araburai-ri saro

gabo ato, mo nato tinamadi-orowameai-ri oro owasoro ri.'

²² Kaupoti nedi dubu ro Iesu ro ibo gemowameai, 'Abora nedi tau ro nato, mo aboto daradabuai-ro. Iedi urubia ro orowomidiro urio pamo mutu, oro abera negere neio ro ba-mowaumia-mo.'

Iesu ro surama ra bukupu ra a-giadibiai-ma

²³ Taie Iesu iedi moro ro ioudo sawa pe to aise gorora-ro kowasoro urubia mutu. Neio atu se obo paruo ata sapuwo to imese giabu-rimo.

²⁴ Ipi ato neio auna surama ro gimabuwo-ro. Iedi surama ro obo paruo ato ubauba mino to gororosowa-ro. Iedi sawa pe ro bukupu sapuwosapuwo rido gorowiti-rimo. Iesu wisana norou gorobu.

²⁵ Taie kowasoro urubia nato gorowadoro-rimo Iesu norou maumo rido amutia ri. Neio ro ibo, 'Abera Naramu nimo diwarebai-ro! Nimo aupise ie kimarumo!'

²⁶ Taie neio Iesu ro ibo gimowameai, 'Nio kimibiria imese kainai ia ie! Nio etou tere ro iwati?'

Taie Iesu na-geribuwa-ro surama ra bukupu ra orodiobo ri nato gimadowerai-ma. Tuturu to owamo pua iedi obo paruo gebari ro nato gasio aise gereredea.

²⁷ Kowasoro urubia iato woki ro giopia. Neio ro ibo, 'Nou beda dubu ra? Surama ra bukupu ra nou owera to aise orodiobo-do!'

Dubu teibo ubauba urio ro giworohuti-marimo

²⁸ Iesu Gariri obo paruo ata sapuwo to na-gorowateai, nou kebase Gerasa duriomoro to

gidiai. Ubauba urio dubu teibo abato gorowomidiro, neitiro pamo urubia bobo ato imidiro-titi-do, ioudo gosuruwo-rido Iesu owea ri. Nedi dubu teibo ro serawo se iamotiti-ma, ina urubia iedi gabo ro neido irohotiti pua. Neitiro ro Iesu na-gowea-rido,

²⁹ ioudo giaia-rido, 'Oro Godi mere ie! Oro nimo aboto etou tanaro amadi-osioidiro-ri? Oro ro nimo auna temeteme imia-ri a-wou-die ra? Nimo tau mea se orobai pua oro ro auna temeteme kimia sapuwo to.'

³⁰ Iedi duriomoro ro iato giro sirio muso ato oroho pua, neio a-geremosora-rimo.

³¹ Iedi ubauba urio ro gorowomidiro neitiro niro turi ato, Iesu neio ro nato gemagege-rimo, 'Nimo oro ro namadi-imabodorai-ri iedi dubu teibo ro neitiro aboudo, giro niro turi to ba-dimeiriai-ro!'

³² Taie Iesu ro nato gutura ibo, 'Ito dosuruwo-mo!'

Ina noudo ie nedi oweru ro ubauba urio ro na-girorowai-rimo, neio ioudo aise gosuruwo-rimo giro niro turi to. Iedi giro sirio ro aise gorowodori-rimo damera gawagogo rido obo paruo to. Taie edi giro sirio ro obo ro aise giopia.

³³ Giro edi urubia ro gimowotoi-rimo neio ro edi tanaro ro na-gowea-rimo, neio tere ri auna sabowa to aise gorowadau. Neio auna sabowa to na-gorowateai-rimo, nedi oweru ro neio ro iato gobodorouti-rimo. Ibose ubauba urio edi dubu teibo aboudo gimabodorai, oweru neitiro ro ibose to gobodorouti-rido iedi sabowa ro nato.

³⁴ Taie iedi sabowa ro neido sirio urubia aise gou-rimo Iesu owea ri. Neio ro Iesu na-gowea-rimo, nou neio ro binio to gemediai-rimo iedi duriomoro ro emesera i ri.

9

Iesu pupuwo korosa mutu e ubauba kimatopeamuti aboto

¹ Taie Iesu ina ioudo sawa pe to aise gorora-ro, obo paruo ata sapuwo to imese gabu-ro. Nou simara sabowa Kapeniama neito gorowameai-ro.

² Nou ito na-gorowateai, arua urubia ro togiri dubu taratara mutu gowou-rimo Iesu aboto. Nedi urubia ro Iesu ro kimibiria kebase ta-gimowea, taie nou ro ibo togiri dubu aboto, 'Mo mere, oro tere na ie! Abora oro ubauba mo ro ta-nematopeamuti.'

³ Iedi tau ro nato Mose sabi kitamudiro urubia iato ibose to gorowomidiro. Neio ro na-girorowai-rimo Iesu ro beda oweru gutura, neio nakara se iato geremowauti-rimo ibo, 'Nou ro Godi masiro ubauba ta-owai.'

⁴ Kaupoti neio edi kimaragoidiro ro Iesu ro ta-gimowea, taie neio nou ro nato gimowapotai, 'Mabu boira nio ubauba kimaragoidiro mutu na-irohotiti-dumo?

⁵ Beda oweru ra koko tato mo ro kutura aboto? Mo ro ibo kutura ato "Oro ubauba ta-nematopeamuti." Nou ra? O mo ro ibo kutura ato "Dotobowa doroho!" Nou ra?

⁶ Mo Imese Urubia Kiauri Dubu e, ina ata tanaro mo ro anama-osiodiro-ri, nio umoro koi sapuwo to ibo, mo abato pupuwo korosa

towamo nedi duriomoro ro nato, urubia ubauba kimatopeamuti aboto.' Taie nou ro nato gutura togiri dubu aboto ibo, 'Deribua! Keta detebuti! Dorowameai sabowa to!'

⁷ Iedi tau ro nato iedi togiri dubu ro meana aise goi, na-geribuwa-ro taie simara sairo to imese gorowameai sabowa to.

⁸ Nedi tanaro ro urubia sirio ro na-gowea-rimo, neio kimaragoidiro ro giopia, sapuwo to tere ro giwati. Taie Godi neio ro auna se iato gemowabu-rimo. Mabu idaibo sosoro pupuwo korosa Godi ro ta-gaiwai-ro urubia dubu aboto, idaibo tanaro kisioidiro aboto.

Iesu ro Mataio gemowapotai nou owasoro ri

⁹ Iesu ro edi duriomoro na-gemeserai, nou ro Mataio nato gowea takesi kimade moto ato gomidiro. Iesu ro ibo Mataio aboto, 'Dou-ro mo dawasoro-ro!' Mataio ro na-girorowai Iesu edi oweru ro nou aise garadabuai, Iesu nou ro saro rido imese gobodoro.

¹⁰ Taie ido Iesu Mataio moto ato ohona iato giho. Sirio takesi kimade urubia, sabi kisebo urubia mutu, neio ro gou-rimo Iesu mutu ohona atu moro ato giho-rimo, nou kowasoro urubia mutu.

¹¹ Neio Parasi urubia ro na-giwia-rimo, ohona kiho moro ato Iesu mutu, neio ro kowasoro urubia nato gimodowa-rimo ibo, 'Mabu boira nio kitamudiho dubu takesi kimade urubia mutu, ibose sabi kisebo urubia mutu, ohona atu moro ato na-iho-dumo?'

¹² Neio edi kemodowa oweru ro Iesu ro na-gimororowai, neio nou ro ibo gimowameai, 'Nou idaibo sosoro ie, etio ra durupi gamogamo

se na-iworohuti-dumo, temeteme ro iwati tato, dokota neio aboto ou-ri pua. Kaupoti temeteme ro etio ra iwati, dokota neio aboto kou e.

¹³ Godi owerā Tarena Buka ato keba ia se ta-gisioi-di-ro-rimo ibo, “Mo ubi ie nio ro urubia natonato kimati. Mo ubi tato ie nio ro dao kimatowo tanaro sirio tau aise na-isioidi-ro-dumo.” Kaupoti ba-dorowameai-mo maumo mea se ba-dosora-mo! Mo nedi sopo duriomoro neito na-nou-ro, ubauba urubia aboto nou-ro, neio imowauti ri ubauba aboudo erewesegerai ri, mo ibo pua meamea urubia aboto kou.’

Tagara tanaro orio tanaro mutu imasaupiai-ri pua

¹⁴ Ata tau obo to kiwarumiauti dubu Ioane, nou edi kowasoro urubia ro arua, Iesu aboto nato gou-rimo. Neio ro Iesu nato gemodowa-rimo ibo, ‘Nimo arua tau ohona kiho tato korowomidi-ro ie, Parasi urubia atu sosoro tanaro ibose to kisioidi-ro ie. Ina mabu boira oro edi kowasoro urubia ro ohona kiho tato tanaro kisioidi-ro tato, Godi kemaragoidi-ro sapuwo to?’

¹⁵ Neio Iesu ro nedi totomu owerā ro neito gimowameai, ‘Marete soriomu ato, orio dubu nu orobo dese to na-edea, nu simara namuturubi pape korowomidi-ro ra? E e! Kaupoti ata saiki amadi-ou-ri nedi orio dubu ro orobo dese to na-gedeā, nu namuturubi aboudo amadimo-owagare-ri. Taie edi tau ro nato neio ohona kiho tato nato ama-orowomidi-ro-ri.

¹⁶ Ina ata orobo modobo pua tagara obotama pito mutu, orio obotama kere to kemowateai. Mabu kowiouti ato, iedi obotama kere ro aise

kerekekeai ie, ibose edi tagara obotama ro nou pito auna aise kowai ie.'

¹⁷ Iesu ro ina atu sosoro totomu iato gimowauti, 'Ata mere ro orio tuba tagara kepuru to arate-ri pua. Mabu idaibo mino to kororosioihiro ato, orio tuba tagara kepuru to karate ato, iedi tuba ro keremagaubuti ato, iedi kepuru ro aise kerepeputi ie, tuba aise karasiai ie, ina kepuru ubauba koi ie. Kaupoti urubia ro ibo kisioidiro ie, orio tuba orio kepuru to kiratuti ie. Neitiro atu se modobo ato ama-iamotiti-mari.'

Iesu ro temeteme orobo meana gowai ibose pamo besere keremiro gemowameai-ro

¹⁸ Iesu ro totomu kimowauti oroporeai pua, taie sabowa kiauri dubu nou aboto nato gou-ro. Nou Iesu sosoro gabo ato kauhio to aise girimusubua. Nou ro ibo, 'Mo besere kainai ta-naseperai. Oro aise ba-dou-ro tu itomai ri nou durupi ato, nou keremiro kemowameai sapuwo to.'

¹⁹ Taie Iesu aise geribuwa-ro, iedi dubu ro nou aboto aise garadabuai. Kowasoro urubia ibose nou aboto ta-garadabuai-rimo, atu se imese gou-rimo nedi dubu ro nou moto to.

²⁰⁻²¹ Neio atu se edi tau ato gou-rimo iedi dubu ro nou moto to, ata orobo Iesu saro rido ta-gou-ro. Iedi orobo ro nou durupi tama rido karima ro ororuwotiti-ro. Nedi temeteme ro nou abato 12 kisimisi to owamotiti. Nou ro kimaragoidiro to ibo, 'Mo ro Iesu obotama gare nama-emowasomai-ri, mo meana anama-oi-ri.'

Taie nou ro Iesu obotama gare nato gemowasomai.

²² Iesu huru to na-gimeterai-ro, iedi orobo ro nou se gowea. Nou ro ibo, 'Besere buro, oro tere na ie. Oro simara kimibiria ro owai meana.'

Taie iedi tau ro nato iedi orobo ro meana aise goi.

²³ Taie Iesu aise gemobodiai sabowa kiauri dubu moto to. Nou ito na-gorowateai, nou ro nato giwia urubia sirio iedi besere ro idobi gemerete-rimo. Neio ro auna diamo gisioidiro-rimo, ibose arua urubia ugeuge gemourio-birimo.

²⁴ Neio nou ro nato gimaiauti, 'Neido daragare-mo! Nedi besere ro pamo pua, norou orobu.'

Kaupoti Iesu owera urubia sirio ro na-gemororowai-rimo neio ro nou gaga gemororouti-rimo.

²⁵ Iedi urubia sirio ro Iesu ro ioudo na-gimabodorai-ro, taie nou moto goro to nato godoro. Iedi besere kainai ro tu rido na-gorobai-ro, nou aise geribuwa-ro.

²⁶ Iedi tanaro ro Iesu ro na-gosioidiro, nou sapuwo to owera nato gobodorouti-rimo iedi duriomoro gebari ro nato.

Iesu ro dubu peteibi meana giwai-ibi

²⁷ Iesu ro edi moro ro na-gemeserai-ro, nu aise gadorowado ina nou netewa teibo pogo dubu teibo ro saro rido aise gobodoro-rido. Iesu aise gouwado ina neitiro Iesu aboto auna se inaina aise giaiauti-rido ibo, 'Oro Godi ro kohodowa dubu e! Neitiro natonato dimati-marol'

²⁸ Taie Iesu edi moto to na-godoro edi pogo dubu teibo ro ibose to godoro-rido. Nou ro ibo

neitiro aboto, 'Nitiro abato kimibiria a-iamo ra ibo mo ro modobo ie nitiro meana kiwai-ma aboto?'

Neitiro ro ibo, 'Io Abera Naramu neitiro ti-nimibiria-do ibo neitiro oro ro modobo ie meana kiwai-ma aboto.'

²⁹ Taie neitiro edi idomari ro Iesu ro aise gimowasomai-ma, nou ro ibo, 'Nitiro kimibiria mutu e, nitiro idomari Godi ro meana imowai-ma.'

³⁰ Taie iato tuturu to owamo pua neitiro idomari meana aise goi-rido. Neitiro idomari meana na-goi-rido, Iesu ro binio to owera nato gimowapotai-ma ibo, 'Nedi tanaro ro ororosioidiro nou sapuwo to urubia imowauti atel!'

³¹ Kaupoti neitiro na-gorowameai-rido, owera neitiro ro aise gobodorouti-rido iedi duriomoro ro nato.

³² Iedi dubu teibo ro moto goro rido na-gosuruwo-rido, iedi tau ro nato owera karo tato dubu ubauba urio ro oworohutiti, simara urubia ro nato gowou-rimo Iesu aboto.

³³ Iedi ubauba urio ro gomidiro nou abato Iesu ro nato gemabodorai nou aboudo. Taie iedi owera karo tato dubu ro owera imese garo. Iedi auna dubu patu ro gorobu iato, neio ro na-gowea-rimo iedi tanaro ro gorosioidiro neio kimaragoidiro ro giopia. Neio ro ibo, 'Idaibo tanaro nimo ro abora se nowea-dumo nimo nedi Isiraere duriomoro gebari ro nato. Nimo ro idaibo korosa tanaro kiauri pua.'

³⁴ Kaupoti Parasi urubia Iesu sapuwo to ibo garowado-rimo, 'Ubauba urio sirio edi eputa

urio ro, Iesu pupuwo korosa nou ro omiotiti-die ubauba urio kimabodoidiro aboto.'

Godi woko urubia sipu tato ie

³⁵ Iesu kowasoro urubia na-gidabuai, taie neio ro awawo sabowa sirio, kainakaina sabowa sirio mutu iato giraturio-rimo. Iesu ro Iu urubia simara karadabu moto ato iato itamudiroiti. Nou ro urubia ta-imowautiti mea owera Godi ro kiwabo i tanaro sapuwo to. Ibose urubia durupi ato beda ubauba temeteme sirio ro iamotiti, nou ro meana aise giwaititi.

³⁶ Nou ro urubia na-iaurititi kimaragoidiro siriosirio mutu koroho ato, neio sopu ia to imese ta-giwororuworo-rimo. Nedi urubia ro neio sipisipi sosoro ie dorogora se irohotiti-dumo, kimowotoi dubu tato ie. Neio idaibo sosoro Iesu ro na-giauri, neio noudo ie nou ro nirimagare gimati.

³⁷ Taie nou kowasoro urubia aboto aise gerewesegerai nou ro ibo, 'Morobise ie nou idaibo sosoro ie, pari ohona sirio ie kiwoiriamuti aboto. Kaupoti kiwoiriamuti woko urubia sipu tato ie.

³⁸ Ina noudo ie nou sapuwo to pari abera ba-dararatoro-mo, woko urubia itioduti ri pari ohona kiwoiriamuti sapuwo to.'

10

Iesu ro 12 kowasoro urubia giaubai

¹ Iesu ro 12 kowasoro urubia nato girumai nou aboto ou ri. Taie neio nou ro pupuwo korosa nato gimia ubauba urio urubia aboudo

imabodoidiro ri, ibose erere temeteme, urubia ro na-giworoho-rimo meana kiwaititi sapuwo to.

² Ina nedi kowasoro urubia ro nou neio masiro ie. Kibase Saimoni ie, nou ata masiro Pita. Nou neama Enduru, Iemisi nou Sebedi mere ie, ina neama Ioane,

³ Piripi, Batoromiu, Tomasi. Mataio takesi mani edi dubu ro imadetiti. Ata Iemisi nou Arapasi mere ie, Tediasi.

⁴ Ata Saimoni nedi dubu ro Roma urubia masawe nou ro iaurititi. Iudasi Kerioti sabowa dubu e. Nedi dubu ro Iesu nou ro gapoi nasa urubia aboto.

*Kitidorai urubia ro nedi tanaro ro nou
gi-isioidiro-ri*

⁵ Iedi 12 kowasoro urubia ro Iesu ro korosa na-gimia neio nedi owera ro nou mutu gitidorai. Nou ro ibo, 'Nio na-nitidorai, Iu owera karo tato urubia aboto ou ate. Ibose Samaria duriomoro ato oroho ate.

⁶ Kaupoti nio mo ro Isiraere urubia aboto nitidorai. Neio kararaseperai sipisipi sosoro ie, sipisipi kimowotoi dubu aboudo gararaseperai-rimo.

⁷ Nio edi koroho namadimo-oroho-ri, nedi mea owera ro neio ba-dimowauti-mo ibo, Godi edi kiwabo i tanaro ro neio aboto aupise ta-gosiomai-die.

⁸ Ina temeteme urubia neio abato na-orowomidiro meana ba-diwaititi-mo. Pamo urubia pamo rudo ba-diwame-rimo. Katio urubia meana ba-diwaititi-mo. Ibose ubauba urio mutu etio ro orowomidiro, neio aboudo iedi ubauba urio ro ba-dimabodoidiro-mo. Nedi pupuwo korosa ro nio aboto wisa tato se naiwai,

ina nio ro ibose urubia wisa tato se meana
ba-diwaititi-mo nedi pupuwo korosa ro neito.

⁹ Nio namadimo-ou-ri, ata mani ata iwou ate,
dorogora se mani tato ba-dou-mo.

¹⁰ Ibose nio ro baiko iwou ate, senisi namabu
iwou ate, didi tamaka iwou ate, kiradiouti
gonopu iwou ate, dorogora se ba-dou-mo. Mabu
nio edi urubia aboto namadimo-ou-ri, nio abato
kiamo tato namabu wisa na modobo ie sabowa
urubia ro neito kiwarebai.

¹¹⁻¹² Nio beda sabowa to kou ra, auna sabowa
ra o kainai sabowa ra, ito na-orowateai-dumo,
tauo keba se iedi sabowa ro nato mea tuputupu
tanaro dubu se gi-osora-ri. Idaibo dubu nio ro
na-owea-dumo, nio nou ro kidabuai ie nou moto
to. Iedi moto ro neito nio nou ro kiwodoro ato,
tauo kebase moto urubia aboto ibo gi-utura-ri,
“Miro nio abato ba-mowamotiti.” Taie iedi moto
ro emeserai mamo, iato se gi-orowomidiro-ri
womu tato iedi sabowa ro nio ro
na-emeserai-dumo.

¹³ Iedi moto urubia ro nio neio ro mea se
na-iwarebai-dumo, iedi miro ro neio abato aise
ba-mowamotiti. Ina ata sapuwo rido kiauri ato,
nio neio ro mea se kiwarebai tato, iedi miro
owera ro neio aboudo aise gi-owameai-ri.

¹⁴ Ina beda sabowa rido ra nio kimaiddorai
tato, ibose ubi tato na-woi-dumo nio edi mea
owera ro kirowidiro aboto, poro panese se
gi-imahudumai-ri. Taie iedi sabowa ro nio ro
emedio mamo, aise gi-emeserai-ri.

¹⁵ Nio mo ro morobise owera
mimowapotai-ro, Sodom ra Gomora ra ubauba
ia tanaro kisoidiro sabowa teibo ie. Neitiro ro
ubauba wisa egea mere se amadi-imidai-ri.

Kaupoti nio beda sabowa rido ibeiouti-dioumo, ibose neio ro nio edi mea oweru ro kirowidiro tato, iedi sabowa ro Godi edi koto saiki ro nato neio ro auna ia ubauba wisa amadimi-imidai-ri. Sodom ra Gomora ra kainai se amadi-imidai-ri.'

Koko tau kitiodorai urubia ro amadimi-iauri-ri

¹⁶ Iesu ro kowasoro urubia oweru aise gimowautiwado. Nou ro ibo, 'Oweru neito ma-dirowidiro-rimo! Nio mo ro sipisipi sosoro nitiodorai kaupoti nedi duriomoro ro nato serawo tumu soka toroho-dumo. Ina noudo ie kemaka beda sosoro kiraroweauti ra, ibo girimi-iraroweauti-ri. Ibose dumu pawa beda sosoro ra ubauba tato, ibo gi-owowomidiro-ri.

¹⁷ Mea se keremowotoi mutu, mabu urubia iato torowomidiro nio neio ro amadimi-iworo-ro, gabamani aboto amadimi-iworo-ro koto oweru aro ri. Ibose nio neio ro Iu urubia karadabuti moto ato kerei to amadimi-ipesuti-ri.

¹⁸ Nedi ubauba tanaro sirio ro nou ri amadimo-ororosoidiro-ri mabu nio mo kowasoro urubia ie. Nio gabamani aboto, eputa urubia aboto, ibose Iu oweru karo tato urubia aboto namadimi-iworo-ro, iedi tau ro nato neio sosoro gabo ato nio ro mo sapuwo to amadimo-owowauti-ri.

¹⁹ Kaupoti nio koto aboto namadimi-iworo-ro, tere kimaragoidiro mutu ou mamu ibo nio ro beda oweru amadima-aro-ri, ibose beda mino to amadima-aro-ri koto abato. Iedi tau ro nato nio Tarena Uriu ro kutura oweru amadi-imasuti-ri.

²⁰ Nio ro karo oweru nio simara oweru pua, Tarena Uriu ro amadi-imasuti-ri. Nio Abera

Godi nou edi Tarena Urío ro nio matagoro rido owerá nou ro amadi-imowauti-ri.

²¹ Naramio ro simara niramio amadimi-iasouti-ri arua urubia aboto iopiauti ri. Ibose abeamio ro simara merebusere arua urubia aboto amadimi-iasouti-ri iopiauti ri. Merebusere ro mamio abeamio ubauba mino to amadimi-iworohuti-ri, ina neio ro arua urubia aboto amadimi-iasouti-ri iopiauti ri.

²² Nio sirio urubia ro amadimi-ihoio-ri, mabu nio ro mo nowasoro-dumo. Kimibiria to koko se etio ro iwotoi-dumo, womu tato neio pamo namadimi-iauri-ri, womu tato womu tato keremiro neio ro amadimi-iwia-ri.

²³ Ata sabowa to kou ato ina nio iedi sabowa urubia ro ubauba namadimi-iwaititi-ri, iedi sabowa ro emedio mamó, ata sabowa to aise gi-orowadau-ri. Nio mo ro morobise owerá nama-imowapotai-ri, nio ro Isiraere duriomoro ato sirio sabowa kiraturio to iporeai-ri pua, urubia mea owerá kimowauti aboto, Imese Urubia Kiauri Dubu nedi sopu duriomoro ro nato amadi-orowameai-ri.

²⁴ Sikuru mere nou auna pua, kitamudiro dubu auna ie. Ibose sowake koroho dubu nou auna pua. Eputa dubu auna ie.

²⁵ Nedi sikuru mere ro nou kitamudiro dubu sosoro kararapoi aboto, io nou modobo ie. Ibose sowake koroho dubu ro nou eputa dubu sosoro kararapoi aboto modobo ie. Mo moto abera sosoro ie, ina mo neio ro ubauba urío eputa dubu Beresebu neito nasoro-dumo. Ina noudo ie nio neio ro ubauba masiro to auna se amadimi-iasoro-ri, mabu nio mo moto urubia ie.

²⁶ Ina noudo ie nio masiro etio ro

namadimi-imatubuti-ri, ibose ubauba tanaro nio aboto namadimi-isioidiro-ri, nedi urubia ro nio ro tere imati mamō. Abora urubia ro piro se beda tanaro isioidiro-dumo, neio Godi ro paea se amadi-iwapotaidiro-ri. Piro se beda tanaro isioidiro-dumo, neio Godi ro paea se amadi-iwapotaidiro-ri.

²⁷ Nio mo ro duwo ato beda owerā nimowauti, saiki ato urubia sirio ba-dimowapotaidiro-mo. Nio mo ro nakara moro ato beda owerā nimowauti, sabowa gebari ato ba-dobodorouti-mo.

²⁸ Sōpu duriomoro durupi etio ro iopiauti-dumo, neio tere imati mamō. Nio durupi etio ro imowagarewado-dumo, ido nio urio neio ro kiopiauti modobo pua. Kaupoti nio ro modobo ie Godi tere kemati, mabu nou kaupoti abato owamo pupuwo korosa nio keremiro nou ro imowagarewado ri, ina nio urio durupi mutu era paruo to nou ro kihere aboto.

²⁹ Morobise ie, netewa teibo pisiwi kainai teibo awawo mani to kimade pua. Kainai ia mani iōpu to kimidai-ma ie. Nedi pisiwi kainakaina ro Godi ro mea ia mino to imowotoititi-die, neitiro nou ro woki kimati-ma modobo pua. Kaupoti nio Abera Godi ro gabo kadodorai tato, ata pisiwi ata karaburai modobo pua.

³⁰ Ina nio ia sapuwo to, nio Godi ro auna se timaragoidirotiti-die, nio eputa ato beda mutu sobo muruwa ro irowotoititi, neio momuo se nou ro ta-giōputi.

³¹ Ina noudo ie nio tere na ie, nio pisiwi kainakaina sosoro pua. Godi auna se nio aboto

irarowotiti-die.'

Iesu kowauti ato siripo eremati mamu

³² 'Ina noudo ie nio mo ro nedi oweru ro nou mimowapotai-ro, urubia sirio aboto etio ro namadimo-owauti-ri ibo, "Mo Iesu kowasoro dubu e," nedi urubia ro mo ro ibose to anama-iwauti-ri mo edi Abera ro Adiri sabowa ato na-omidiro-die nou aboto ibo, "Nedi urubia ro mo ia urubia ie."

³³ Kaupoti beda urubia sirio aboto etio ro namadimo-owauti-ri ibo, "Nimo Iesu kowasoro urubia pua," nedi urubia ro wisana mo ro ibose to nama-iwauti-ri mo edi Abera ro Adiri sabowa ato na-omidiro-die nou aboto ibo, "Nedi urubia ro mo urubia pua." '

Iesu kobodoro ato, erere wisa mutu e

³⁴ 'Mo nedi duriomoro ro neito na-nou-ro nio ibo gimaragoidiro-mo mo ro miro kowou. E e, urubia aboto mo ro miro owou pua, kororohoio nimowou-ro ina neio ihoduti rie.

³⁵ Ina noudo ie mere ro simara abera masawe ama-owea-ri, besere ro simara mamu masawe ama-owea-ri. Ibose eterera ro simara daramuabere masawe ama-owea-ri.

³⁶ Urubia dubu boinana masawe muso moro dubu ro owea-ri pua. Nou simara ia karima borubi ro amadimo-owea-ri masawe.

³⁷ Etio ra simara mamio abeamio aboto auna se na-imaragoidiro-dumo, ina mo aboto auna se kimaragoidiro tato, idaibo urubia modobo pua mo kowasoro urubia to kararasoro. Ibose etio ra simara merebusere aboto auna ia se na-imaragoidiro-dumo, ina mo aboto egea mere se na-imaragoidiro-dumo, idaibo urubia modobo pua mo kowasoro urubia to kararasoro.

³⁸ Etio ra simara ubi tanaro isioidiro-dumo, ina Godi ubi tanaro se kisioidiro tato, idaibo sosoro urubia modobo pua mo kowasoro urubia to kararasoro.

³⁹ Etio ra simara keremiro na-eremaragoidiro-dumo, iedi keremiro ro saiki ata amadimi-iasopere-ri. Etio ra simara keremiro namadimi-iasepere-ri mo sapuwo to, nedi urubia ro saiki ata womu tato womu tato keremiro amadimi-imade-ri.

⁴⁰ Nio beda urubia ro kiwodouti ra moto to, ibo pua nio kawakawa kiwodouti, neio ro idaibo mo kowodoro ie. Ibose mo etio ro kowodoro ra, ibo pua neio ro mo kawakawa se kowodoro, mo neito etu ro nemeiriai-ro Godi neio ro ibose nou kowodoro ie.

⁴¹ Ibose Godi ipusu oweru urubia etio ro kiwodouti ra, mabu nedi urubia ro Godi ipusu oweru imowautiti-dumo, neio atu se Godi ipusu oweru urubia mutu Godi ro atu sosoro wisa ibose to ama-imio-ri. Ina ibose mea tuputupu urubia etio ro kiwodouti ra, mabu nedi urubia ro meamea tuputupu urubia ie, neio atu se meamea tuputupu urubia mutu Godi ro atu sosoro wisa ibose to ama-imio-ri.

⁴² Mo edi kowasoro urubia ro neio aboto egea mere se kiwarebai kainai etu ro kaiwai ra, mabu neio mo kowasoro urubia ie, nio mo ro morobise oweru mimowapotai-ro, morobise ie nedi urubia ro neio ro mea wisa amadimi-imade-ri.'

11

Iesu ro urubia Ioane sapuwo to gimowauti

¹ Iesu ro nedi 12 kowasoro urubia ro totomu kimowauti na-goporeai, taie iedi moro ro nou ro

aise gemeserai-ro. Nou ioudo gou-ro Gariri duriomoro to urubia simara sabowa to na-gorowomidiro neio Godi oweri itamudiro rie ibose imowauti rie.

² Iedi tau ro Ioane dibura abato gomidiro, nou ro oweri nato girorowai ibo, Godi ro kohodowa dubu nou ro pupuwo korosa tanaro tisioidiro. Taie Ioane ro simara kowasoro urubia nato gimeriai-ro Iesu aboto,

³ nedi kemodowa oweri ro nou mutu ibo, 'Godi ipusu oweri urubia ro edi kohodowa dubu ro owautiti-mo nimo aboto ou ri, oro nou se ra? O ata dubu emotoi-ri ra?'

⁴ Neio Iesu ro ibo gimowameai, 'Ba-dorowameai-mo, Ioane nio ro ba-demowapotai-mo, mo ro edi pupuwo korosa tanaro ro na-nisioidiro, nio ro simara idomari to tiauri-dumo.

⁵ Abora idomari pogo urubia mo ro meana na-niwaititi neio idomari mea se tirarowo-dumo. Sairo ubauba urubia abora mea se toroho-dumo. Katio ikoni urubia abora neio katio tato ie. Gare tato urubia abora neio oweri tirowidiro-dumo. Pamo urubia abora neio pamo rido torowame-dumo. Ibose mea oweri Godi sapuwo to imese torobodorouti namabu tato urubia aboto.

⁶ Etio ra mo edi kimibiria gabo ro neido karagarewado tato, neio Godi ro korosa ama-imio-ri.'

⁷ Ioane kowasoro urubia ro Iesu na-gemeserai-rimo, taie nou auna topira aboto aise gerewesegerai. Neio nou ro oweri Ioane sapuwo to nato gimowauti. Nou ro ibo, 'Nio goto se duriomoro to na-iredutiti-mo etu iaurititi-mo?'

Nio ro gurigo daimo nou a-wiaurititi-mo ra gawia ro na-iwadudumawadotiti? E e.

⁸ Ina urubia dubu meamea namabu to keremeduti nou iauri ri a-iredutiti-mo ra? Ma-dimaragoidiro-mo. Etio ra meamea namabu to keremeduti, nedi urubia ro eputa urubia edi meamea moto ro nato irowomidiroiti.

⁹ Ina nio beda dubu iauri ri iredutiti-mo? Godi ipusu oweru dubu iauri ri ra? Nio mo ro oweru ibo mimowapotai-ro, Io morobise ie, Ioane nou Godi ipusu oweru dubu sekere ie. Kaupoti nou edi masiro ro ohu ia to owamo-die. Godi ipusu oweru urubia sirio, neio masiro nou sopo ato iamo-die.

¹⁰ Nedi dubu ro Ioane nou sapuwo to oweru kebase Tarena Buka ato ta-gowapotai-rimo ibo, *Mo ro keba moro to oweru sowake dubu anama-emeiriai-ri. Nedi dubu ro oro gabo nou ro ama-emaipo-ri.'*

¹¹ Iesu ro ina ata oweru neio aboto iato gowapotai, 'Nio mo ro morobise oweru mimowapotai-ro. Ioane obo to kiwarumiauti dubu nou auna ia dubu e Godi sosoro gabo ato, imese urubia nou ro sopo to iaurititi. Kaupoti etio ra Godi edi kiwabo maumo ro nato na-orowomidiro, nedi urubia ro masiro kainakaina na-irobidiro-dumo, Ioane neio ro sopo to iauri-dumo.

¹² Ioane obo to kiwarumiauti dubu oweru kimowauti beda tau ato na-gatamuai womu tato abora, Godi ro kiwabo tanaro ro imese pupuwo ia to aimowado-die. Pupuwo urubia edi tau ro nato pupuwo iasibowado-dumo Godi edi kiwabo maumo ro neito kodoro aboto.

¹³ Keba ia se, Mose edi sabi sirio ro, Godi ipusu oweru urubia sirio mutu, neio Godi ipusu oweru ta-imowautiti-rimo, womu tato Ioane ti-gorowapotai-ro.

¹⁴ Oweru Tarena Buka ato iamo ibo Eraia kebase tanaro pupuwo mutu beda sosoro isioidirotiti, ido ata dubu nou sosoro amadi-ou-ri. Nio mo ro a-nimowapotai ibo nedi dubu ro Ioane nouse ie, tanaro Eraia sosoro pupuwo mutu tisioidiro. Nedi oweru ro nio ro ubi to amadimo-omidai-ri ra?

¹⁵ Etio ra mo oweru modobo ato kirowidiro aboto, neio ro mo oweru gare se ba-memedeia-rimo.

¹⁶ Abora nedi urubia ro na-orowomidiro, neio mo ro etio mutu nama-idobowa-ri, neio abora edi muro to na-orowomidiro? Neio merebusere kainakaina sosoro ie goto didiri ato orowiro-dumo garara oweru iaro-dumo, borubi merebusere kainakaina aboto iaiauti-dumo.

¹⁷ “Nio nimo ro gama ra pate ra egea se kimado ato, kaupoti nio nato aise orowamaro-ri pua. Nimo idobi gido to egea se kiroto ie, kaupoti nio idobi nato aise iemai-ri pua.”

¹⁸ Ina abora ma-diauri-mo, nedi atu sosoro tanaro ro neio ro ororosiodiro-dumo. Ioane obo to edi dubu ro iwarumiauti, nou ro Godi woko kemesiodiro edi tau ato gatamuai, nou ro koko obo idiotiti pua, ibose ohona ta-iraiautiti. Kaupoti Ioane sapuwo to urubia ro karasaubuti oweru iarotiti-dumo ibo, “Ioane ubauba urio ro oworohutiti.”

¹⁹ Ibose Imese Urubia Kiauri Dubu neito na-gou-ro nou urubia mutu ihotiti, ibose waini obo egea mere se imusubutiti. Kaupoti nedi

dubu ro neio ro nou sapuwo to bagea karasaubuti ower a iarotiti-dumo ibo, “Nedi dubu ro ma-diauri-mo, auna sogoi dubu e, auna kidio dubu e. Nou auna se idabutiti takesi kimade urubia mutu, ibose arua ubauba urubia mutu.”

Kaupoti Godi edi muro ro etio ro ibodoro-dumo, neio ro kiwawuti ie ibo morobise muro nou se ie.’

Kimibiria tato sabowa urubia, ubauba neio abato amadimo-ororosioi-ro

²⁰ Iesu ro pupuwo korosa tanaro sirio edi sabowa ato na-gisioi-ro, iedi urubia ro simara ubauba aboudo erewesegerai pua. Ina noudo ie Iesu ro neio nato gimaiauti ibo,

²¹ ‘Korasini sabowa urubia, nio ro saiki ata auna ubauba amadimo-owea-ri. Ibose Betesaida sabowa urubia, nio iasoperai-ri pua, nio ro ibose auna ubauba amadimo-owea-ri. Nitiro atu se ubauba emosio-do. Mabu kebase mo ro pupuwo korosa tanaro nio sabowa teibo ato egea se nisioidirotiti, mo ro Taia ra Sidoni ra sabowa teibo ato kisioidiro rasiri ie, nedi Godi umoro tato urubia ro ubauba aboudo keba ia se ba-gerewesegerai-rimo. Neio ro kerekere koropukoropu obotama ba-giroiti-rimo, ina durupi panese to ba-gorowoititi-rimo. Neio ro nedi tanaro ro paease nou ba-gowawea-rimo ibo, “Nimo ubauba aboudo ta-nerewesegerai-dumo.”

²² Ina noudo ie nio mo ro sirio se a-nimowapotai, Korasini urubia Betesaida urubia mutu, saiki ata nio ro auna ubauba wisa amadimi-imidai-ri. Auna koto tau nama-orobai-ri, Taia ra Sidoni ra ro neitiro ro

beda sosoro auna ubauba isioidirotiti-do, iedi ubauba wisa ro neio ro kainai mere se amadimi-imidai-ri. Kaupoti Korasini urubia Betesaida mutu, neio ro saiki ata auna ia ubauba wisa amadimi-imidai-ri.

²³ Ina nio Kapeniamasabowa urubia, nio ibo a-imaragoidiro-dumo ra nio Godi ro Adiri sabowa to ama-iwou-ri, auna masiro imade ri? Marasio! Nio era paruo maumo to ama-ioubiri-ri. Iedi pupuwo korosa tanaro ro nio abato na-nisioidirotiti, Sodom sabowa ato kisioidiro rasiri ie, iedi sabowa ro Godi ro ubauba owai-ri pua, abora a-sowamo.

²⁴ Kaupoti nio mo ro ibo mimowapotai-ro, koto tau ato Sodom sabowa urubia ubauba wisa egea mere se amadimi-imidai-ri. Kaupoti Kapeniamasabowa urubia, auna ubauba wisa nio ro amadi-imidai-ri.'

Mo aboto dou-rimo nio toutou kiwai sapuwo to

²⁵ Iedi tau ro nato Iesu ro urubia owera kimowauti na-goporeai, taie nou Godi aboto iato gararatoro. Nou kararatoro owera ibo garo, 'Abera, goto, toboro imese namabu sirio mutu, oro do ie. Oro mo ro a-nemowabu mabu oro edi mea umoro ro urubia aboudo ta-giwopirowa. Kaupoti nedi mea umoro ro oro ro keremowabu tato urubia aboto giwapotai-ro, neio merebusere kainakaina sosoro irowomidirotiti.

²⁶ Io Abera, awawo umoro urubia, ibose muro urubia aboudo, oro ro na-giwopirowa nedi tanaro ro, oro ubi ato gororosioidiro-rimo.

²⁷ Imese pupuwo ia korosa mo abera ro nemapoi-ro. Urubia ro umoro oi pua mere, Abera nakara umoro ie mo, nou mere ie. Ibose

urubia ro Abera umoro pua, mo nou mere ie mo nakara umoro ie nou. Ibose beda urubia ra nou mere, mo ro na-nirapoi-ro Abera owawuti ri neio aboto, neio atu se umoro ie mo edi abera ro.

²⁸ Nio etio ra durupi aise na-ipuse, ibose nio sirio mibo na-iratidiro-dumo, nio dou-rimo, mo abato se dimibiria-mo, ina nio toutou anama-iwai-ri.

²⁹ Mo aboudo ba-dirarebai-rimo, ibose mo aboudo ba-daratamudiro-rimo. Nio mo ro imudo-ri pua. Mo urubia ubauba mino to kiworohuti pua, mea mino to niworohutiti, ata keremowabu tato ie. Nedi muro kiwabo ro nou maumo ato, nio niro turi ato toutou keremiro amadimi-iauri-ri.

³⁰ Mabou mo edi kitamudiro ro koko pua. Ibose mo edi woko ro na-iamo nio ro kisioidiro aboto, nio aboudo koko se iamou-ri pua.'

12

Iesu Iu urubia komidiro saiki eputa dubu e

¹ Iesu ata Iu urubia komidiro saiki ato woiti pari turi ato nato goroho. Gabo bara ato edi woiti ro gorowotoi nou kowasoro urubia ro sipu tato woiti iopu nato gidoho-rimo. Neio ro woiti takamai na-giamututi-rimo iato giho-rimo.

² Kowasoro urubia ro edi tanaro ro na-gisioidiro-rimo, neio Parasi urubia ro ta-giwia-rimo, taie neio owera nato gowotobowa-rimo. 'Iesu, oro owera neito ma-dirorowai-ro! Oro edi kowasoro urubia ro woiti iopu na-idoho-dumo, Iu urubia komidiro saiki sabi ta-esebea-mo.'

³ Ina nedi Parasi urubia ro Iesu ro ibo gimowameai, 'Tarena Buka edi oweru ro na-iamo Deibidi sapuwo to nou sogoi ro edi tau ato gorobai, nio ro keremoputi pua ra? Deibidi edi urubia mutu goroho neio ibose sogoi ro giwati.

⁴ Ina noudo ie Deibidi aise godoro Godi edi tarena parai moto ro neito. Iedi ohona ro giamo iedi parai moto goro ro nato imese tarena ia ie, Godi aboto giaiwai-rimo. Iedi ohona ro modobo pua dorogora se urubia ro kiho. Kaupoti Deibidi edi urubia mutu goroho, iedi ohona ro neio ro sogoi ato aise giho-rimo. Sabi sekere ie dorogora se urubia ro kiho modobo pua. Godi ra urubia ra turi urubia neio ro kiho ie.

⁵ Ina ibose nio ro Mose edi sabi oweru sirio ro neido na-eremoputi-dumo, ata oweru nio ro koweia pua ra? Ibo na-iamo Godi ra urubia (ra) turituri urubia komidiro saiki ato woko aise isioidiro-titi-dumo. Sabi neio ro isebo-dumo sekere woko komidiro saiki ato na-isioidiro-dumo, kaupoti neio ro ubauba tanaro isioidiro pua.

⁶ Nio mo ro ibo mimowapotai-ro, ata dubu nedi duriomoro ro nato toroho, nou auna ia dubu nouse ie, io mo ie. Godi edi Tarena Moto ro auna nakomu pua, ibo pua mo sosoro.

⁷ Godi oweru kebase ta-gowapotai-ro ibo, *Mo ubi ie nio ro arua urubia nirimagare kimowaititi. Mo ro auna se imaragoidiro pua kimatowo namabu aboto.* Nedi oweru ro nou demaragoidiro-mo. Nio ro nedi oweru ro maumo mea se umoro koi rasiri ie, nio ro mo edi urubia ro didi mabu ato ubauba tanaro

kisioidiro urubia to iasoro-ri pua.

⁸ Mabu Imese Urubia Kiauri Dubu mo nouse ie, ina mo komidiro saiki eputa dubu e.'

⁹ Taie Iesu ro iedi moro ro na-gemeserai, nou neio karadabu moto to aise godoro.

¹⁰ Iedi moto ro nato ata tu karawia dubu iato gomidiro nou ito kebase godoro. Iedi Parasi urubia ro Iesu neio ro idomari to gemaipirio-rimo, mabu neio gabo giosora-rimo Iesu koto aboto owou ri, taie nou neio ro nato emowapotai rie ibo, 'Oro ro sabi ta-wesebea.' Taie neio ro Iesu nato gemodowa-rimo, 'Nimo komidiro saiki ato temeteme dubu meana kowai sabi ra?'

¹¹ Neio Iesu ro ibo gimowameai, 'Nio ata, sipisipi komidiro saiki ato bobo to na-erematai, idomari to kiauri ra o keihai ra?'

¹² Urubia mere auna nakomu e, sipisipi dorogora se nakomu e, urubia dubu sosoro pua. Ina noudo ie mea kiwarebai tanaro kisioidiro ato nimo lu urubia komidiro saiki ato, io ata sabi tato ie.'

¹³ Taie Iesu iedi tu karawia dubu ro nou aboto nato gutura ibo, 'Tu demotuturai!' Iedi dubu ro oweri kirorowai kaupoti ie tu aise gotuturai. Iedi kotuturai na-gotuturai iedi tu ro meana aise goi. Ata meana tu beda mino to gowamo, idaibo sosoro ta-goi.

¹⁴ Iedi tanaro ro Iesu ro na-gosioidiro, Parasi urubia ro na-gowea-rimo, neio serawo aise goi-rimo. Ioudo aise gosuruwo-rimo, taie Iesu kopia sapuwo to gabo iato gemosora-rimo.

Godi ro edi dubu ro na-gohodowa nou sowake kemoworohuti aboto Iesu nou se ie

¹⁵ Iesu ro Parasi urubia kimaragoidiro ta-gimowea, taie iedi moro ro nou ro aise gemeserai-ro imese gou ata moro to. Iedi moro ro nou ro edi tau ato gemeserai, nou urubia sirio ro na-gowea-rimo, saro rido aise gobodoro-rimo. Ibose erere temeteme urubia neio abato na-gorowomidiro, neio Iesu ro meana aise giwaititi.

¹⁶ Neio Iesu ro meana edi tau ato giwaititi, neio nou ro koko owera nato gimio ibo, 'Mo sapuwo to nio ro owera obodorouti ate!'

¹⁷ Kibase Godi ipusu owera dubu Aisaia ro edi owera ro na-gisioidiro Tarena Buka ato, tanaro morobise to noti gororosioidiro-dumo. Aisaia ro keba ia se idaibo owera ta-gimowauti,

¹⁸ *Godi ro ibo, Neito ma-dirarowea-rimo! Nedi dubu ro nou nohodowa mo sowake dubu to ararasoro ri. Nedi dubu ro nou auna nirimagare nematiti-die, mo auna kamade ie nou aboto. Mo Urio nou abato omidiro ri anama-emeiriai-ri. Ibose urubia nou ro paea se ama-imowauti-ri ibo, mo edi tuputupu gabo ro erere urubia sirio sapuwo to ie, erere duriomoro ato na-irowomidiro.*

¹⁹ Urubia nou ro imaruti-ri pua, urubia nou ro imaiauti-ri pua. Nou owera kodu urubia dubu patu moro ato emororowai-ri pua.

²⁰ *Etio ra mibo maumo ato nitonito se na-irowomidiro-titi, neio nou ro huru imowou-ri pua. Etio ra arua urubia ro ubauba mino to na-iworohuti-dumo, mo edi sowake dubu ro neio nou ro ubauba iwaititi-ri pua. Neio nou ro mea mino to ama-iwarebai-ri. Nedi dubu ro nou ro iedi tanaro sirio ro ama-isioidiro-ri Godi edi mea*

tuputupu gabo ro nato, womu tato nou ro ubauba tanaro sirio kiwororuwo.

²¹ Taie nedi sowake dubu ro erere urubia ro erere duriomoro ato na-orowomidiro auna se nato amadime-emowabu-ri ibo, Nou ro urubia edi oweru to gimowauti aise noto ororosioidiro-dumo.

Iesu edi pupuwo korosa ro Tarena Urio aboudo ie Satani aboudo pua

²² Arua urubia ro ata dubu Iesu aboto nato gowou-rimo. Iedi dubu ro nou niro turi ato ubauba urio ro imidirotiti. Ibose nou idomari teibo pogo nou ro gemowai, ina nou oweru iarotiti pua. Taie Iesu ro edi ubauba urio ro nou aboudo nato gemabodorai. Iedi kemabodorai na-gemabodorai, nou idomari teibo meana aise goi-rido. Ibose nou oweru nato mea se aise gutura.

²³ Iedi topira ro gorobu neio ro iedi pogo dubu ro na-gowea-rimo, neio kimaragoidiro ro giopia. Neio ro ibo, 'Etu umoro ra nedi dubu ro Deibidi nasa ie, Godi ro kohodowa dubu e.'

²⁴ Parasi urubia nedi oweru ro na-girorowai-rimo, neio ro ibo, 'Nedi dubu ro edi pupuwo korosa ro Beresebu aboudo ie, nou ubauba urio eputa dubu e, urubia aboudo Iesu ro ubauba urio neito imabodoidiro.'

²⁵ Kaupoti neio edi maumo kimaragoidiro ro Iesu ro kebase ta-gimowea. Taie neio nedi oweru ro neito gimowapotai, 'Kaupoti duriomoro urubia na-orowomidiro ina boso nato na-eremede-dumo, iedi duriomoro ro nato urubia aise korohodowa ie, urubia tato moro to kararapoi ie. Ibose kaupoti sabowa urubia o

kaupoti moto urubia na-warado-dumo, neio iedi moro ro iato orowomidiro-ri pua.

²⁶ Satani nou simara ubauba urio urubia aboudo kimabodoidiro ato, nou edi kiwaboi tanaro ro nato nou simara ubauba urio mutu ubauba nakara se korowai ie. Idaibo tanaro kororosoidiro ato, Satani edi kiwaboi tanaro ro aise owamo-ri pua.

²⁷ Ina nio ibo na-warado-dumo mo ro ubauba urio na-nimabodoidiro mo pupuwo korosa Beresebu ro nomia-ro. Kaupoti mo ro Beresebu edi pupuwo korosa ro ubauba urio neito kimabodoidiro rasiri ie, ina nio edi urubia ro ubauba urio urubia aboudo etu pupuwo korosa to imabodoidiro-dumo? Ina noudo ie nio simara woko urubia ro tiwapotaidiro-dumo ibo nio edi owera ro iaro-dumo Beresebu sapuwo to, imese karasaubuti owera iaro-dumo.

²⁸ Mo ro ibo pua ubauba urio sirio Beresebu pupuwo korosa to kimabodoidiro. Mo edi pupuwo korosa ro Godi edi Tarena Urio ro nou aboudo outiti-die, ubauba urio urubia aboudo neito nimabodoidiro-titi. Ina noudo ie mo ro urio kimabodoidiro tanaro nou ro owapotaidiro-die ibo, Godi edi kiwaboi tanaro ro nio aboto neito aupise ta-gosiomai-die.

²⁹ Ina ata muro rido kiauri ato, morobise ie ata dubu ata modobo pua pupuwo dubu moto to kodoro, namabu kiwagarewado aboto. Tauo kebase modobo ie moto dubu kodoro dubu ro mea se kemotohiti, taie namabu sirio nou moto rido nato kiwosuwoduti ie.

³⁰ Etio ra mo mutu woko atu se kisiodiro tato, nedi urubia ro mo woko ubauba neio ro nemowaititi-dumo. Beda urubia ra mo mutu

kidabuti tato Godi edi kiwaboi maumo ro nato, io urubia neio ro iburutawado-dumo.

³¹⁻³² Ina noudo ie nio mo ro ibo mimowapotai-ro! Ubauba tanaro sirio, urubia ro kisioidiro ato, ibose urubia ubauba owera to na-irematebuti-dumo, mo Imese Urubia Kiauri Dubu owera to ubauba na-owaititi-dumo, neio edi ubauba ro Godi ro kimatopeamuti gabo modobo ato owamo-die. Kaupoti ata dubu ata ro Tarena Urío masiro ubauba na-owaititi, iedi dubu ro ubauba Godi ro kematopeamuti gabo tato ie. Iedi ubauba ro nou abato womu tato womu tato aise ama-owamotiti-ri.'

Ota simara iopu mutu nou totomu e

³³ Iesu ro ina ibo, 'Ata mea ota kotoi ato, nou ibose meamea iopu mutu e. Ina ata ubauba ota kotoi ato, nou ibose ubauba iopu mutu e. Nio umoro ota iopu ro kiwai ie ibo nedi ota iopu ro beda sosoro ota rido araubo-dioumo.

³⁴ Parasi urubia, nio imese pamo bagawe sosoro ie, ubauba tanaro kisioidiro nio abato auna ia se iamotiti. Nio matagoro rido meamea owera kisuwoduti modobo pua. Mabú urubia niro turi ato beda nakomu ro kiamo ra, matagoro rido neio ro kisuwoduti ie.

³⁵ Mea dubu aboudo meamea nakomu ro kisuwoduti ie, nou niro turi ato keba se na-gararemuti-rimo. Ina ubauba dubu aboudo ubauba nakomu ro kisuwoduti ie, nou niro turi ato kebase na-gararemuti-rimo.

³⁶ Kaupoti nio mo ro ibo mimowapotai-ro auna koto saiki tou-die, sirio urubia koto abato Godi ro ama-imodoruti-ri. Neio matagoro rido

kimaragoidiro tato owera na-gosuwoduti-rimo, neio koto nou sapuwo to ama-iwai-ri.

³⁷ Mabu nio simara matagoro ro amadimi-iwapotaidiro-ri. Ina noudo ie arua urubia ro erere owera na-iarotiti-mo, nio Godi ro nedi owera sirio ro nouto ama-ihoduti-ri. Meamea owera karo urubia aboto nou ro ama-utura-ri ibo, “Nio tuputupu urubia ie mo sosoro gabo ato na-orowotoi.” Ina ibose ubauba owera karo urubia aboto nou ro ama-utura-ri ibo, “Nio ubauba urubia ie mo sosoro gabo ato na-orowotoi, ubauba wisa nio anama-imio-ri.” ’

Amia Parasi urubia ro Iesu a-gowaibia-rimo

³⁸ Amia Parasi urubia, Mose sabi kitamudiro urubia mutu, Iesu aboto nato gutura-rimo ibo, ‘Kitamudiro dubu, pupuwo korosa tanaro ata nimo ro kiauri sapuwo to ma-dosoidiro. Ina nimo umoro nato anamadimo-oi-ri ibo oro neito Godi ro gemeiriai-ro.’

³⁹ Neio owera Iesu ro ibo gimowameai, ‘Nio imese ubauba tanaro kisioidiro urubia ie nio abora na-orowomidiro, uramio upi ro mau beda sosoro isebo-dumo, nio ro idaibo tanaro isioidiro-dumo Godi aboto. Nio ro mo a-nemowapotaidiro-dumo ata pupuwo korosa tanaro ata mo ro nio sosoro gabo ato osioidiro-ri. Kaupoti mo ro osioidiro-ri pua nio ro kiauri sapuwo to. Godi edi ipusu owera dubu ro Iona nou abato beda tanaro ro gororosoidiro, io pupuwo korosa tanaro nou se ie nio ro nou amadimo-owea-ri. Ina ata orio pupuwo korosa tanaro ata mo aboudo nio ro owea-ri pua.

⁴⁰ Mabu Iona netewa didi saiki duwo peteibi mutu nakere niro turi ato ta-gorobu. Ina idaibo sosoro ie Imese Urubia Kiauri Dubu netewa didi saiki peteibi duwo peteibi mutu bobo goro ato ibo ama-orobu-ri.

⁴¹ Iedi tau ro nato Niniba urubia amadimi-irirubuwa-ri koto saiki ato, nio abora urubia na-orowomidiro neio ro nato amadimu-utura-ri ibo, “Nio imese ubauba tanaro kisioidiro urubia ie.” Mabu Iona ro keba ia tau ato Godi owera na-gimowauti, edi tau ro nato neio ubauba aboudo aise gerewesegerai-rimo. Ata dubu nato toroho nou Iona sosoro pua, nou auna ia masiro dubu e, nedi dubu ro io mo nouse ie.

⁴² Ibose eputa orobo Siba duriomoro rido na-gou-ro, koto tau ato nio mutu atu se ama-orowotoburio-ri. Nio urubia abora etio ro orowomidiro, nou ro nato ama-imowapotai-ri ibo, “Nio imese ubauba tanaro kisioidiro urubia ie.” Mabu nedi orobo ro muso moro rido gou-ro Soromoni edi muro owera ro nou emerewidiro ri. Kaupoti ata dubu nato toroho nou Soromoni sosoro pua, nou imese auna ia dubu e, io mo nouse ie.’

Ubauba urio ina korowameai

⁴³ Iesu ro urubia nedi totomu ro nou gimowauti. ‘Ubauba urio urubia dubu aboudo kosuruwo ato, nou obo tato moro ato koroho kawa imese koroho ie, orio komidiro moro kosora ie. Mea komidiro moro nou ro kowea tato,

⁴⁴ nou ro kimaragoidiro to kowea ie ibo, “Mo ro edi moto ro na-nemeserai, modobo ie mo ina ito korowameai.” Nou ioudo korowameai ato,

iedi dubu ro mea se komidiro ie. Nou niro turi ato ubauba urio omidiro pua. Iedi dubu ro nou niro turi mea se kemododiai ie. Kaupoti nu simara keremiro Godi aboto aiwai pua.

⁴⁵ Taie iedi ubauba urio ro nou ro borubi ubauba urio iato aise kidabuai ie, neio imese 7 ubauba urio ie. Ibo pua kebase edi ubauba urio ro na-gomidiro nou sosoro, neio imese ubauba ia ie. Taie neio atu se kodoro ato iedi dubu ro nou niro turi to, nou neio ro imese ubauba aise kowai ie. Iedi dubu ro kebase modobo mere ato gomidiro, abora imese ubauba mino to ama-omidiro-ri. Nedi ubauba urubia ro abora na-orowomidiro, neio edi ubauba korowomidiro keremiro ro idaibo sosoro to imese ubauba ia amadimo-oi-ri.'

Iesu morobise mamio niramio etio ra

⁴⁶ Iesu ro edi auna dubu patu ro ower aise gimowautiwado. Nou ro urubia ower aise kimowauti ro na-gimowauti, nou koroto mamu niramio mutu ower aise eremowauti ri nou aboto nato gou-birimo.

⁴⁷ Taie Iesu ata dubu ro nato gemowapotai ibo, 'Oro mamu niramio mutu oro ower aise ri ou-diebingo, neibi moto araradi ato totoi-diebingo.'

⁴⁸ Iedi dubu ro Iesu ro ibo gemowapotai, 'Mo mamu niramio mutu boira?'

⁴⁹ Nou aise gerewesegerai kowasoro urubia aboto, nou ro ibo, 'Daio mo niramio ra mamio ra neio ie.'

⁵⁰ Beda urubia ro isioidiro-dumo mo abera edi ubi tanaro ro Adiri sabowa ato na-omidiro-die, io neio mo niramio ie, mo medamio ie, mo mamio ie.'

13

Erere goto sapuwo to nou totomu e

¹ Iedi atu saiki ro nato Iesu moto rido na-gosuruwo-ro imese godori Gariri obo paruo bara to, taie iato aise gomi.

² Nou urubia sirio ro na-gowea-rimo, neio nou aboto aise garadabuai-rimo. Urubia sirio nou ro na-giwia, nou pe to aise gorora. Iedi urubia sirio ro obo paruo bara ato ibose to gorowotoi,

³ neio nou ro totomu se gitamudiro-ro.

Ata totomu nou gimowauti, nou ro ibo, 'Neito mea se dirowidiro-rimo! Ata tau pari kisioidiro dubu pari to nato gou iopu iheruti ri. Nou ubi ie iedi iopu sirio ro eremapuse ri mea mino to kisuruwo aboto.

⁴ Nou ro ota iopu edi kiheruti na-giheruti arua erehe moro ato gararemuti-rimo. Arua dorogora se gabo bara to gararemuti-rimo, tuturu to owamo pua iato pawa ro giroruwo-ro. Iedi ota iopu ro neio ro aise giwadaudiro-rimo.

⁵ Arua iopu nadi goto ato gararemuti-rimo. Neio kebase mea mino to gosuruwo-rimo, mabu mea goto kere maumo ato egea mere se ta-gowamo.

⁶ Kaupoti neio saiki turi korosa ro na-giwia, neio pupuwo tato ro girobai, puara aise gitemeiriaiwado-rimo. Mabu neio sipi goto maumo to mea mino to imesebeauti pua. Mea goto ohu ato kainai ia se gowamo, maumo ato nadi ro gowamo-ro.

⁷ Ina arua ota iopu ununu ota sere maumo to giretuti, neio ibose ta-gisuruwo-rimo. Kaupoti

neio mea se kisuwoduti aboto, ununu ota sere ro aise giaupotawado-rimo.

⁸ Ina mea goto ato edi na ro gararemuti-rimo mea se neio ro gisuruwo-rimo. Arua ota rido iopu sipu tato se giasesuti-rimo. Arua ota rido sirio mere se giasesuti-rimo. Ina arua ota rido imese sirio ia se giasesuti-rimo.'

⁹ Iesu ro oweru neito gopai, 'Etio ra mo oweru modobo ato kirowidiro aboto, mo oweru gare se ba-memedea-rimo.'

Mabu boira Iesu ro urubia totomu na-itomutiti

¹⁰ Taie nou edi kowasoro urubia ro nato gou-rimo nou aboto emodowa ri. Neio ro ibo, 'Mabu boira urubia oro ro totomu se na-imowautiti?'

¹¹ Iesu ro neio ibo gimowameai, 'Godi ro kiwaboi tanaro edi umoro ro piro se kebase ta-gowamo, nedi umoro ro nio aboto se ta-niaiwai, arua urubia aboto iwapotai pua.

¹² Ina noudo ie nedi morobise umoro ro etio abato iamo, Godi ro ina orio umoro ohu rido neio ia ama-imotomo-ri. Ina nedi umoro ro neio abato imese auna ia se amadimo-oi-ri. Kaupoti etio abato iamo edi kainai umoro ro, neio aboudo Godi ro imese moro to amadi-iwameai-ri.

¹³ Ina noudo ie mo ro urubia totomu se kimowauti. Mo ro edi totomu ro na-nimowauti, neio ro kowea sekere. Kaupoti totomu maumo mea se eibimai-ri pua. Ibose mo edi kitamudiro oweru ro neio ro kirowidiro sekere. Kaupoti neio ro maumo mea se imade-ri pua.

¹⁴ Godi ipusu oweru dubu Aisaia ro oweru kebase na-gowapotai-ro neio sapuwo to, abora

morobise to noto ororosioi diro-dumo. Nou edi ower a ro ibo ie, *Godi ro ibo neio ro morobise ower a kirowi diro sekere, kaupoti maumo neio ro kowe a modobo pua. Neio ro kiwia sekere, kaupoti neio ro mea se keibimo modobo pua.*

¹⁵ *Mabu neio giropu imese akau ta-girimowaititi-rimo. Nedi urubia ro idomari nakara se ta-gorowasiouti-rimo. Ina noudo ie neio ro modobo pua mea ower a kirowi diro aboto. Neio ro mea ower a kirowi diro rasiri ie, nedi urubia ro mo aboto ba-gerewesegerai-rimo. Ina neio edi ubauba ro mo ro nato ba-nimatopeamuti.'*

¹⁶ Iesu ro kowasoro urubia iato gimowapotai, 'Nio ro Godi aboudo meana tiauri-dumo. Mabu sirio tanaro mo ro na-nisioi diro nio ro simara idomari to tiauri-dumo, ibose mo edi kitamudi ro ower a ro nio ro simara gare to tirowi diro-dumo.

¹⁷ Nio mo ro morobise ower a a-nimowapotai, Godi edi ipusu ower a urubia sirio ro, ibose meamea tuputupu urubia kebase etio ro gorowomidi ro, nio ro abora edi tanaro ro na-iauri-dumo mo ro edi pupuwo korosa tanaro ro na-nisioi diro, nedi urubia ro auna ia ubi ta-iamotiti simara ia idomari to kiauri aboto. Kaupoti neio ro iauri pua. Nio ro abora nedi ower a ro na-irowi diro-dumo, neio auna ia ubi ta-iamotiti simara ia gare to irowi diro ri. Kaupoti neio ro irowi diro pua.'

Totomu erere goto kere sapuwo to Iesu ro maumo nou gowawea

¹⁸ 'Ower a neito ma-dirowi diro-rimo! Urubia dubu ro iopu na-giheruti nedi totomu ro maumo nou anama-imowauti-ri.

¹⁹ Beda ota iopu ro gararemuti-rimo gabo bara ato, nou maumo ibo ie. Urubia ro mea owerana-irowidiro-dumo Godi edi kiwaboi tanaro ro nou sapuwo to, neio ro maumo mea se imade pua. Ubauba dubu Satani iato na-wou-die, iedi ota iopu ro neio aboudo aise kiwagarewado ie.

²⁰ Ina beda ota iopu ro gararemuti-rimo nadi goto ato nou maumo ibo ie. Nedi urubia ro Godi edi mea owerana ro kamade mutu kirowidiro sekere.

²¹ Kaupoti iedi mea owerana ro sipi neio abato mea mino to iwodouti-ri pua. Idaibo urubia tuturu tau to iwotoi-ri pua. Mibo sirio neio aboto kou ato, Godi edi mea owerana ro neio ro aise kimeseruti ie.

²² Ina iedi ota iopu ro gararemuti-rimo ununu ota sere abato, nou maumo ibo ie. Nedi urubia ro neio kimibiria urubia ie Godi edi mea owerana ro nato. Kaupoti neio abato siriosirio kimaragoidiro ro kiamo ie, mani aboto kimaragoidiro, namabu aboto kimaragoidiro. Ina nedi mea owerana ro kiroromowado aboudo gabo neio ro kiwasiouti ie. Nedi urubia ro neio maumo ato Godi edi mea owerana ro woko mea se osioidiro-ri pua.

²³ Ina iedi ota iopu ro gararemuti-rimo mea goto ato, maumo ibo ie. Nedi urubia ro mea se neio ro gimidai-rimo. Nedi mea owerana ro neio ro kimibiria ato nou wisa mutu e, neio korowomidiro keremiro maumo ato. Ina neio korowomidiro keremiro maumo ato meamea tanaro se kisioidiro ie. Ina nedi urubia ro neio aboudo Godi ro mea wisa imadetiti. Arua aboudo auna ia se imadetiti, ina arua aboudo egea

mere se imadetiti.'

Totomu ubauba sugamuso sapuwo to

²⁴ Ina ata totomu nou e Iesu ro nou gimowauti. 'Godi ro kiwaboï tanaro idaibo sosoro ie. Urubia dubu ro meamea woiti iopu pari ato nato gibouti.

²⁵ Urubia sirio isana norou girobu, nasa dubu duwo turi ato nato gereredea-ro iedi pari ro neito. Taie ubauba sugamuso iopu egea mere se woiti sosoro ie nou ro aise gibouti, kibouti na-gororoporeai ioudo aise godau-ro.

²⁶ Taie iedi woiti iopu sirio ro pari ato mea se gisuruwo-rimo. Morobise woiti mea se beda sosoro gisuruwo-rimo, ubauba sugamuso ibose to gisuruwo-rimo.

²⁷ Taie iato etou ra, neio pari woko urubia ro na-giwia-rimo, pari abera aboto nato gou-rimo nou umoro owai ri. Neio ro ibo, "Auna dubu, oro ro meamea woiti iopu se a-gibouti ra? Ina ubauba sugamuso na-isuruwo-dumo etu ro gibouti?"

²⁸ Pari abera ro ibo, "Mo umoro ie ata nasa dubu ata ro gibouti."

Ina sowake urubia ro ibo, "Ina oro ubi beda sosoro owamo, ubauba sugamuso nimo ro iaubuti ri ra?"

²⁹ Pari abera ro ibo, "E e nio ro iaubuti ate, ibose to morowotoi, mabu nio ro namadimi-iaubuti-ri, etu umoro ra nio ro woiti kiaubo.

³⁰ Taie marasio, neio atu se ma-misuruwo-mo, womu tato neio awawo namadimo-oi-ri, taie iedi tau ro nato urubia mo ro nato nama-imowapotai-ri iebuti ri. Ubauba

sugamuso kiwoiriamuti, taie era to aise amadimi-ihere-ri. Morobise woiti mo edi ohona kiaremo moto ro neito amadimi-iaremo-ri.” ’

Totomu mirie ota iopu sapuwo to ie

³¹ Kowasoro urubia ina nedi totomu ro nou gimowauti. ‘Godi ro kiwaboī tanaro mirie iopu sosoro ie. Ata tau ata dubu ro nedi iopu ro pari ato nato gobowai.

³² Nedi mirie iopu ro imese kaina ia ie. Imese ota iopu sirio kiauri ato neio gebarigebari ie, kaupoti mirie iopu imese kaina ia ie. Ina nou kororomai ato, atemo nato na-iheruti, ata sosoro kotoi ie. Ina arua ota na-orowotoi pari ato, neio nou ro sopu to kiauri ie, iedi ota ro imese gebari ia ie. Pawa sirio ro nato na-emou-dumo, toto iato aise keremari ie.’

Totomu isiti parawa sapuwo to

³³ Iesu ro ina kowasoro urubia ata totomu nou gimowauti. ‘Godi kiwaboī tanaro isiti parawa sosoro ie. Ata orobo ro parawa isiti mutu na-ebeguouti iedi parawa ro aise kaupai ie.’

Iesu ro totomu se na-itamudiro Tarena Buka owerā morobise to ororosioihiro-dumo

³⁴ Iesu ro edi kitamudiro owerā to urubia sirio na-itamudiroititi, ata kitamudiro mino to itamudiroititi pua, totomu to se itamudiroititi.

³⁵ Nedi tanaro ro nou ro na-gisioihiro, beda owerā gowapotai-ro Godi ro kebase ipusu owerā dubu aboto, morobise to noti gororosioihiro-rimo ibo, *Urubia mo ro kimowauti ato, mo ro neio totomu kimowauti ie. Neio mo ro imese paea se nato nama-imowauti-ri ibo, duriomoro ido to gosioihiro, tau keba ia se*

tanaro piro se iamotiti, ina owerā nedi tanaro ro nou sapuwo to anama-iwapotai-ri.

Totomu ubauba sugamuso sapuwo to Iesu ro maumo nou gimabuti

³⁶ Taie Iesu ro edi soirio ro na-gemeserai, nou edi moto ato gomidiro neito imese godoro. Nou kowasoro urubia ro na-gowea-rimo, nou aboto saro rido imese godoro-rimo. Taie neio ro Iesu nato gemodowa-rimo, 'Oro ro edi totomu ro nimowauti ubauba sugamuso na-gisuruo-rimo nou sapuwo to, maumo oro ro mea se kemabuti modobo ra?'

³⁷ Taie kowasoro urubia nou ro ibo gimowameai, 'Meamea ota iopu edi dubu ro gibouti, mo nouse ie Imese Urubia Kiauri Dubu, mo nowapotaiddiro-die.

³⁸ Pari owapotaiddiro-die sopu duriomoro gebari. Meamea ota iopu iwapotaiddiro-die urubia Godi edi kiwaboi maumo ro nato na-orowotoi. Ubauba sugamuso iwapotaiddiro-die edi urubia ro isioidiro-dumo Satani edi ubi tanaro ro.

³⁹ Nedi nasa dubu ro ubauba sugamuso na-gibouti, Satani nouse ie. Woiti kiwoiriamuti tau iana saiki owapotaiddiro-die. Iedi kiwoiriamuti urubia ro, Godi edi sowake urio sirio ro neio iwapotaiddiro-die.

⁴⁰ Ubauba sugamuso urubia ro beda sosoro iaubo-dumo ina era to na-ihere-dumo, io idaibo sosoro tanaro iana tau ato ibose to amadimo-ororosioiddiro-ri.

⁴¹ Imese Urubia Kiauri Dubu mo nouse ie, womu tau ato mo simara sowake urio sirio duriomoro gabogabo to anama-imerio-ri. Neio

ro morobise woiti amadimi-ihoduti-ri ubauba sugamuso aboudo. Edi urubia ro ubauba tanaro na-isioidiro-dumo, ibose imese beda mutu urubia ro arua urubia ubauba kisioidiro aboto na-iwaboi-dumo, neio mo edi sowake urio sirio ro mo edi duriomoro gebari ro neido neio ro amadimi-iwagare-ri,

⁴² ina neio imese sirio se pupuwo ia era korosa to binio to aise amadimi-itabiti-ri. Womu tato womu tato idobi diano iato ama-ererede-ri, temeteme iamo matagoro karabowa iato amadimo-oroho-ri.

⁴³ Ina meamea tuputupu urubia neio Godi ro woroworo ama-iwai-ri. Saiki sosoro woroworo neio ro amadimi-imewiti-ri, neio edi Abera ro Godi nou edi kiwaboi maumo ro nato. Etio ra mo oweri modobo ato kirowidiro aboto, mo oweri gare se ba-memedea-rimo.'

Totomu auna mani sapuwo to

⁴⁴ 'Godi edi kiwaboi tanaro ro nou auna ia mani namabu sosoro ie, nedi auna mani namabu ro goto maumo ato goropirowa. Taie ata dubu ro nato gowea iedi auna mani namabu ro goto maumo ato, ina nou ro aise gowameai goto maumo to. Iedi dubu ro auna kamade ro gowati kowea sapuwo to. Taie nou ioudo na-gorowameai-ro, nou edi namabu sirio ro nou abato na-giamo mani na ri aise giahodorai. Iedi mani sirio ro nou ro na-gimidai, taie iedi goto kere ro nou ro neito gomidai.'

Totomu auna ia mani nadi sowio sapuwo to

⁴⁵ 'Ibose Godi ro kiwaboi tanaro idaibo sosoro ie, ata besinisi dubu nu neido gou meamea sowio sapuwo to nadi iosora ri.

⁴⁶ Taie nou ro nato gowea auna ia mani nadi, iedi auna ia mani nadi ro ibo pua arua nadi sosoro, nou ata sosoro ia ie. Taie nou ioudo na-gorowameai-ro, nou edi namabu sirio ro nou abato na-giamo mani na ri aise giahodorai. Iedi mani sirio ro nou ro na-gimidai, taie iedi auna ia mani nadi ro nou ro neito gahodorai.'

Totomu neti sapuwo to

⁴⁷ 'Ina ata owera ibo ie, Godi ro kiwaboi tanaro neti sosoro ie. Iedi neti ro oromo damo ato kodobia ato, sirio erere nakere neio ro kodouti ie.

⁴⁸ Iedi neti kidimai ato, erere nakere aise kiahuruwo ie. Meamea nakere atu moro to kiaremo ie. Ubauba nakere aise kihere ie.

⁴⁹ Womu tau nama-orobai-ri, idaibo tanaro neio ro amadimo-ororosioidiro-ri. Godi edi sowake urio sirio ro neio ro ubauba tanaro urubia, meamea tuputupu urubia, ibo amadimi-ihoduti-ri.

⁵⁰ Ubauba tanaro urubia neio ro auna ia korosa era to amadimi-ihere-ri. Neio temeteme idobi iamo iato amadimi-imarotiti-ri.'

Ata pikisa owera ie moto abera sapuwo to

⁵¹ Iesu ro kowasoro urubia nato gimodowa, 'Nio mo ro nedi totomu owera ro na-nimowauti maumo nio ro umoro a-woi-dumo ra?'

Ina neio ro ibo, 'Io.'

⁵² Ina neio Iesu ro ibo gimowameai, 'Ina noudo ie Mose sabi kitamudiro urubia abato, etio ra Godi edi kiwaboi tanaro ro nou sapuwo

to na-garatamudiro-rimo, neio moto abera sosoro ie. Moto abera ro urubia kiwarebai sapuwo to nou ro kiwosuduti ie kiaremo moro rido orio ia meamea namabu tagara ia meamea namabu mutu.'

Iesu Nasareta sabowa urubia ro gebeiouti-rimo

⁵³ Iesu ro urubia totomu kimowauti na-goporeai, taie iedi moro ro nou ro aise gemeserai,

⁵⁴ imese gidiai simara kororomai sabowa to. Nou edi tau ato gorowateai nou ro urubia sirio Iu urubia karadabu moto ato iato gitamudiro. Urubia sirio ro nou owera na-gemerewidiro-rimo, neio kimaragoidiro ro giopia mabu nou kitamudiro ata sosoro ie. Neio ro ibo, 'Nedi dubu ro pupuwo tanaro na-isioidiro korosa muro mutu boido gowai?

⁵⁵ Marasio, nou moto keremari dubu nou mere ie, Maria ro goroto. Nou niramio mutu e, Iemisi, Iosepa, Iudasi daro Saimoni.

⁵⁶ Ibose nedi sabowa ro nato nou medamio mutu e. Nou ro idaibo pupuwo korosa, muro mutu boido gowai?'

⁵⁷ Nedi urubia ro ubi tato goi-rimo nou sapuwo to kimibiria, ina ioudo nou ri gebeiouti-rimo.

Iesu ro ibo neio aboto, 'Godi ipusu owera urubia erere sabowa to na-irohotiti-mo, sabowa urubia ro neio mea se imaidodorowado-mo. Kaupoti neio simara sabowa urubia ro ibeioutiti-mo.'

⁵⁸ Iesu ro simara sabowa ato sirio pupuwo korosa tanaro isioidiro pua. Mabu iedi urubia ro kimibiria imese kaina ia ie.

14

Obo to kiwarumiauti dubu Ioane na-garia-rimo

¹ Iedi tau ro nato Herodi Gariri eputa dubu to irarasorotiti. Nou ro Iesu sapuwo to owerata-irowidiroititi sekere, kaupoti Iesu nou ro mea se eibimai pua.

² Nou simara woko urubia nato gimowapotai, 'Nedi dubu ro isioidiroititi pupuwo korosa tanaro, Ioane ie obo to kiwarumiauti dubu nouse ie, pamo rido nou ro gorowameai-die. Pupuwo korosa tanaro nou ro noudo isioidiro.'

³⁻⁴ Ioane kebase na-gopia-rimo, nedi tanaro ro na-gororosioioidiro-rimo ibo ie, Herodi ro boso urubia nato gimowapotai Ioane dibura to edea ri. Herodi ro nedi tanaro ro nou ri gosioioidiro mabu nou Ioane ro paea se emowapotaiddiroititi ibo, 'Neama orobo keremiro ato kowasiri sabi ie!' Mabu nou ro simara neama Piripi nou orobo masiro Herodiasi, nou gowasiri. Taie iedi mabu ro noudo ie Herodi ro boso urubia nou ri gimeiriai Ioane orobai ri. Neio ro na-gemotohiti-rimo, taie dibura to aise gibiria-rimo.

⁵ Herodi ubi ie Ioane opia ri, kaupoti nou ro edi urubia iaurititi neio tere imatiti. Mabu nedi urubia ro Ioane neio ro Godi ipusu owerata dubu to asorotiti-mo.

⁶ Taie arua sogomi ta-gororoporeai-rimo iato Herodi koroto saiki ro gowamo, nou soriomu

gosioidi-ro-rimo. Ina Herodiasia edi besere ro nato gomaro, Herodi nou simara woko urubia neio kamade imowai ri. Herodi ro na-giauri nou edi komaro ro, nou auna kamade ro gowati.

⁷ Taie iedi besere ro komaro na-goporeai, Herodi ro owera hodo nou aboudo nato gasaubiai-ro, nou ro ibo, 'Oro etou ubi nakomu ra ma-dapoi-ro, morobise to anama-omia-ri.'

⁸ Iedi besere ro Herodi aise gemesera, koroto mamu aboto nato godoro emowapotai ri. Taie iedi besere ro ubi nakomu Herodi aboto nato gowapotai, nou ro ibo, 'Mo ubi ie Ioane eputa aboto, kipura ato ba-memowia-rimo.'

⁹⁻¹⁰ Herodi ro na-girorowai nou ubi nakomu, nou abato temeteme se gererede. Kaupoti nou ubi tato ie woko urubia sosoro gabo ato edi owera hodo ro na-gasaubiai-ro, nou aboudo kasiai. Taie nou ro ata boso koroho dubu aise gemeiriai dibura moto to Ioane aria ri. Iedi besere ro nou ubi ato Ioane nou ro aise garia,

¹¹ taie Ioane eputa nou ro kipura to aise gowia-ro, iedi besere ro imese gemowou-ro, ina nou ro simara mamu aboto nato gowou-ro.

¹² Ioane kowasoro urubia ro ududu durupi saro to na-girorowai-rimo, taie neio ro na-gowea-rimo, neio ro bobo to aise gedea-rimo. Taie nedi tanaro sirio ro beda sosoro gorosioidiro-rimo, Ioane kowasoro urubia Iesu aboto imese gou-rimo emowauti ri.

Iesu ro auna topira gebari ohona to giwarebai

¹³ Iesu ro nedi owera ro na-girorowai Ioane sapuwo to, iato nou pe se gorobai, obo paruo ata sapuwo to imese gabu urubia tato moro to.

Urubia ro na-girorowai-rimo Iesu kabu owerā, neio sabowa se gimeserai-rimo, sairo gabo gou-rimo Iesu na-gobodoro-rimo.

¹⁴ Iesu obo paruo ata sapuwo to na-gorowateai, nou pe rido na-giraradia, nou ro nato urubia sirio se giwia. Neio nou ro na-giauri, nou abato auna nirimagare kimaragoidiro ro gereredea. Ito etio ro gou-rimo erere temeteme mutu, iedi urubia ro nou ro meana aise giwaititi.

¹⁵ Saiki ta-goriodoi adimo ro gereredea-ro, 12 kowasoro urubia Iesu aboto nato gou-rimo neio ro ibo, 'Nedi moro ro urubia mutu moro pua, saiki ta-woriodoi, urubia aupi sabowa to kitiodorai modobo ra? Neio ohona simara mani iopu to iato ba-merememade-mo.'

¹⁶ Ina neibi Iesu ro ibo gimowameai-bi, 'Ina nibi ro kiwarebai beda ra? Modobo pua neio kimeriai.'

¹⁷ Kowasoro urubia ro, 'Neibi abato 5 dokou koura ro iamo-ibi nakere teibo mutu, taie nouse ie.'

¹⁸ Iesu ro ibo, 'Neito ma-diwou-birimo!'

¹⁹ Taie neibi ro edi ohona kainai ro imese giwou-birimo Iesu aboto. Nou ro urubia sirio iato gimowapotai sugamuso ato orowomititi ri. Nou ro dokou na-gimidai-ro nakere teibo mutu, toboro to se gawota, taie eso owerā iato garo Godi aboto. Nou ro dokou na-gisebuti nakere teibo mutu, kowasoro urubia aboto iato giaiwo, ina neio ro gimoworoho-rimo.

²⁰ Nedi ohona ro neio ro na-giho-rimo, imese modobo ta-go-i-rimo. Neio aboudo edi ohona

mapapati ro na-geremeserai-rimo, kowasoro urubia ro 12 gatere nou giodiawado-rimo.

²¹ Ohona edi urubia ro giho-rimo dubu kawakawa kioputi ato, imese 5,000. Mamio merebusere mutu ioputi pua.

Iesu obo ato gou-ro

²² Ohona kiho na-gororoporeai, Iesu ro kowasoro urubia iato gimowapotai kebase iabu ri obo paruo ata sapuwo to. Taie edi topira gebari ro neio aboto ina aise gorowameai-ro neio simara sabowa to itioduti ri.

²³ Urubia kitioduti saro gabo ato, nou imese gioro podo ohu to, nakara moro ato Abera Godi aboto araratoro ri. Adimo duwoduwo na-goi-ro nou nakara moro ato ibose to gomidiro.

²⁴ Kaupoti iedi tau ro nato kowasoro urubia edi pe to giabu-rimo, duriomoro rudo tau se ta-geremeseruti obo paruo turi damo ia to giabu-birimo. Obo paruo turi ia ato neibi auna gawia ro nato giwaimai-bi ina bukopu gebarigebari aise gireribuwa-rimo. Iedi pe ro nato gosamodorowado.

²⁵ Wisana saiki ohu ato giwou-ro, Iesu saro rido kowasoro urubia aboto obo ato goroho.

²⁶ Nou neibi ro aupise gowea-birimo, tere ri auna iamo nato giaiauti-birimo. Neibi ro Iesu mea se eibimai pua, neibi ro ibo, 'Obodai dubu tou-die!'

²⁷ Kaupoti Iesu ia neibi aboto owera to simara se gorowapotai-ro. Nou ro ibo, 'Nou mo ie, nibi tere na ie.'

²⁸ Pita ro ibo, 'Abera Naramu, oro ia ato, mo daramairiai-ro oro aboto ou ri.'

29 Iesu ro ibo, 'Taie obo ato dou-ro!'

Pita pe rido egenabo giraradia, obo ato imese gou Iesu aboto.

30 Kaupoti Pita ro gawia ra bukopu ra na-giwiia-ma, nou iato tere ro gorobai, obo to kororuwo aise garatamuai. Taie nou tere ri Iesu aboto nato giaia-ro, 'Abera Naramu, mo dapopo-ro!'

31 Iesu tu na-gotuturai-ro, Pita nou ro obo maumo rido aise geihidiro-ro. Iesu ro nou ibo gemowapotai, 'Oro kimibiria imese kainai ia ie! Mabu boira oro kimaragoidiro teibo na-iworohuti-ma mo sapuwo to?'

32 Taie neitiro pe to iedi kiora ro na-giora-rido, iedi gawia gebari ro na-gihuduti-ro bukopu mutu aise geremasiai-rido.

33 Taie pe ato edi urubia ro gorowomidiro Abera Naramu neibi ro iato gemowabu-birimo. 'Morobise ie oro Godi ia mere ie!'

34 Taie neibi obo paruo ata sapuwo to Iesu mutu atu se na-gorowateai-birimo, pe neibi ro Genesareti moro to gairio-birimo.

35 Iedi sabowa urubia ro Iesu neio ro na-geibimai-rimo, neio ro oweri iato gemeirio-rimo arua sabowa urubia aboto. Taie iedi sabowa urubia ro erere temeteme urubia Iesu aboto nato giworoho-rimo.

36 Neio ro Iesu iato gemediawado-rimo temeteme urubia ro nou obotama gare se emowaseidiro ri, neio meana koititi sapuwo to. Taie imese beda mutu urubia ro na-gemowaseidiro-rimo Iesu obotama gare, neio meana aise goititi-rimo.

15

Godi ower auna ia ie nimo nasa totomu sopu to iamo-die

¹ Parasi urubia, Mose sabi kitamudiro urubia mutu, Ierusarema sabowa rido nato giodori-ro Iesu aboto. Neio ro Iesu nato gemodowa-rimo

² nasaio tanaro kibodoro sapuwo to. 'Mabu boira oro kowasoro urubia ro nasaio tanaro kibodoidiro tato? Neio ohona kiho tau ato tu kebase iwiouti-ri pua, ohona kiho kawa kiho ie. Tauo kebase tu kiwiouti ie ohona ido to kiwasomai ie.'

³ Iesu ro neio ibo gimowameai, 'Nio umoro a-iamo ra ibo nio ro nasaio tanaro kisioidiro ato, nio ro Godi edi sabi ro nou isebo-dumo?

⁴ Mabu Godi ro ata morobise sabi nou gowapotai-ro, *Oro simara mamu ra abera ra mea mino ito aise gi-iauri-mari*. Ina ata nou e, *Simara mamu ra abera ra aboto beda dubu ro aro ubauba ower a, iedi dubu ro modobo ie urubia ro kopia*.

⁵ Kaupoti mamio abeamio kiwarebai sapuwo to, ata sosoro ower a to nio ro nouto itamudiro-dumo ibo modobo ie simara mamu ra abera ra aboto ibo kutura, "Ata nakomu mo abato towamo nitiro kiwarebai-ma sapuwo to, kaupoti Godi mo ro ta-nemapoi."

⁶ Kaupoti nio edi kitamudiro ower a ro idaibo sosoro na-itamudiro-dumo, urubia nio ro ibo itamudiro-dumo, "Modobo ie simara mamu ra abera ra kiwarebai-ma tato." Ina noudo ie Godi edi ower a ro nio ro imese ubauba owaititi-dumo. Mabu nio ro nasaio tanaro auna ia se ibodoro-dumo.

⁷ Nio imese auna karatigi urubia ie! Godi ipusu oweru dubu Aisaia buka ato, nio morobise to nou ro giwapotai-ro ibo,

⁸ *Godi ro ibo nedi urubia ro mo kemowabu oweru to iarotiti-dumo, kaupoti neio giropu musomuso ia se iamo-die.*

⁹ *Neio ro ibose mo na-nemowabutiti-dumo, neio irowaguwoidirotiti-dumo. Arua urubia aboto etou sabi itamudirotiti-dumo, mo ro iaremuti pua, urubia ro nakara se giaremuti-rimo.'*

Urubia ubauba beda tanaro ro iwaititi-dumo

¹⁰ Taie iato urubia sirio Iesu ro nato girumai-ro nou aboto aradabuti ri. Nou ro ibo, 'Oweru neito ma-dirowidiro-rimo, nedi oweru ro maumo mea se ba-domidai-mo.

¹¹ Urubia dubu ro matagoro to beda ohona kibiria ra, niro turi edi ohona ro nou ro ubauba owai-ri pua. Kaupoti nou ipusu rido beda oweru ro isuwoduti-dumo nou ubauba nou ro kowai ie.'

¹² Taie kowasoro urubia Iesu aboto nato gosiomai-rimo. Neio ro ibo, 'Nimo oro ro edi oweru to nimowauti Parasi urubia ro ta-irowidiro-mo. Oro umoro a-woi ra ibo neio oro aboto serawo ta-woi-mo?'

¹³ Neio Iesu ro ibo gimowameai, 'Imese beda mutu ota ra mo abera ro kobowai tato, iedi ota ro sipi mutu ama-iahito-ri.

¹⁴ Parasi urubia aboudo aise daragarewado-rimo, neio pogo kiwaboi urubia ie. Ata pogo dubu ro boinana pogo dubu na-owaguwo, neitiro bobo to atu se ibose to kiretei-ma ie.'

¹⁵ Pita ro ibo, 'Nedi totomu ro nimo aboto mea se ma-demabuti-ro.'

¹⁶ Iesu ro neio ibo gimowapotai, 'Nio ibose maumo kimaragoidiro imese timotimo ia se iamotiti.

¹⁷ Nio umoro ra matagoro to beda ohona kibiria ra, niro turi ato erediai-ri pua, durupi rido ina aise kosuruwo ie.

¹⁸ Kaupoti matagoro rido beda owera ro kosuruwo ra, giropu maumo rido kosuruwo ie. Ina nedi tanaro sirio ro urubia dubu ubauba neio ro kowaititi ie.

¹⁹ Mabu erere ubauba tanaro sirio ro urubia dubu niro turi rido karatamuai ie. Idaibo ubauba kimaragoidiro, urubia kiopiauti, duboi mamio o uramio mutu koroho, upo koroho, piro tanaro kisioidiro, koto abato bagea owera keremasaubuti, ubauba owera karo arua urubia sapuwo to.

²⁰ Nedi tanaro sirio ro urubia dubu aboudo na-isuwodutiti-dioumo, nou ubauba neito orowaititi. Tu kiwiouti tato ohona nato na-iho, urubia dubu niro turi ubauba nouto owaititi-ri pua.'

Ata daimodaimo kimibiria orobo auna kimibiria mutu e

²¹ Taie Iesu ro edi duriomoro ro na-gemeserai, nou ata duriomoro to imese garagare, Taia ra Sidoni ra iato giamo-ma.

²² Ata Keineni orobo iato imidirotiti. Iesu nou ro na-gowea nou ioudo giaia-ro, 'Abera Naramu, oro Godi ro kohodowa dubu e, mo natonato demati-ro! Mo besere dese emiri pua, ubauba urio ro ubauba kowaititi.'

²³ Kaupoti edi orobo ro Iesu ro idomari to se giauri, ata owera ata emowameai pua. Taie kowasoro urubia Iesu aboto nato

gorowarario-rimo. Neio ro nou nato gemediawado-rimo iedi orobo ro emowapotai ri simara sabowa to korowameai aboto. 'Neibi nou ro auna iamo mutu nibodoro-ibidie, demowapotai nou neido maragare.'

²⁴ Iesu ro ibo, 'Isiraere urubia sipisipi sosoro ta-gararaseperai-rimo. Mo neio aboto se nemeiriai-ro.'

²⁵ Kaupoti iedi orobo ro kauhio teibo to Iesu sosoro gabo ato aise girimusubua. Nou ro ibo, 'Abera Naramu, mo dowarebai-ro!'

²⁶ Iesu ro nou ibo gemowameai, 'Modobo pua moto merebusere edi ohona ro, daimodaimo ro kiho.'

²⁷ Iesu nou ro ibo gemowameai, 'Naramu Abera, mo umoro ie mo daimodaimo orobo ie, kaupoti merebusere mapapati daimodaimo merebusere ro kiho modobo ie.'

²⁸ Iesu ro iedi orobo ro ibo gemowameai, 'Urubia orobo, oro edi kimibiria ro mo abato imese auna ia ie. Oro edi ubi tanaro ro morobise to amadimo-ororosioidiro-ri.' Taie iedi atu tau ro nato nou besere meana aise goi.

Iesu ro urubia sirio meana giwaititi

²⁹ Iesu ro Taia ra Sidoni ra sabowa teibo na-gimeserai-ma, nou aise gohau-ro Gariri obo paruo bara to. Nou podo ohu mea moro to na-gioro, iato aise gomi.

³⁰ Taie sirio urubia nou aboto aise gou-rimo. Neio ro Iesu aboto sairo ubauba urubia nato giwou-rimo, idomari pogo urubia, tu ra sairo ra karawiauti urubia, oweru karo tato urubia, ibose erere temeteme urubia Iesu aboto aise

giworoho-rimo. Iedi temeteme urubia ro Iesu ro meana aise giwaititi.

³¹ Iedi urubia ro giworoho-rimo, neio ro na-giauri-rimo oweru karo tato urubia oweru mea se na-garo-rimo, tu ra sairo ra karawiauti urubia meana na-goititi-rimo, sairo ubauba urubia simara sairo to mea se na-goroho-rimo, ibose idomari pogo urubia namabu mea se na-giauri-rimo, Godi Isiraere urubia ro na-emowabutiti-dumo, iedi tau ro nato neio ro iato gemowabu-rimo.

Iesu ro auna topira ohona to giwarebai

³² Iesu ro kowasoro urubia nato girumai nou aboto ou ri. Nou ro ibo, 'Mo auna nirimagare ie nedi urubia ro neio aboto. Neio mo abato netewa didi saiki Peteibi to ta-gorowomidiro. Neio abora idaibo sogoi ro iwati, ina mo ubi tato ie neio kiho tato kitiodorai. Modobo pua neio ipi ato durupi pupuwo tato ro kirobowado.'

³³ Taie kowasoro urubia ro Iesu oweru ibo gemowameai-birimo, 'Nedi moro ro goto se duriomoro ie, ata ohona tato moro ie. Idaibo dubu patu gebari neibi ro ohona boido anamabimi-imowai-ri?'

³⁴ Kaupoti neibi Iesu ro oweru ata mino to gimowameai-ibi, 'Ina nibi abato dokou koura beda mutu ra?'

Neibi ro ibo, 'Neibi abato 7 dokou koura tiamo-ibi sipu tato nakere koura mutu.'

³⁵ Taie Iesu ro urubia sirio iato gimowapotai goto ato orowomititi ri.

³⁶ Nou ro 7 dokou koura na-gimidai-ro sipu tato nakere koura mutu, Godi aboto eso oweru

iato garo. Iedi dokou ra nakere ra na-gisebuti, kowasoro urubia aboto iato giaiwo, urubia neibi ro gimoworoho-birimo.

³⁷ Neio ro edi ohona ro na-giho-rimo imese ta-giamidimai. Neio ro edi ohona mapapati ro na-gimesere-rimo kowasoro urubia ro 7 gatere nou giodiawado-rimo.

³⁸ Iedi dubu patu ro gorobu ohona kiho moro ato, imese sirio ia ie. Dubu kawakawa na-gioputi-rimo imese 4,000 dubu e, mamio merebusere mutu ioputi pua.

³⁹ Taie Iesu ro urubia iato gimeirio simara sabowa to. Kimerio saro gabo ato nou pe se gorobai, Magadana moro to imese gabu-ro, obo paruo ata sapuwo ato gowamo.

16

Iesu ina a-gowaibia-rimo

¹ Parasi urubia Sadusi urubia mutu nato gou-rimo Iesu owaibia ri. Neio ro Iesu nato gowaibia-rimo ibo nou ro ata pupuwo korosa tanaro ata osioidiro ri, neio umoro koi sapuwo to ibo nou Godi ro gemeiriai-ro neito.

² Ina neio Iesu ro ibo gimowameai, 'Koriodoi saiki karima se kowamo ato, nio umoro koi ie ibo kowaroho saiki modobo ato ama-owaroho-ri.

³ Ibose nio ro kowea ato daroho bubu tumu sapuwo rido kiwomi ato, nio umoro koi ie ibo daroho amadi-ou-ri. Nio umoro samo to koi ie toboro ato beda sosoro tanaro ro kororosoidiro ra. Ina mabu boira nio ro nedi tanaro ro abora na-ororosoidiro-dumo nio ro umoro koi tato?

⁴ Nio imese ubauba tanaro kisioidiro urubia ie nio abora nedi urubia ro na-orowomidiro,

uramio upi ro mau beda sosoro isebo-dumo, nio ro idaibo tanaro isioidiro-dumo Godi aboto. Pupuwo korosa tanaro auna se iosora-dumo. Kaupoti nedi tau ro nato ata pupuwo korosa tanaro ata nio ro owea-ri pua. Iona abato iedi pupuwo korosa tanaro ro na-gororosioidiro, io nouse ie nio ro nou amadimo-owea-ri.'

Taie neio Iesu ro aise gimeserai nou imese gou ata moro to.

Karasaubuti kitamudiro nouse ba-diwaruwo-mo

⁵⁻⁶ Taie Iesu kowasoro urubia mutu obo paruo ata sapuwo to na-gorowateai-rimo, neio ro parowa kimidai aboto woki ta-gemati-rimo. Nedi owera ro Iesu ro nou gimowapotai-bi, 'Mea se, Parasi urubia Sadusi urubia mutu neio parowa kaupai meresini mutu oroho-dumo.'

⁷ Neibi ro iedi owera ro na-girorowai-birimo, nakara se iato geremowauti-birimo ibo, 'Nou ro nedi owera ro na-warō mabu neibi ro beredi imidai pua, beredi tato se niabu-diebimo.'

⁸ Neibi edi owera to geremowauti-birimo Iesu umoro ta-goi. Taie neibi nou ro nato gimowapotai-ibi, 'Nibi kimibiria imese kainai ia ie! Mabu boira nibi ibo na-warō-bimo neibi beredi imidai pua, beredi tato se niabu-diebimo?'

⁹ Nibi umoro mea se iamo pua ra, idaibo owera noudo aro-bimo? Nibi ro woki a-gemati-bimo ra 5,000 dubu 5 beredi to na-niwoubua? Ina ohona mapapati nibi ia ro beda mutu gatere giodiawado-birimo?

¹⁰ Ibose 4,000 dubu ohona na-giho-rimo, 7 beredi aise na-gorowatuti-rimo neio ro nou giho-rimo. Ina ohona mapapati nibi ia ro beda mutu gatere giodiawado-birimo?

¹¹ Nedi tanaro sirio ro woki a-gimati-bimo ra? Mabu boira mo edi oweru ro nibi ro mea se kimidai tato? Mo ro beredi sapuwo to aro pua. Abora nedi tau ro neido mea se ba-deremowotoi-bimo. Parasi urubia ro parowa kaupai meresini mutu oroho-dumo.'

¹² Iesu edi oweru to garo neibi ro dese to umoro nato goi-birimo ibo pua parowa kaupai meresini ato karo. Nou ro Parasi urubia Sadusi urubia mutu neio edi karasaubuti kitamudiro ro nou sapuwo to garo.

Pita ro paea se ta-gowapotai ibo Iesu Godi mere ie

¹³ Iesu kowasoro urubia mutu imese gidiai-birimo Siseria-Piripai duriomoro to. Taie nou ro kowasoro urubia nato gimodowai-bi, 'Imese Urubia Kiauri Dubu mo nouse ie, urubia ro mo etu to nasoro-dumo?'

¹⁴ Ina kowasoro urubia ro Iesu ibo gemowameai-birimo, 'Arua urubia ro oro Ioane to asoro-dumo, obo to edi dubu ro iwarumiautiti. Ina arua ro ibo aro-dumo oro Eraia ie. Ina arua ro ibo aro-dumo oro Ieremaia ie, o Godi ipusu oweru dubu ata ie.'

¹⁵ 'Ina nibi beda sosoro to imaragoidiro-bimo, mo nibi ro etu to nasoro-bimo?'

¹⁶ Ina Saimoni Pita ro ibo, 'Oro Godi ro kohodowa dubu nouse ie. Godi keremiro mabu dubu oro nou mere ie.'

¹⁷ Iesu ro Pita ibo gemowameai, 'Oro Godi aboudo meana ta-gowea, Pita Iona, Godi edi umoro ro oro aboto ta-waiwai-ro. Nedi morobise oweru ro mo sapuwo to, oro aboto ata sopo duriomoro dubu ata ro owapotai pua. Mo abera Adiri sabowa ato na-omidiro-die, nou aboudo ie.

18 Ina oro mo ia ro memowapotai-ro, oro masiro Pita ie maumo owamo ibo, Nedi nadi ro nato, mo urubia nato anama-iwotoburio-ri. Pamo edi korosa ro mo edi urubia ro nou ro owaruria-ri pua.

19 Godi edi kiwaboi tanaro ro nou maumo ato beda roka ki ro iamo, neio oro aboto anama-iaiwai-ri. Nedi duriomoro ro nato oro ro ubi tato to beda tanaro ro ama-iapoi-ri, Adiri sabowa ato iedi atu tanaro ro Godi ro ubi tato to ibose to ama-iapoi-ri. Ibose sopu duriomoro ato oro ro ubi to beda tanaro ama-iadodorai-ri, Adiri sabowa ato Godi ro ubi to ibose to ama-iadodorai-ri.'

20 Taie Iesu ro kowasoro urubia koko owera iato gimia ibo, 'Nio ro urubia imowauti ate ibo mo Godi ro kohodowa dubu nouse ie!'

Iesu simara pamo kowea sapuwo to geremabuti

21 Nedi tau ro neido Iesu pamo kowea sapuwo to kowasoro urubia paea se keremabuti neido gatamuai. 'Mo Ierusarema sabowa to anama-ou-ri. Mo ro sirio koko tanaro anama-iauri-ri sabowa kiauri urubia aboudo, Godi ra urubia ra turituri awawo urubia aboudo, ibose Mose sabi kitamudiro urubia aboudo. Mo neio ro anamadima-apoi-ri arua urubia aboto opia ri. Ina netewa didi saiki nama-orobai-ri, mo Godi ro pamo rido nato anamadi-owameai-ri.'

22 Pita ro nedi owera ro na-girorowai, Iesu nou ro nakara moro to aise gowou. Nou ro Iesu nato gemadowerai, 'Godi ro gabo aise ba-mopai! Nedi tanaro ro oro aboto beda kororosioihiro pua!'

²³ Iesu Pita aboto ketae se gapimaidiro, 'Pita oro Satani sosoro ie. Mo aboudo neido daragare! Oro ubi ra mo ro Godi ubi tanaro kosioidiro tato? Oro edi kimaragoidiro ro Godi kimaragoidiro pua, duriomoro urubia kimaragoidiro iworohuti!'

²⁴ Iesu owera ina iato gutura kowasoro urubia aboto, 'Etu ra ubi na-iamo mo kowasoro aboto, nou simara ubi tanaro aise ba-mimeserai. Nedi dubu ro sirio saiki Godi ubi tanaro aise ba-misioidiro ina pamo kowea nou sapuwo to, io modobo ia ie.

²⁵ Etu ra keremiro simara ubi tanaro ato nama-owaboi-ri, io nou ro ama-asoperai-ri. Kaupoti beda dubu ro aseperai keremiro mo sapuwo to, nou ro orio keremiro Godi aboudo ama-owea-ri.

²⁶ Imese beda mutu namabu sirio ra nedi duriomoro ro nato na-iamo, urubia dubu simara na to na-wararasoro, kaupoti nou keremiro nato nama-asoperai-ri, ina iedi dubu ro ata meana ata ama-owea-ri ra? Morobise ie, iedi namabu sirio ro neio ro owarebai-ri pua. Morobise owera nou e, ata gabo ata owamo pua urubia dubu ro Godi wisa komia, keremiro kowameai aboto.

²⁷ Mabu etu Imese Urubia Kiauri Dubu neito namadi-orowameai-ri, Godi sowake urio mutu nou simara Abera nou woroworo ato amadi-orowameai-ri. Ina nedi tau ro nato nou ro erere urubia imese tanaro neio ro na-isioidirotiti-mo, neio sapuwo to wisa nato ama-imio-ri.

²⁸ Nio mo ro morobise owera mimowapotai-ro! Nio arua nato na-orowotoi nio

ibose to ama-orowomidiro-ri, orowaburo-ri pua, tauo kebase nio ro Imese Urubia Kiauri Dubu amadimo-owea-ri, Godi ro kiwaboi tanaro maumo ato namadi-ou-ri.'

17

Iesu durupi benenio ia se gowotoi

¹ 6 saiki saro gabo ato, Iesu ro Pita, Iemisi, nou neama Ioane neibi se gidabuai-bi, auna podo ohu to imese giwaboi-bi.

² Neibi sosoro gabo ato Iesu ata sosoro ta-goi, nou sosoro imese ta-garatidiai, saiki woroworo sosoro gimewia. Ibose nou edi obotama giroidiro imese keakea ia se giwotoi pina woroworo sosoro ie.

³ Tutura to owamo pua neibi sosoro gabo ato Mose ra Eraia ra paea se nato gorowapotai-rido. Neitiro Iesu mutu owera imese geremowauti-birimo.

⁴ Pita ro ibo Iesu aboto, 'Abera Naramu, neibi oro ro modobo ia to niwidiai-bidie. Mo ro netewa didi mapagea Peteibi anama-itomai-ibiri. Ata oro do ie, ata Mose do ie, ata Eraia do ie.'

⁵ Pita owera Iesu aboto edi tau ato gutura, iedi na Peteibi ro benenio ia toboro kere ro aise giatimai-bi. Ina toboro ohu rido Iesu sapuwo to Godi owera nato gutura-ro, 'Iesu mo ia mere ie, mo auna ubi towamo nou aboto. Mo auna kamade ie nou aboto. Nou owera se ba-dirowidiro-bimo.'

⁶ Kowasoro na Peteibi ro Godi owera kodu edi tau ato gemororowai-birimo, neibi tere ri durupi sopu to aise giwororuwo-birimo.

⁷ Taie Iesu neibi aboto aise gou-ro, nou ro erere se iato giwasomo-ibi. Iesu ro ibo neibi aboto, 'Direribuwa-birimo, nibi tere na ie.'

⁸ Neibi na-gireriburio-birimo, neibi ro iedi dubu teibo ro iwia-ma pua, ta-gararaseperai-rido, Iesu se gowea-birimo.

⁹ Taie neibi podo ohu rido atu se imese giodori-biro, ina gabo ipi ato Iesu ro neibi koko oweru nato gimowapotai-ibi, 'Nibi ro beda tanaro owea-bimo, urubia imowauti ate womu tato Imese Urubia Kiauri Dubu mo nou se ie, nou Godi ro pamo rido namadi-owameai-ri, taie urubia nibi ro nato ba-dimowauti-bimo.'

¹⁰ Taie kowasoro dubu peteibi Iesu nato gemodowa-birimo, neibi ro ibo, 'Mabu boira Mose sabi kitamudiro urubia na-iarotiti-dumo ibo Eraia kebase amadi-orowameai-ri, ina nou saro rido Godi ro kohodowa dubu ro amadi-ou-ri?'

¹¹ Neibi Iesu ro ibo gimowameai-bi, 'Io morobise oweru ie, imese tanaro patu Eraia ro kou e imododiai-ri.

¹² Kaupoti nibi a-nimowapotai-bi ibo Eraia neito ta-gou-ro, kaupoti nedi dubu ro urubia ro mea se eibimai pua. Neio ro ubauba mino to goworohuti-rimo, simara ubauba ubi tanaro nou aboto aise gisioidiro-rimo. Ina idaibo atu sosoro ubauba tanaro neio ro amadimi-isioidiro-ri Imese Urubia Kiauri Dubu aboto.'

¹³ Kowasoro dubu peteibi ro Iesu oweru na-gemororowai-birimo, neibi umoro samo to goi-birimo ibo nou ro obo to kiwarumiauti dubu loane nou owauti-die.

*Iesu ro ubauba urio mere kainai aboudo
gemabodorai*

¹⁴ Iesu kowasoro dubu peteibi mutu podo ohu rido na-giroruo-ibiro, urubia dubu patu maumo to aise godoro-birimo. Ata dubu edi topira maumo ro neido gerehidiro-ro Iesu aboto na-gou-ro. Taie nou sosoro gabo ato kauhio to aise girimusubua.

¹⁵ Nou ro ibo, 'Abera Naramu, mo mere nirimagare demowai-ro! Nou sirio tau ubauba urio ro oworohutiti, durupi aise komuguguti ie, goto ato iato aise keteamoidiro ie. Ata tau nou ro era to katowea ie, ina ata tau obo to iato keherai ie.

¹⁶ Oro kowasoro urubia aboto egea se nowou-die, kaupoti neio ro meana kowai modobo pua.'

¹⁷ Iesu ro ibo, 'Nio imese kimibiria tato urubia ie, ibose nio ro tuputupu tanaro kisioidiro pua. Mo nio mutu komidiro dese eremiri pua, kaupoti nio mea se imibiria pua. Mo nio mutu aise nama-omidiro-ri, nio mea se nato amadimi-imibiria-ri ra? Iedi mere ro neito ma-dowou-birimo.'

¹⁸ Neio ro nedi mere kainai ro Iesu aboto iato gowosuruwo-rimo. Iesu ro edi ubauba urio ro ioudo osuruwo ri nato gemadowerai. Taie iato etou ra iedi atu tau ro nato iedi mere ro meana aise goi.

¹⁹ Iedi tanaro na-gororosiodiro nou saro gabo ato, kowasoro urubia ro Iesu nakara moro ato nato gemodowa-birimo. 'Mabu boira iedi ubauba urio ro neibi ro modobo pua kemabodorai aboto?'

20-21 Iesu ro neibi ibo gimowapotai-ibi, 'Mabu nibi kimibiria kainai ie, noudo ie nibi ro modobo pua kemabodorai. Nibi mo ro morobise owera mimowapotai-biro, nibi abato kimibiria mirie iopu kainai sosoro na-iamo, nibi ata ro modobo ie podo kemowapotai, Podo ioudo daraubai, iato dotobowa-ro! Nibi ata owera to podo ioudo karaubai ie, ata moro ato kotobowa ie. Imese tanaro nibi aboudo modobo ia ie, koko nibi ro iauri-ri pua.'

Iesu ina geremabowa pamo kowea sapuwo to

22 Taie ata tau Iesu kowasoro urubia mutu Gariri duriomoro ato nato garadabuai-rimo. Neio nou ro nedi owera ro nou gimowapotai, 'Imese Urubia Kiauri Dubu urubia aboto amadima-apoi-ri.

23 Nou neio ro amadimo-opia-ri, ina netewa didi saiki nama-orobai-ri, nou Godi ro pamo rido nato amadi-owameai-ri.' Nedi owera ro kowasoro urubia ro na-girorowai-rimo, neio auna ia kamade tato aise goi-rimo.

Iesu ro gitamudiro takesi mani kiaremo sapuwo to

24 Iesu kowasoro urubia mutu Kapeniama sabowa to na-gorowateai-birimo, Tarena Moto takesi mani kimade urubia Pita aboto nato gou-rimo. Taie neio ro Pita nato gemodowa-rimo, 'Nio kitamudiro dubu ro Tarena Moto takesi mani kiaremo pua ra?'

25 Ina Pita ro ibo, 'Ina etou ri nou kiaremo ie.'

Iato Pita moto to aise godoro nedi owera ro Iesu emowapotai ri. Kaupoti nou Iesu ro gemadoheamuti, 'Saimoni, ina oro beda sosoro

imaragoidiro? Gabamani eputa urubia ro takesi mani simara merebusere aboudo kimade ra? O arua urubia aboudo ra?’

²⁶ Ina Pita ro Iesu ibo gemowameai, ‘Arua urubia aboudo imadetiti-dumo.’

‘Ehe, ina noudo ie eputa dubu simara merebusere ro takesi mani kiaremo pua. Ina neibi idaibo sosoro merebusere ie.

²⁷ Kaupoti neio neibi ro serawo kiwai modobo pua. Pita, obo paruo to ma-dodori, kimai ioudo ba-deherai. Kibase beda nakere ro ererebui, matagoro ba-dabowa, mani iopu oro ro iato ama-owea-ri. Ba-dowou-ro Tarena Moto takesi kimade urubia aboto, nou ba-dimia, neitiro takesi mani ie.’

18

*Iesu kowasoro urubia sopu to
korowororuwoidiro modobo ie*

¹ Kowasoro urubia Iesu emodowa ri nou aboto nato gou-rimo. Neio ro ibo, ‘Godi edi kiwaboi maumo ro nato auna to etu ro ama-ararasoro-ri?’

² Taie iato Iesu ro mere kainai se gorumai-ro, neio sosoro gabo ato aise gowotobowa.

³ Nou ro ibo, ‘Nio mo ro morobise owera mimowapotai-ro. Nio kimaragoidiro patu kiwesegerai modobo ie, merebusere kainakaina sosoro, nio ro modobo ie neio sosoro kimaragoidiro kiworohuti. Nio ro keremowabu tanaro, ibose auna to kararasoro tanaro, kimeserai tato, nio Godi ro kiwaboi maumo to odouti-ri pua.

⁴ Ina noudo ie etu ra sopu to korowororuwo mere kaina sosoro kararapoi aboto, nou ro Godi

edi kiwaboi maumo ato auna ia masiro
ama-omidai-ri.'

*Arua urubia ubauba tanaro kisioidiro aboto
iwodouti mamō*

⁵ 'Idaibo sosoro mere kainai mo sapuwo to etu
ro kemaiddorai ra, ibo pua nou kemaiddorai,
nou ro mo kemaiddorai ie.

⁶ Kaupoti etu ro kowaboi ra idaibo mere
kainai, ubauba tanaro kosioidiro aboto, Godi ro
imese ubauba ia wisa nou aboto amadi-aiwai-ri.
Iedi dubu ro mere kainai ubauba to etu ro
gowodoro, nou aboudo modobo ie auna nadi
wagoha rudo kemobuai, oromo damo to
keherai, ina nedi wisa ro kainai ie. Kaupoti Godi
ro edi wisa ro namadi-aiwai-ri nedi dubu ro nou
aboto, auna ia ubauba wisa amadi-aiwai-ri.

⁷ Sopa duriomoro urubia, neio ro auna ia
ubauba amadimo-owea-ri, mabu arua urubia
kakate gabo ato iwaboi-dumo, ubauba tanaro
kisioidiro aboto. Ubauba kiwaboi tanaro
kororosoidiro ie, kaupoti etu ro urubia ubauba
gabo imasouti-die, ina ubauba tanaro sirio
urubia ro amadimi-isioidiro-ri, iedi ubauba
kiwaboi urubia ro Godi aboudo awawo ubauba
wisa amadimi-iwia-ri.

⁸ Nio niro turi ato beda ubauba ubi sirio ro
iamo, imese sirio ia se ba-diwarewado-mo.
Ina oro ro tu to o sairo to ubauba tanaro neito
na-isioidiro, modobo ie iedi tu ro o iedi sairo ro
kemotoria ina keherai. Io meana ia ie, oro tu
kaupoti mutu o sairo kaupoti mutu womu tato
womu tato keremiro ama-owea-ri. Modobo pua
oro tu teibo mutu o sairo teibo mutu ubauba
tanaro kisioidiro ina womu tato womu tato era
to katowea.

⁹ Ina ibose ie oro idomari ata ro ubauba ubi na-imaremo, iedi idomari ro modobo ie kaubidiro keherai. Io meana ia ie, oro kaupoti idomari mutu womu tato womu tato keremiro ama-owea-ri. Modobo pua oro idomari teibo mutu ubauba tanaro kisioidiro, ina womu tato womu tato era to katowea.'

Sipisipi na-gararaseperai nou totomu e

¹⁰⁻¹¹ Iesu ro ina kowasoro urubia ata owera iato gimowauti ibo, 'Mea se! Idaibo sosoro kimibiria urubia mere kainakaina sosoro, neio kimaragoidiro to dorogora urubia to iasoro mamo. Mabu nio mo ro morobise owera mimowapotai-ro, Adiri sabowa ato neio edi sowake urio ro Godi sosoro gabo ato sirio tau aise imowotoititi-dumo.

¹² Nedi totomu ro mea se nou demaragoidiro-mo! Ata dubu ro 100 sipisipi kiworohuti ato, ina kaupoti nato na-wararaseperai, 99 kararaseperai tato sipisipi neio sapuwo to nou kamade egea mere se kowamo ie, nou ro ina mea moro ato egea mere se aise kimeserai ie. Taie nou ioudo aise kaimai ie iedi sipisipi ro osora ri.

¹³ Ina nio mo ro morobise owera mimowapotai-ro iedi sipisipi kaupoti ro kowea ato, nou ro kamade mutu aise kohiai ie. Io morobise ia ie, auna kamade tau ro kereredea ie.

¹⁴ Ina atu sosoro tanaro ibo ie, idaibo sosoro merebusere kainakaina kimibiria urubia, nio edi Abera ro Adiri sabowa ato na-omidiro-die, nou ubi tato ie neio ata kararaseperai.'

Oro kimibiria boinana ro ubauba na-owai ibo ba-disioidiro

¹⁵ 'Oro boinana kimibiria dubu ro ubauba na-owai, nedi dubu ro oro ro modobo ie kotuputai. Nedi owera ro nitiro ro modobo ie nakara moro ato koporeai. Oro edi owera ro nou ro nirimagare mutu na-imidai, nedi dubu ro oro ro ina kadabuti ie.

¹⁶ Oro edi owera ro nou ro na-iseiai, netewa teibo kimibiria dubu teibo didabuai-maro. Nibi ro atu se nedi owera ro nou mutu ina demododiai-bimo. Idaibo tanaro nou ri ba-disioidirotiti-mo, mabu owera Godi ro kebase gowapotai-ro ibo, *koto ato kaupoti woiginisi ro owera na-warō, nou kaupoti modobo pua. Netewa teibo woiginisi teibo o netewa didi woiginisi peteibi atu owera na-warō-bimo, io nedi owera ro koko neito kowai ie.*

¹⁷ Ina nibi edi owera ro nou ro na-iseiai, taie mo urubia karadabuai ato neio aboto nato dowou-mo, neio mutu iato kemotuputi aboto. Ina mo urubia owera nou ro na-iseiai, taie iato aise demeserai-mo, ata kimibiria tato dubu o takesi kimade dubu nou nio ro beda sosoro na-iworohuti-dumo, nedi dubu ro idaibo sosoro ba-doworohuti-mo.

¹⁸ Nio mo ro morobise owera mimowapotai-ro, nedi sopu duriomoro ro nato, nio ro beda tanaro ra adodorai tato, Adiri sabowa ato iedi atu tanaro ro Godi ro ibose to adodorai-ri pua. Ibose nedi sopu duriomoro ro nato nio ro ubi to beda tanaro amadimi-iadodorai-ri, Adiri sabowa ato Godi ro ubi to ibose to ama-iaidodorai-ri.

¹⁹ Ina arua owera kidabuai aboto, nedi sopu duriomoro ro nato nio abato netewa teibo dubu teibo Godi nato na-wararatoro-do, mo abera Adiri sabowa ato na-omidiro-die nitiro edi ubi tanaro ro nou ro kosioidiro ie.

²⁰ Mabu nio abato netewa teibo o netewa didi dubu peteibi na-waradabuai-bimo, mabu neibi mo urubia ie, mo neibi turituri ato komidiro ie.'

Borubi kimibiria urubia ubauba kimatopeamuti auna tanaro ie

²¹ Taie Pita Iesu aboto nato gou-ro, nou ro Iesu nato gemodowa, 'Mo kimibiria boinana ro ata ubauba tanaro mo aboto na-isioidiro-die, nou edi ubauba ro mo ro beda mutu tau to kematopeamuti ra? 7 tau to kematopeamuti ra?'

²² Iesu ro Pita ibo gemowameai, 'Oro mo ro ibo memowapotai-ro, 77 tau to gi-imatopeamuti-ri, 7 tau to modobo pua.

²³ Ina noudo ie, Godi edi kiwaboi tanaro ro eputa dubu sosoro ie. Iedi eputa dubu ro sowake urubia sirio nato girumai nou aboto ou ri. Neio ro doro to beda mani iopu gimade-rimo nou emowame ri girumai.

²⁴ Nedi doro to kimade mani ro kemowame woko na-gatamuai, nou sowake dubu ata ro ta-gimidai auna ia mani K10,000,000 eputa dubu aboudo.

²⁵ Iedi dubu ro modobo pua iedi doro ro nou ro kopia aboto. Taie eputa dubu ro woko urubia nato gimowapotai, iedi dubu ro orobo merebusere mutu, neibi edi namabu sirio ro ata dubu ro iahodorai ri, ina iedi mani ro eputa dubu nou emowameai rie.

²⁶ Iedi owera ro nou ro na-girorowai, eputa dubu sosoro gabo ato kauhio to nou mabu ato aise gomi. Nou ro eputa dubu iato gemagege, "Mo tau domia-ro, edi doro mani ro nou nama-osora-ri, iedi doro ro mo ro momuo se nato nama-emowameai-ri."

²⁷ Iedi owerá ro eputa dubu ro na-girorowai, nou abato nirimagare kimaragoidiro ro gereredeá. Taie iedi sowake dubu ro nou ro nato gemowapotai ibo, “Marasio iedi doro ro, oro ro auna se gemaragoidiro, kamade mutu ba-dosuruwo.”

Taie iedi dubu ro kamade mutu imese gosuruo-ro.

²⁸ Kaupoti iedi dubu ro nou ro ata ubauba tanaro nato gosoidiro, nou ro boinana sowake dubu nato gowea, 10 kina doro to nou aboudo kebase nou ro ta-gomidai. Iedi dubu ro nou ro aise gohiai, wagoa to iato gahumuwo. Nou ro ibo, “Doro to edi mani gomidai mo aboudo, abora hio ito demowameai-ro!”

²⁹ Iedi dubu ro kauhio to aise girimusubua, nou ro edi dubu ro iato gemagege, “Mo nirimagare demati-ro, mo tau egea mere se domia-ro, oro mani anamadi-emowameai-ri.”

³⁰ Kaupoti iedi dubu ro ubi oi pua nou owerá kirowidiro aboto. Iedi dubu ro nou ro dibura to aise gedea, womu tato doro kowameai, dibura rido nato amadi-osuruwo-ri.

³¹ Borubi sowake urubia ro nedi owerá ro na-girorowai-rimo, neio auna kamade tato goi-rimo iedi dubu ro nou aboto. Taie neio nato gou-rimo auna dubu emowapotai ri.

³² Taie iedi dubu ro eputa dubu ro nato gorumai nou aboto ou ri. Auna dubu ro ibo, “Oro ubauba sowake dubu e! Oro doro mo ro ta-nemasiai, mabu mo oro ro auna se nemagege-die.

³³ Ina noudo ie mabu boira oro nirimagare koi tato boinana sowake dubu aboto, oro mo ro nirimagare beda mino to nemowai?"

³⁴ Eputa dubu iato auna ia niro korosa nou ro gioro iedi dubu ro nou aboto. Taie iedi dubu ro nou ro dibura to aise gedea auna temeteme nou ro iato iauri ri, womu tato doro nou ro kiopia.'

³⁵ Iesu ro owera ibo gopai, 'Mo abera Adiri sabowa to na-imidirotiti-die, nou ro idaibo tanaro ama-isioidiro-ri nio aboto. Nio ro borubi kimibiria urubia neio edi ubauba ro nio ro morobise maumo rido kimatopeamuti tato, nio ro idaibo sosoro tanaro nou amadimi-iauri-ri.'

19

Iesu ro upi kiraribo sapuwo to gitomu

¹ Iesu ro urubia owera kimowauti na-goporeai, Gariri duriomoro aise gemeserai, imese godori-ro Iudia duriomoro to. Iudia duriomoro ato Iodeni gowo ata sapuwo iedi duriomoro ro Iesu ito gou.

² Nou ito na-gou, auna ia urubia sirio ro saro rido aise gobodoro-rimo. Nou ro iato temeteme urubia sirio meana aise giwaititi.

³ Taie iedi tau ro nato Parasi urubia kemodowa owera mutu Iesu aboto nato gou-rimo. Neio ubi ie Iesu owaibia ri. Neio ro ibo, 'Ata dubu ro simara orobo dorogora mabu ato na-wararubia sabi ra?'

⁴ Iesu ro neio ibo gimowameai, 'Tarena Buka ato nio ro owera kioputi pua ra? A? Mabu owera nato ibo tiamo, Godi ro nedi duriomoro gebari ro na-gosioidiro, *nou ro gisioidiro urubia, upi dubu.*

⁵ Godi ro ibo, *Ina nou ri ie nimo ro nou nemodohodai-dumo, mere orobo na-edea, nou simara mamu ra abera ra nou ri kimeserai-ma ie, imese karadabuai ie ina neitiro kaupoti to imese kararapoi ie.*

⁶ Orobo ra uramu ra neitiro erere se omidi-ro-ri pua, neitiro abora kaupoti to imese kararapoi ie. Godi ro na-gidabuai-ma, ata ro kihodowa-ma modobo ia pua, sabi ie!

⁷ Parasi urubia ro ibo, 'Oro ro edi oweru to nimowauti-die morobise ra? Ina mabu boira Mose sabi ato oweru na-iamo ibo, *Orobo uramu ro na-wararubia, uramu ro kebase kararubia peba titi se kemesioidiro ie, orobo nou komia ie, taie nou ro iedi orobo ro imese nato kararubia ie.*'

⁸ Taie Iesu ro Parasi urubia ibo gimowapotai, 'Nio Mose ro nedi sabi ro nou ri gimia, mabu nio imese auna akau urubia ie. Kaupoti nedi duriomoro gebari ro Godi ro edi tau ato gosioidiro, upi kiraribo tanaro owamo pua.

⁹ Nio mo ro morobise oweru mimowapotai-ro, urubia orobo ubauba tanaro kosioidiro tato moro ato ata dubu mutu, ina iedi tau ro nato uramu ro na-wararubia, ina orio orobo nato na-edea, iedi dubu ro Godi sosoro gabo ato piro tanaro kosioidiro ie.'

¹⁰ Kowasoro urubia ro ibo, 'Urubia idaibo mino to nama-orowomidi-ro-ri, marasio kararemo, korowomidiro kawa korowomidiro modobo ie.'

¹¹ Iesu ro neio nedi oweru ro neito gimowameai, 'Nio mo ro edi oweru to nimowauti, urubia sirio ro modobo pua komidai aboto. Kaupoti Godi ro sipu tato urubia se

modobo ama-iwai-ri nedi owera ro komidai aboto.

¹² Arua dubu neio mamio ro na-giwahaudi-ro-rimo neio muopu tato giwahaudi-ro-rimo. Ina ibose arua dubu muopu arua urubia ro ta-gimeiho-ro-rimo. Ina arua urubia neio upi kiaremo tato nou ri irowomidirotiti, mabu neio ro Godi edi kiwaboi maumo ro nato nou ubi tanaro kemesioidiro aboto. Etio ra modobo se nedi owera ro kimade aboto, neio ro ba-mimade-mo.'

Merebusere kainakaina Iesu aboto giworoho-rimo

¹³ Merebusere kainakaina Iesu aboto giworoho-rimo, tu itomo ri neio eputa ato, ina Godi aboto araratoro ri. Neio kowasoro urubia ro na-giwi-ro-rimo, binio to aise gimadowerai-rimo.

¹⁴ Kaupoti Iesu ro ibo, 'Merebusere kainakaina mo aboto mou-rimo, modobo pua nio ro na-idiobuti-dumo. Mabu Godi ro kiwaboi tanaro idaibo merebusere kainakaina neio aboudo kodouti gabo modobo ato aidiro-die.'

¹⁵ Taie nou tu neio eputa ato iato gitomo, Godi iato gararatoro neio sapuwo to, taie iedi moro ro nou ro aise gemeserai, imese gou ata moro to.

Iesu namabu sirio dubu ro gemodowa

¹⁶ Ina suana sirio dubu kemodowa owera mutu Iesu aboto nato gou-ro. Nou ro ibo, 'Kitamudi-ro dubu, ina mo ro beda mea tanaro nama-osioidiro-ri, womu tato womu tato keremiro koweaboto?'

¹⁷ Iesu ro edi dubu ro ibo gemowameai, 'Mabu boira meana sapuwo to mo oro ro idaibo

na-nemodowa-die? Nedi duriomoro ro nato Godi nou se ie meana ia ie. Oro ubi na-owamo womu tato keremiro kowea aboto, sabi sirio ba-dibodoro.'

¹⁸ Iedi dubu ro Iesu ibo gemodowa, 'Ina mo ro beda sabi ibodoro ri ra?'

Nou Iesu ro ibo gemowameai, *Urubia iopiauti mamō! Arua dubu o mamio mutu oroho mamō! Arua urubia nakomu piro to imade mamō! Koto tau ato arua urubia owera kakate moro to imoworohuti mamō!*

¹⁹ Mamu ra abera ra mea mino to gi-iauri-mari! Oro nirimagare nakara se beda sosoro na-eremati, arua urubia nirimagare ibo gi-imati-ri.

²⁰ Ina iedi dubu ro Iesu owera ibo gemowameai, 'Nedi sabi sirio ro mo ro ti-nibodorotiti. Ina mo aboudo beda hodo ro irarebidiro-die?'

²¹ Iesu ro nou ibo gemowameai, 'Oro ubi Godi sosoro gabo ato imese meana koi aboto, oro edi namabu sirio ro mani to ba-mowamade-mo. Taie iedi mani ro neito namabu tato urubia ba-diwarebai. Oro ro edi mani ro neito urubia nama-iwarebai-ri, oro mea wisa Godi ro Adiri sabowa ato ama-emedea-ri. Taie mo oro ro nato ba-dowasoro-ro.'

²² Iedi owera ro nou ro na-girorowai, nou kamade tato huru to aise gororoupiria. Mabu nedi dubu ro namabu sirio dubu e.

²³ Taie Iesu ro kowasoro urubia aboto nato gutura, 'Nio mo ro morobise owera mimowapotai-ro! Suana sirio dubu ro Godi edi kiwaboi maumo ro neito kodoro aboto auna koko ie.

²⁴ Ina nio mo ro ata ower a mimowapotai-ro. Io idaibo sosoro ie, kemoro kodoro ra nira kainai goro rido keresia ata sapuwo to? Modobo pua io! Ina idaibo sosoro ie, suana sirio dubu ro kodoro koko ia ie Godi edi kiwabo i maumo ro neito.'

²⁵ Kowasoro urubia ro nedi ower a ro na-girorowai-rimo, neio kimaragoidiro ro giopia. Neio ro ibo, 'Ina Godi ro beda urubia amadi-iapopo-ri?'

²⁶ Iesu idomari teibo neio ato se giwotobowa, neio nou ro ibo gimowapotai, 'Nedi tanaro ro urubia ro kisioidiro ata gabo tato ie. Kaupoti urubia ro kisioidiro tato tanaro Godi aboudo ata koko tato ie, nou ro modobo ie kisioidiro.'

²⁷ Taie Iesu ower a Pita ro ibo gemowameai, 'Imese beda mutu nakomu sirio ra na-niworohutiti-mo, nimo ro ta-nimeserai-rimo. Oro nimo ro saro rido ti-nowasoro-dumo. Ina nimo Godi ro beda wisa nama-imio-ri?'

²⁸ Iesu ro neio ibo gimowameai, 'Nio mo ro morobise ower a mimowapotai-ro! Nio etio ra mo na-nowasoro-dumo, koto kiauri urubia to nio ro amadima-ararasoro-ri. Isiraere urubia edi 12 gu ro nio ro amadimi-iauri-ri. Iedi tau ro nato Godi ro nedi duriomoro gebari ro mea se nama-emododiai-ri, Imese Urubia Kiauri Dubu mo nouse ie benenio ia komidiro nakomu ato mo ro anama-omidiro-ri.

²⁹ Etio ra simara moto, naminiramio, mamio abeamio, merebusere, duriomoro, namadidime-emesere-ri mo sapuwo to, iedi urubia ro Godi ro ohu rido 100 tau to ama-imotomo-ri. Ibose neio ro womu tato keremiro aise amadimi-iauri-ri.

³⁰ Abora urubia sirio awawo masiro mutu na-orowomidiro, saiki ata neio imese sopo ato ama-irowomidiro-ri. Ina ibose, abora etio ra sopo ato na-orowomidiro, saiki ata nedi urubia ro awawo masiro neio ro amadimi-irobidiro-ri.'

20

Gereipi pari woko urubia sapuwo to ie

¹ 'Godi ro kiwaboi tanaro duriomoro abera sosoro ie. Ata saiki, kowaroho duwoduwo ato nou moto rido nato gosuruo-ro maketo moro to, woko urubia iosora ri pari kemowati aboto.

² Nou ro ibo arua urubia aboto, "Nio mo ro wisa kaupoti saiki sapuwo to anama-imio-ri."

Iedi owera ro neio ro na-girorowai-rimo, ubi to aise gomidai-rimo. Taie neio nou ro imese gimeiriai gereipi pari to, woko aise gatamuai-rimo.

Taie moto abera aise gorowameai simara moto to,

³ ina saiki egea mere se ta-gidiai-ro, imese gorowameai maketo moro to. Nou ro urubia sirio iato giwia woko kirobai aboto na-geremasebidiro-rimo.

⁴ "Nio ubi ra mo pari woko emowati ri? Nio mo ro woko sapuwo to mea wisa anama-imio-ri."

⁵ Neio ro ibo, "Ehe, modobo ie, anamadime-emowati-ri."

Taie neio woko aboto aise gou-rimo.

Ina saiki turi ato, ibose saiki egea mere se ta-goriodidiro, nou ro atu sosoro tanaro ibose to gosoidiro. Urubia nou ro na-girobo imese gitioduti pari woko emowati ri.

⁶ Ina adimo ato saiki egea mere se ta-goriodoi, nou ro arua urubia ina maketo ato nato giwia, neio woko kirobai aboto geremasebidiro-rimo. Nou ro ibo neio ato, “Mabu boira nio saiki tuturu korowotoi kawa na-orowotoi?”

⁷ Neio ro ibo, “Nimo woko tato urubia ie, woko kimio urubia nimotoi-dumo.”

Pari abera ro ibo, “Nio ubi ra mo pari kemowati?”

Neio ro ibo, “Io modobo ie, anamadime-emowati-ri.”

Taie neio imese giamedei-rimo pari woko owati ri.

⁸ Nedi urubia ro woko tuturu tau to owati pua, saiki muta to goriodidiro.

Tuturu to owamo pua, pari abera ro keba se woko kiauri dubu iato gorumai nou aboto ou ri. Nou ro ibo, “Woko kiwati urubia ba-dirumai oro aboto ou ri, ina neio mani ba-dimio. Saro ia rido kitamuai urubia neio wisa kebase ba-dimio, womu tato kebase edi urubia ro itamuai-dumo neio wisa saru rido ba-dimio.”

⁹ Taie woko kiauri dubu ro wisa kimio nato gatamuai. Saiki egea mere se na-geredumudiro edi urubia gimeiriai woko aboto, wisa kimio neio aboudo gatamuai, neio nou ro kaupoti saiki woko sapuwo to wisa momuo se gimio.

¹⁰ Imese kimio to nato gou-ro, womu tato saiki egea mere se ta-gidiai-ro edi urubia ro gatamuai-rimo. Neio ro a-gimaragoidiro-rimo, “Kaupoti saiki woko sapuwo to se wisa imidai-ri pua, ohu rido ama-imotomo-ri. Mabu saiki egea mere se na-oriodoi edi urubia ro woko na-watamuai-dumo, neio ro kaupoti saiki sapuwo to wisa momuo se imidai-dumo. Nimo

saiki tuturu nisioidiro-dumo woko, ina noudo ie didi wisa anamadimi-imidai-ri.”

Kaupoti idaibo tanaro ororosoidiro pua, neio ro kaupoti saiki woko sapuwo to wisa ibose to gimade-rimo.

¹¹ Taie neio atu se masawe oweru nato garo-rimo. Neio ro ibo,

¹² “Adimo duwoduwo ato woko edi urubia ro itamuai-dumo, neio woko auna se iwati pua, neio wisa sopo to kimidai modobo ie. Nimo ro nisioidiro-dumo auna woko saiki korosa ato, ohu mere to nimo ro ba-nimidai-dumo.”

¹³ Neio ata aboto pari abera ro ibo gutura, “Namutuna, nio mo ro isaubuti pua. Nio ubi kebase ta-woi-mo kaupoti saiki woko sapuwo to wisa kimade aboto.

¹⁴ Marasio, kamade mutu aise dimade-mo, ina aise daimai-mo. Mo ubi ie saro rido edi urubia nirobo, wisa atu modobo ato kimio nio mutu.

¹⁵ Mo simara mani simara ubi ato koworohuti ato sabi ra? Saro rido mo ro edi urubia nirobo, nio neio aboto maumo masawe na-woi-dumo, mabu mo neio aboto mea tanaro a-nosoidiro ra?”

¹⁶ Iesu ro oweru ibo goporeai, ‘Ina noudo ie abora etio ra sopo ato na-orowomidiro, saiki ata nedi urubia ro awawo masiro neio ro amadimi-iroidiro-ri. Ina ibose, abora urubia sirio awawo masiro mutu na-orowomidiro, saiki ata neio imese sopo ato ama-irowomidiro-ri.’

Iesu ina geremabowa simara pamo sapuwo to

¹⁷ Iesu Ierusarema sabowa to na-gidiai nou 12 kowasoro urubia mutu, nou ro kowasoro urubia ipi gabo ato aise giwotobowa. Nou ro ibo,

¹⁸ ‘Owera neito ma-dirowidiro-rimo! Neibi Ierusarema sabowa to nidiai-bimo. Imese Urubia Kiauri Dubu Godi ra urubia ra turituri awawo urubia aboto iato amadima-apoi-ri. Ibose Mose sabi kitamudiro urubia aboto amadima-apoi-ri. Neio ro nou sapuwo to amadimu-utura-ri ibo, “Nedi dubu ro modobo ie kesuai aboto.”

¹⁹ Ina nou neio ro Iu owera karo tato urubia aboto amadima-aiwai-ri. Nou neio ro amadime-emasosowado-ri, kerei to amadime-epesuti-ri. Nou neio ro ota kemowotowa ato amadime-emopoguti-ri. Nou bobo ato netewa teibo saiki to ama-orobu-ri. Kaupoti netewa didi saiki nama-orobai-ri, nou pamo rido Godi ro amadi-owameai-ri.’

Iemisi ra Ioane ra ubi ie auna to kararasoro

²⁰ Tuturu to owamo pua Iesu aboto Sebedi orobo ro gou-ro mere teibo mutu. Iedi orobo ro kauhio to aise girimusubua, nou ubi ie Iesu ro nou ubi tanaro osioidiro ri.

²¹ Iesu ro nou nato gemodowa, ‘Oro etou ri ra?’ Nou ro Iesu ibo gemowameai, ‘Oro ro auna gabamani to nama-omidiro-ri Godi ro kiwaboi maumo ato, mo ata mere tumodi sapuwo ato ba-dowomi, ina ata mere pere sapuwo ato ba-dowomi.’

²² Iesu ro edi orobo ro ibo gemowameai, ‘Nibi edi owera to aro-diebimo, nou maumo nibi umoro oi pua.’

Taie Iesu ro edi mere teibo ro nato gimowapotai-ma, ‘Mo edi temeteme maumo ro neito namadi-odoro-ri, nitiro aboudo modobo ra neito kodoro?’

Neitiro ro ibo, ‘Io, neitiro aboudo modobo ie.’

²³ Iesu ro ibo, 'Morobise ie nedi temeteme ro nitiro ro amado-owea-ri. Urubia dubu tumodi sapuwo ato kowomi, ina ata pere sapuwo ato kowomi, urubia mo ro kituputi modobo pua. Mo abera ro edi na teibo ro gituputai-ma iedi bobo ro neitiro do ie, auna masiro teibo neitiro ro amadi-irobidi-ro-mari.'

²⁴ Nedi oweru ro arua 10 kowasoro urubia ro na-girorowai-rimo, neio auna serawo goi-rimo naramu ra neama ra aboto.

²⁵ Taie neio Iesu ro atu moro to aise gidabuai, nou ro nedi oweru ro neito gimowauti, 'Nio umoro ie, kimibiria tato urubia neio simara eputa urubia mutu e. Neio ro urubia auna kimagege ie woko imesioidiro ri. Ina nio auna umoro ie idaibo kiwaboi urubia neio auna ubi ie keremowabu, neio woko imesioidiro ri urubia se kimasouti.

²⁶ Kaupoti nio ro idaibo tanaro kisioidiro modobo pua. Ata dubu nio abato ubi na-owamo auna masiro korobidi-ro aboto, nou ro modobo ie nio sowake dubu to kararapoi.

²⁷ Ibose nio ata dubu ata ubi na-owamo ohu ia to komidi-ro aboto, nou ro modobo ie nio wisa tato woko kisioidiro.

²⁸ Ina atu sosoro tanaro ie, mo Imese Urubia Kiauri Dubu nou se ie, mo neito nou ri ou pua urubia ro mo wisa tato woko emesioidiro ri. Mo a-nou-ro urubia wisa tato woko mo ro imesioidiro ri, ibose mo keremiro aiwai ri sirio urubia ubauba aboudo iapopo ri.'

Iesu ro idomari pogo dubu teibo meana giwai-ma

²⁹ Iesu kowasoro urubia mutu Ieriko sabowa rido na-gosuruwo-birimo, urubia sirio ro nou saro rido aise gobodoro-rimo.

³⁰ Isana netewa teibo idomari pogo dubu teibo gabo bara ato gomidiro-rido. Neitiro umoro na-goi-rido ibo neitiro Iesu ro a-nirohodorai-madie, taie neitiro auna se Iesu aboto nato giaiauti-rido, 'Abera Naramu, oro Godi ro kohodowa dubu e! Neitiro natonato dimati-marol'

³¹ Neitiro edi kiaiauti ro urubia ro na-gimororowai-marimo, neio ro aise gimadohuti-marimo. 'Ei! Deremasiai-do! Owera na ie!'

Kaupoti neitiro neio ro pupuwo bo gimowaititi-marimo. Neitiro ina auna ia se nato giaiauti-rido, 'Abera Naramu, oro Godi ro kohodowa dubu e! Neitiro natonato dimati-marol'

³² Neitiro kiaiauti owera Iesu ro na-gimororowai-ma, nou gabo ato aise gotobowa. Taie neitiro nou ro aise girumai-marol. Nou ro ibo, 'Nitiro mo ro beda sosoro iwarebai-mari ra?'

³³ Neitiro ro ibo, 'Abera Naramu, neitiro ubi ie idomari mea se kirarowo.'

³⁴ Neitiro nirimagare gimati-marol, taie idomari Iesu ro iato gimowasomai-ma. Neitiro idomari edi tau ato gimowasomai-ma, neitiro idomari meana aise goi-rido, namabu mea se imese giauri-rido. Taie neitiro ro Iesu saro rido imese gobodoro-rido.

21

Iesu eputa dubu to godoro Ierusarema sabowa to

¹ Iesu kowasoro urubia mutu Ierusarema sabowa to ido to gorowateai-birimo. Tauo

kebase neibi Betepage sabowa to gou-birimo. Betepage sabowa Oribi Podo gomo ato gowamo. Neibi iedi sabowa ro neito orowateai pua, Iesu ro netewa teibo kowasoro dubu teibo gabo ipi ato keba se ioudo gimeriai-marō Betepage sabowa to.

² Neitiro kebase nou ro ibo gitomudiro-ma, 'Nitiro edi sabowa ro neito namado-orowateai-ri, nitiro ro orio doniki kainai amado-owea-ri mamu mutu, nou hodo to kemobuai ama-otoi-ri. Ba-dimopurutai-marido, mo aboto neito ba-diwaguwo-marido.

³ Nitiro ata dubu ata ro nama-imodowa-mari ibo, "Nitiro ro edi doniki teibo ro etou mabu ato imopurutai-mado?", ibo ba-demowameai-do, "Abera Naramu ubi ie neitiro egea mere se kiworohuti-ma, ina nou ro amadi-imowameai-mari." '

⁴ Kibase Godi ipusu owerā urubia ro na-gisioidiro-rimo Tarena Buka ato, tanaro morobise to noti gororosiodiro-dumo ibo,

⁵ *Ierusalemā sabowa urubia dimowapotai ibo, Nio eputa dubu doniki kainai ohu ato tomidiro-die muro se noto ou-die.*

⁶ Taie iedi kowasoro dubu teibo ro ioudo kebase gasiriai-rido Betepage sabowa to. Neitiro ito na-gorowateai-rido, Iesu ro beda owerā to gimowauti-ma ibose to gisioidiro-rido.

⁷ Neitiro ro edi doniki teibo ro Iesu aboto imese giwaguwo-marido. Iesu aboto na-giwateai-marido, neitiro simara ohu obotama orio doniki kainai gimini ato aise gisouti-rido. Taie Iesu edi doniki kainai ro nou ohu ato aise gomi.

⁸ Nou doniki ohu ato beda tau ato gomi, auna ia dubu patu Iesu kou gabo ato obotama aise gisouti-rimo. Ibose arua urubia ro ota puara aise gisouti-rimo Iesu kou gabo ato, nou kemowabu sapuwo to.

⁹ Iesu edi urubia ro gowaboi-rimo, arua keba se arua saro rido nou neio ro turi ato goumai-rimo. Neio ro nou a-gemowabu-rimo, kamade ri nato giaiauti-rimo ibo, 'Oro Godi ro kohodowa dubu nouse ie, nimo ro memowabu-rimo! Oro Godi ro korosa ta-gomia! Abera Naramu pupuwo mutu oro nou ro se tou-die! Oro se memowabu-rimo!'

¹⁰ Iesu Ierusalem sabowa to na-godoro, nou urubia sirio ro na-gowea-rimo, neio erere kimaragoidiro giworohuti-rimo. Neio ro ibo, 'Nedi dubu ro beda dubu ra?'

¹¹ Iesu edi urubia ro gowaboi-rimo neio ro ibo, 'Nou Iesu e, nou ata Godi ipusu oweru dubu e. Nou Nasareta sabowa dubu e, Gariri duriomoro ato na-owamo.'

Tarena Moto ato namabu korowamade urubia Iesu ro gimabodoidiro

¹² Iesu Ierusalem sabowa to edi kodoro ro na-godoro, nou aise gemobodiai Tarena Moto to. Nou ro urubia sirio iato giwia, neio namabu mani to gorowamade-rimo. Arua neio a-geremahudirio-rimo erere duriomoro mani to. Nou ro mani kiamo moro, dumu pawa korowomidiro moro mutu, aise giatutubo.

¹³ Nou ro ibo nedi urubia ro neio aboto, 'Tarena Buka ato oweru keba se ta-gisoidiro-rimo ibo, *Mo moto owamo ibo*

urubia Godi aboto kararatoro moto ie. Kaupoti nio ro piro urubia agabea to gapoi-rimo.'

¹⁴ Iedi tau ro nato Tarena Moto ato idomari pogo urubia, sairo ubauba urubia Iesu aboto ta-gou-rimo meana iwaititi ri, taie neio Iesu ro meana aise giwaititi.

¹⁵ Godi ra urubia ra turituri awawo urubia ibose Mose sabi kitamudiro urubia, neio iato ibose to gorowomidiro. Neio ro Iesu iato ta-giauri-rimo awawo meamea tanaro na-gisoidiro. Ibose merebusere kainakaina na-giaiauti-rimo Tarena Moto goro ato ibo, 'Oro Godi ro kohodowa dubu e, nimo ro memowabu-rimo!'

¹⁶ Iedi eputa urubia ro idaibo ower a na-girowidiro-rimo merebusere kainakaina ro na-giaiauti-rimo, neio auna serawo goi-rimo. Neio ro ibo Iesu aboto, 'Merebusere kainakaina gare ma-dimedea, beda ower a to hata iaiauti-dumo? Dimadowerai! Mororodiobo-mo!'

'To neio mo ro gare ti-nimedea. Ina nio ro ower a Tarena Buka ato kioputi ra ibo na-iamo? *Merebusere kainakaina, ibose nono kidio bamuai kainakaina mutu, neio oro ro gitamudiro idaibo kemowabu ower a iaiauti ri.'*

¹⁷ Taie Iesu ro Tarena Moto aise gemeserai, imese godori-ro Betani sabowa to, nou duwo kaupoti iato gorobu.

Pigi ota Iesu ro gatodai

¹⁸ Ata saiki na-gowaroho kowaroho duwoduwo ato, Iesu Betani sabowa goro rido na-gosuruwo-ro, ina imese gidiai Ierusarema sabowa to. Ipi gabo ato nou sogoi ro gorobai.

¹⁹ Ina gabo bara ato nou ro pigi ota ta-gowea, nou aboto imese gou pigi gumuni iosora ri. Ohu to na-gawota puara patupatu gotoi, ata iopu tato ie. Taie iedi ota ro nou ro nato gatodai ibo, 'Oro mo ro a-nemowapotai, iopu oro aboudo kiasesuti gabo a-nopai.' Tutura to owamo pua iedi pigi ota ro aise garawo, penepene imese gotoi.

²⁰ Kowasoro urubia ro na-gowea-rimo iedi pigi ota ro karawo na-gotoi, neio kimaragoidiro ro giopia. Neio ro ibo, 'Nedi pigi ota ro hio to beda sosoro arawo?'

²¹ Iesu ro neio ibo gimowameai, 'Nio mo ro morobise oweru mimowapotai-ro! Nio abato morobise kimibiria na-iamo, ataata kimaragoidiro tato, nou se pua beda tanaro ro ororosioidiro pigi ota aboto. Nio modobo koi ie podo aboto kutura ibo, Podo, obo to dodori!, ina iedi podo ro oro oweru to obo to kodori ie.

²² Ina nio abato morobise kimibiria na-iamo, ataata kimaragoidiro tato, nio ro Godi etou nakomu ri kararatoro ra, nio ro mea wisa nou aboudo kiauri ie.'

Iesu ro urubia etu ubi ato gimabodoidiro Tarena Moto rido?

²³ Iesu Tarena Moto to na-godoro urubia nou ro iato gitamudiro. Nedi kitamudiro ro na-gitamudiro, Godi ra urubia ra turituri awawo urubia, sabowa kiauri awawo urubia mutu, neio Iesu aboto nato gou-rimo. Neio ro Iesu nato gemodowa-rimo, 'Oro ro Tarena Moto ato urubia na-giaipirio, namabu na-giatutubo, etu ubi ato gisiodiro?'

²⁴ Iesu ro neio owera ibo gimowameai, ‘Tauo nio mo ro mimodowa-ro, mo nio ro wisa owera namadidimo-owameai-ri, nio wisa mo ro nato nama-imowapotai-ri ibo mo etu ubi ato nisioidiro edi tanaro ro.’

²⁵ Taie neio Iesu ro nato gimodowa, ‘Ioane obo to kiwarumiauti dubu, etu ubi ato gisioidiro urubia nou ro obo to na-iwarumiautiti? Godi Adiri sabowa ato na-omidiro-die nou aboudo ra, o urubia aboudo ra?’

Neio ro nedi owera ro na-girorowai-rimo, neio nakara se iato geremowauti-rimo. ‘Nimo ro ibo namadimu-utura-ri, “Godi aboudo ie,” nimo nou ro ina anamadi-imodowa-ri ibo, “Ina mabu boira Ioane owera nio ro imibiria tato na-iamotiti?”

²⁶ Ina nimo ro ibo namadimu-utura-ri, “Urubia aboudo ie,” nimo tere ie nedi urubia sirio nato na-orowotoi neio aboto, etu umoro ra neio aboudo ubauba anamadimo-owea-ri. Mabu neio auna se imaragoidiro-dumo ibo Ioane Godi ipusu owera dubu e.’

²⁷ Taie neio ro Iesu ibo gemowameai-rimo, ‘Ioane ro etu ubi ato gisioidiro nimo umoro pua.’

Iesu ro neio ibo gimowameai, ‘Ina nio mo ro imowapotai-ri pua nedi tanaro ro mo ro etu ubi ato nisioidiro.’

Totomu mere teibo sapuwo to ie

²⁸ Iesu ro neio owera aise gimowautiwado Godi ra urubia ra turituri awawo urubia, sabowa kiauri awawo urubia mutu. Taie neio nou ro nato gimodowa, ‘Nedi totomu ro nio ro maumo mea se nou ba-demaragoidiro-mo. Ata dubu netewa teibo mere teibo giworohuti-ma. Taie karasomai abera, naramu dubu aboto nato

gou-ro, nou ro ibo, "Mere, gereipi pari abora oro ro ama-emowati-ri."

²⁹ Nou ro ibo, "Ei, mo ubi tato ie." Kaupoti iedi mere ro kimaragoidiro ina aise giwesegerai, taie imese gou pari emowati ri.

³⁰ Karasomai abera ina neama dubu aboto nato gou-ro, nou ro atu sosoro oweri nato gutura, "Mere, gereipi pari abora oro ro ama-emowati-ri." Iedi saro mere ro abera ro ibo gemowameai, "Io anama-emowati-ri." Kaupoti pari nou ro emowati pua, oweri kawa gutura.

³¹ Iedi mere teibo ro kiauri-ma ato, abera ubi tanaro etu ro gosioiro?

Neio ro ibo, 'Keba mere.'

Iesu ro neio ibo gimowapotai, 'Nio mo ro morobise oweri mimowapotai-ro! Ubauba urubia idaibo takesi kimade urubia, era gabo mamio, ubauba aboudo neio ro erewesegere-dumo, nio neio ro imatuti-dumo ina Godi edi kiwabo maumo ro neito odoutiti-dumo.

³² Ioane nio aboto egea se gou-ro, nio nou ro ta-imasoutiti mea tuputupu gabo boido aidiro-die, nou obodoro ri. Kaupoti nio ro nou oweri imibiria pua. Takesi kimade urubia, era gabo mamio mutu, Ioane oweri neio ro gimibiria-rimo. Neio edi tau ato gerewesegerai-rimo ubauba aboudo nio ro ta-giauri-rimo. Kaupoti nio ubi tato goi-rimo nou oweri kimibiria aboto, ina ubauba aboudo nato erewesegerai pua.'

Pari ubauba urubia ro emeaurititi-mo nou totomu e

³³ Iesu ro neio ibo gimowauti, ‘Dirowidiro-mo! Nio mo ro ata totomu anama-imowauti-ri. Duriomoro abera nou simara goto kere ato gereipi pari nato gosioidiro. Iedi pari ro kara to ta-gemowagegeidiro, nou ro bobo na-goboba gereipi iopu kituti moro ie. Ina ohu moto kainai iato gididi pari ioudo kiauri sapuwo to. Nou pari emeauri na urubia nou ro iato girobai. Taie nou koroho aboto ata duriomoro to imese gaimai.

³⁴ Gereipi edi pari ato na-gorowotoi, gumuni na-girobai, taie pari abera ro sowake urubia nato gimeriai pari kemeauri urubia aboto, simara sapuwo rido gereipi gumuni emodoho ri.

³⁵ Pari kemeauri urubia ro sowake urubia na-giwia-rimo, neio ro aise girobai-rimo. Ata dubu ubauba mino to gado-birimo, ata gesuai-birimo, ata dubu nadi to gobo-birimo pamo nato gowea.

³⁶ Taie ina pari abera ro arua sowake urubia nato gimeiriai, kebase sipu tato gimeiriai-bi, nedi tau ro nato sipu mere se gimeiriai-bi. Pari kiauri urubia ro iedi sowake urubia ro na-giwia-rimo, atu sosoro tanaro to ibose to giworohuti-rimo.

³⁷ Taie iato nou simara ia mere saro ia rido nato gemeiriai. Nou ro ibo, “Mo ia simara mere anama-emeiriai-ri, nou neio ro mea mino to amadimi-iauri-ri.”

³⁸ Kaupoti nou neio ro na-gowea-rimo, neio nakara se iato geremowauti-rimo ibo, “Nedi mere ro abera edi namabu sirio ro nou ro ama-irahidimai-ri. Mou-rimo anamadimo-opia-ri. Taie nedi pari ro nimo do to nato ama-ararapoi-ri.”

³⁹ Taie iedi mere ro kara goro rido
na-geherai-rimo iato aise gopia-rimo.

⁴⁰ Ina noudo ie pari abera
namadi-orowameai-ri, nou ro etou tanaro
amadi-osioihiro-ri pari kemeauri urubia aboto?’

⁴¹ Godi ra urubia ra turituri awawo urubia,
sabowa kiauri urubia mutu, Iesu owera neio ro
ibo gemowameai-rimo. ‘Nedi ubauba urubia ro
neio nou ro ama-iopiauti-ri. Ina nedi pari ro nou
ro arua urubia aboto ama-iapoi-ri emeauri ri.
Pari ato gereipi gumuni namadimo-oi-ri, neio
umoro ie pari abera neio ro sapuwo
amadime-emodoho-ri, ina sapuwo neio do ie.’

⁴² Iesu ro ibo neio aboto, ‘Tarena Buka ato
owera na-iamo nio ro keremoputi pua ra? *Moto
keremari urubia ro edi nadi ro
na-gowatobetai-rimo kakate moro ato
na-owamotiti, iedi moto ro edi nadi ro kowotoi ie.
Ina Abera Naramu Godi ro nedi tanaro ro
gosioihiro. Nimo ro nedi tanaro ro
na-niauri-dumo, imese meana ia tanaro ie.*

⁴³ Iesu ro owera ina neito gopai, ‘Ina noudo ie
nio mo ro nedi owera ro nou mimowapotai-ro,
Godi ro kiwaboi tanaro nio aboudo
ama-iwagare-ri, arua urubia Godi edi kiwaboi
tanaro ro nato neio ama-imapoi-ri. Godi edi
kiwaboi maumo ro nato neio ro Godi ubi tanaro
amadimi-isioidiro-ri.

⁴⁴ Ibose nedi nadi ro nato beda urubia ro
irohumo-dumo, neio imese moro to
amadime-eresebuti-ri. Nedi atu nadi ro nou ro
beda urubia imahidimo, neio imese moro to
ama-ipatarumowado-ri.’

⁴⁵ Nedi totomu owera ro Godi ra urubia ra
turituri awawo urubia, Parasi urubia mutu, neio

ro na-girowidiro-rimo Iesu aboudo, neio ta-geremasibai-rimo ibo, nedi totomu ro pari ubauba urubia ro na-emeaurititi-mo, nimo sapuwo to orowauti-die.

⁴⁶ Taie iato neio gabo giosora-rimo Iesu orobai ri, koto aboto nato owou rie. Kaupoti neio ro urubia tere ta-gimati-rimo, mabu urubia sirio ta-gimibiria-rimo ibo Iesu nou Godi ipusu oweru dubu ata nouse ie.

22

Totomu marete soriomu sapuwo to ie

¹ Iesu ro totomu na-imowautiti maumo mutu e. Ina nou ro ata totomu nou gimowauti.

² 'Godi edi kiwabo i tanaro ro nou idaibo sosoro ie. Ata duriomoro eputa dubu, auna soriomu simara mere marete koi sapuwo to nato gemododiai.

³ Nou keremododiai woko na-goporeai taie nou ro sowake urubia nato gimeirio nou ubi urubia irobo ri nedi soriomu ro nou aboto ou ri.

Kaupoti neio ubi tato goi-rimo,

⁴ taie nou ro ina arua sowake urubia nato gimeiriai, nou ro ibo, "Mo ro kebase edi urubia nirumai ina ba-dimowapotaiddiro-mo ibo ohona neio sapuwo to tau kimododiai ie. Meamea kasawi ia kiwoubua burumukau neio sapuwo to tau kimopiauti ie. Imese namabu patu neio sapuwo to modobo tau kiwai ie, neio aise ba-mou-rimo!"

⁵ Kaupoti neio gare iado pua nedi tanaro ro nou sapuwo to, simara ubi tanaro

gimaragoidiro-rimo. Ata dubu nou simara woko gisioihiro, ata pari aboto gou.

⁶ Arua ro nedi sowake urubia ro aise girobo-rimo, ubauba mino to giado-rimo, ina aise giopiauti-rimo.

⁷ Soriomu abera ro nedi owera ro na-girorowai, nou auna ia serawo ro gorobai. Taie nou ro boso urubia nato gimeiriai nedi kiopiauti urubia ro neio ro iopiauti ri. Neio ro imese aise giopiauti-rimo. Ibose neio edi sabowa gebari ro era to aise gosubuwa-rimo.

⁸ Ina duriomoro eputa dubu ro arua sowake urubia iato gimowapotai ibo, "Soriomu ohona sirio imese tau kimododiai ie. Mo ro edi urubia nirumai neio neito orowateai pua. Neio meamea urubia pua nedi soriomu ohona ro nou kiho aboto.

⁹ Abora nio mo ro a-nitiodorai beda urubia ro namadimi-iwia-ri gabo ipi ato na-orocho-dumo, nedi soriomu ro nou aboto neio aise ba-mou-rimo!"

¹⁰ Taie nedi owera ro neio ro na-girorowai-rimo, imese gaimai-rimo. Beda urubia giauri-rimo gabo ipi ato na-gorocho-rimo, idaibo ubauba urubia, meamea urubia, neio ro aise girobo-rimo, imese giwou-rimo nedi soriomu ro nou aboto. Taie iedi soriomu moto ro aise girotomuai.

¹¹ Tuturu to owamo pua iato edi eputa dubu ro nou ro godoro-ro kiroru urubia iraturioma ri. Nou na-giraroweauti, nou ro ata dubu nato geibimai marete soriomu obotama kiroiti tato gomidiro.

¹² Eputa dubu ro ibo, “Namutuna, oro marete sorionu obotama iroiti pua. Ina oro beda mabu ato odoro-die neito?”

Iedi dubu ro nou ro eputa dubu oweru na-gemororowai, nou oweru tato imese gomidiro.

¹³ Taie eputa dubu ro sowake urubia iato gimowapotai, “Nedi dubu ro tu ra sairo ra demotohiti-mo. Temeteme iamo beda moro ato imaro-dumo, ibonoro kirikiriri na-iwaro, iedi duwoduwo moro ro neito deherai-mo!”

¹⁴ Iesu ro oweru neito gopai, ‘Sirio urubia Godi ro tiroru-die sekere, kaupoti neio mau mo rido sipu tato urubia nou ro tihoduti-die.’

Iesu Parasi urubia ro gemodowa-rimo takesi mani kiaremo sapuwo to

¹⁵ Parasi urubia ro Iesu na-gemeserai-rimo, nakara moro ato oweru iato geremowauti-rimo Iesu neio ro korobai sapuwo to. Neio ubi a-giamo Iesu ro ata ubauba oweru kutura, ina gabamani dubu aboto nato owou rie.

¹⁶ Taie neio simara sowake urubia Herodi kowarebai urubia mutu Iesu aboto nato gimeiriai-rimo. Iedi karatigi urubia ro Iesu aboto nato gutura-rimo ibo, ‘Kitamudiro dubu, nimo umoro ie oro morobise dubu e. Ibose oro ro Godi ubi gabo morobise to itamudiroiti. Arua urubia oro ro iadodorowado pua, oro neio ro kageawado aboto. Mabu imese urubia oro ro atu mino to tiworohutiti.

¹⁷ Ina noudo ie nimo oro ro ma-dimowapotai-ro, modobo ra nimo ro takesi mani kiaiwo Roma gabamani eputa dubu Sisa aboto?’

18 Kaupoti neio edi ubauba kimaragoidiro ro Iesu ro keba se ta-gimowea. Nou ro ibo, 'Nio imese auna karatigi urubia ie! Mabu boira mo nio ro na-nowaibirio-dioumo?

19 Mani iopu ata takesi edi na to imadetiti-dumo, neito ma-dowou-rimo.'

Taie mani iopu iato gemowou-rimo.

20 Iesu ro ibo, 'Mani iopu ato etu asaso ro ateidiro, ina etu masiro ro owamo?'

21 Neio ro ibo, 'Sisa asaso ro ateidiro masiro mutu.'

Iesu ro ibo, 'Ina noudo ie beda nakomu ra Sisa do ie, Sisa aboto gi-aiwai-ri. Ina beda nakomu ra Godi do ie, Godi aboto gi-aiwai-ri.'

22 Neio ro nedi oweru ro na-girorowai-rimo, neio imese giwaweauti-rimo. Taie Iesu neio ro aise gemeserai-rimo, ata moro to imese gorowadau.

Pamo rido kireruburio kararatoro oweru ie

23 Sadusi urubia ibo imibiria-dumo, urubia dubu na-waraburai nou ina keremiro owea-ri pua. Taie edi atu saiki ro nato, Sadusi urubia kararatoro oweru mutu Iesu aboto nato gou-rimo.

24 Neio ro ibo, 'Kitamudiro dubu, Mose ro Godi oweru ta-giatiti sabi maumo ato ibo, urubia dubu na-waraburai, nou orobo garamu na-emeserai-die mere besere tato, iedi garamu orobo ro neama ro ba-medea. Neama ro edi merebusere ro na-irasomai iedi orobo ro nou abato, nou merebusere to ararasoro-ri pua, naramu merebusere to kararapoi ie.'

25 Neio ro ina ibo, 'Ata tau 7 naminiramio neio ro gorowomidiro. Naramu dubu ro gedea orobo

kebase, iato nou aise garaburai. Ina edi garamu orobo ro neama ro aise gedea.

²⁶ Iedi neama ro nou mutu tuturu to omidiro pua, nou aise garaburai. Ina iedi atu garamu orobo ro ata neama ro aise gedea. Ina iedi neama ro nou mutu tuturu tu omidiro pua, nou aise garaburai. Iedi garamu orobo ro 7 naminiramio ro karemo to ta-gororoporeai.

²⁷ Saro to edi garamu orobo ro aise garaburai.

²⁸ Nimo karatoro owera ibo ie, Urubia pamo rudo Godi ro edi tau ato namadi-iwameai-ri, iedi orobo ro 7 tau to naminiramio ro ta-garemo-rimo, ina nou etu orobo to ama-ararasoro-ri?'

²⁹ Neio Iesu ro ibo gimowameai, 'Nio morobise gabo ato ou pua, karasaubuti gabo ato ou-dumo. Mabu nio umoro pua Godi edi owera ro Tarena Buka ato na-iamo. Ibose nio umoro pua Godi edi pupuwo korosa ro.

³⁰ Urubia Godi ro pamo rudo namadi-iwameai-ri, neio Godi sowake urio Adiri sabowa ato na-irowomidiro, neio sosoro ama-irowomidiro-ri, kararemo tato.

³¹ Kaupoti urubia Godi ro pamo rido kiwame tanaro sapuwo to, nio ro owera keremoputi pua ra Tarena Buka ato na-iamo? Godi ro kebase owera nio aboto ta-gowapotai-ro ibo,

³² *Aberaham, Aisaki, Iakobo, mo neibi ro ti-nemowabutiti-bimo.* Neibi ta-gorowaburo-birimo, ina abora neibi keremiro ie. Godi abora neibi ro temowabu-bimo, mabu imese sirio urubia neio abora teremiro-dumo Godi sosoro gabo ato. Urubia abora

na-orowomidiro, urubia na-gorowaburo-rimo, neio atu se Godi ro tiauri-die.'

³³ Urubia sirio ro na-girorowai-rimo Iesu edi kitamudiro owera ro, neio kimaragoidiro ro giopia.

Nedi tanaro teibo ro auna tanaro teibo ie

³⁴ Sadusi urubia Iesu owera to edi tau ato na-giwaweauti-rimo, Parasi urubia ro edi owera ro ta-girorowai-rimo. Taie neio atu moro to nato na-garadabuti-rimo,

³⁵ ata dubu Iesu aboto neio ro nato gotiodorai-rimo. Nedi dubu ro Iu urubia edi sabi sirio ro auna umoro ie. Nou ubi ie Iesu owaibia ri, noudo ie nou kararatoro owera mutu kou Iesu aboto. Nou ro ibo,

³⁶ 'Mose sabi imese sirio ia ie, ina nou maumo ato auna sabi beda sabi ra?'

³⁷ Iesu ro nedi dubu ro ibo gemowameai, 'Godi nirimagare kemati modobo ie morobise giropu to, morobise ubi to, morobise kimaragoidiro to, imese nou aboto kiaiwei modobo ie.

³⁸ Godi edi sabi sirio maumo ato na-owamo nedi sabi ro imese auna ia sabi ie.

³⁹ Ina ata sabi nou maumo ato na-owamo, nou e. *Modobo ie arua urubia oro ro nirimagare kimati, oro nirimagare nakara se beda sosoro eremati.*

⁴⁰ Mose edi sabi sirio ro ibose Godi ipusu owera urubia ro edi buka owera sirio ro na-gisioidiro-rimo, iedi auna sabi teibo ro neitiro aboudo irobu-die.'

Godi ro Kohodowa Dubu nou etu nasa ra

⁴¹ Parasi urubia ina atu moro to nato garadabuai-rimo. Taie neio Iesu ro nato gimodowa,

⁴² 'Godi ro kohodowa dubu nou etu nasa ra? Nio beda sosoro imaragoidiro-dumo?'

Neio ro Iesu ibo gemowameai-rimo, 'Nou Deibidi nasa ie.'

⁴³ 'Ina mabu boira Deibidi Tarena Urio ro kutura oweru umoro na-gowai ibo Godi ro kohodowa dubu Deibidi Abera Naramu e? Mabu Deibidi ro oweru ta-giatiti Tarena Buka ato tiamo ibo,

⁴⁴ *Godi ro ta-gutura mo Abera Naramu aboto, Oro mo tumodi sapuwo ato ba-domidiro womu tato oro nasa urubia mo ro nama-iturai-ri oro sairo mabu ato.*

⁴⁵ Deibidi ro Godi ro Kohodowa Dubu Abera Naramu to gasoro. Ina mabu boira arua urubia ro ibo na-warodumo ibo nou Deibidi nasa ie?'

⁴⁶ Ata dubu ata ro Iesu kemodowa oweru modobo pua wisa kemowameai aboto. Iedi saiki ro neido ata dubu ata modobo pua nou aboto kou kemodowa oweru mutu.

23

Iesu ro sabi kitamudiro urubia sapuwo to koko oweru gimia

¹ Taie Iesu ro urubia sirio, nou kowasoro urubia mutu neio aboto koko oweru nato garo. Nou ro ibo,

² 'Mose sabi kitamudiro urubia, Parasi urubia mutu neio masiro mutu urubia ie, Mose edi sabi sirio ro urubia aboto kimabuti sapuwo to.

³ Ina noudo ie neio edi oweru ro nio ro aise kibodoro modobo ie. Kaupoti neio ro edi tanaro

ro na-isioidiro-titi-dumo nato aise imatiouti mamō. Mabu neio ro beda owerā karo ra, durupi to tanaro aise isioidiro-ri pua.

⁴ Neio ro urubia auna se kimediawado ie Mose sabi sirio koko mino to kibodoro aboto. Ina urubia mibo ohu rido aise imotomotiti-dumo. Kaupoti neio tu iaiwo-ri pua nedi urubia ro kiwarebai aboto.

⁵ Neio ro beda tanaro sirio isioidiro-titi-dumo, neio ubi ie urubia ro imowabu ri. Idaibo neio ro pauso witoro ato Godi edi sabi owerā ro peba titi kainakaina to kisioidiro ie, Iu urubia sirio ro beda sosoro isioidiro-titi-dumo. Ina neio iedi pauso ro boroboro ta-giwaititi-rimo, urubia ro kimowabu aboto. Ibose Iu urubia sirio isitoro simara ohu obotama rido iremebutiti-dumo, Godi edi sabi sirio ro kimaragoidiro sapuwo to. Kaupoti sabi kitamudiro urubia, Parasi urubia mutu, neio ro simara isitoro tututu nakara se irimowaititi-dumo, urubia ro kimowabu aboto.

⁶ Soriomu tau ato neio auna ubi ie meamea komidiro moro kimaberewado, ibose Iu urubia karadabu moto ato.

⁷ Ibose neio auna ubi ie kamade owerā to kiatoro maketo moro ato, ina urubia ro kitamudiro urubia to kiasoro.

⁸ Kaupoti nio sapuwo to owerā ibo ie, mo nio ia morobise kitamudiro dubu kaupoti nouse ie, ina nio naminiramio ie. Ina noudo ie nio modobo pua arua urubia ro kitamudiro urubia to kiasoro.

⁹ Ibose nio ro abera to ata sopu duriomoro dubu ata apoi mamō. Mabu nio Abera kaupoti nou se ie, Adiri sabowa ato na-omidiro-die.

¹⁰ Ibose nio ro ata dubu kitamudiro dubu to apoi mamō, mabu nio kaupoti kitamudiro dubu

mutu e, Godi ro kohodowa dubu nouse ie.

¹¹ Abora nedi tau ro nato nio abato awawo urubia to edi urubia ro ararasoro-dumo, neio ro nio wisa tato woko ba-mimesioidirotiti-mo.

¹² Ibose abora awawo to nakara se edi urubia ro ararasoro-dumo, neio Godi ro sopu to amadi-iwororuwo-ri. Ina ibose etio ra sopu to nakara se na-orowororuwoidiro-dumo, neio Godi ro awawo masiro ama-imio-ri.'

Iesu ro Mose sabi kitamudiro urubia Parasi urubia mutu gimaiauti

¹³⁻¹⁴ 'Mose sabi kitamudiro urubia Parasi urubia mutu, auna ubauba nio ro amadimo-owea-ri! Nio imese karatigi urubia ie! Urubia ubi ie Godi edi kiwaboi tanaro ro neito kodouti. Kaupoti neio kodouti aboto gabo nio ro imoputi-dumo. Nio ia ibose, ito odouti pua.

¹⁵ Mose sabi kitamudiro urubia Parasi urubia mutu, auna ubauba nio ro amadimo-owea-ri! Nio imese auna karatigi urubia ie! Obo ipi ato na-irarasiouti-dumo duriomoro sirio nio ro tiporeai-dumo pe to koroho ibose sairo to koroho, womu tato dubu kaupoti nio ro na-wageai-dumo nio kiwasoro aboto. Ina nio kiwasoro dubu to na-wararapoi, nedi dubu ro nio ro emododiai-dumo era paruo to ou rie. Nio ro idaibo tanaro na-isioidiro-dumo, nio nou ro kirohodorai ie ubauba tanaro kisioidiro mutu era paruo to kou aboto.

¹⁶ Nio ro urubia iwaboi-dumo, kaupoti nio idomari pogo urubia ie! Urubia nio ro duwoduwo maumo to iwaguwo-dumo. Ina noudo ie auna ubauba nio ro amadimo-owea-ri. Urubia nio ro ibo itamudiro-dumo, urubia dubu ro hodo kemasaubiai owera karo ato, nou

Tarena Moto masiro na-wapoi nou owera pupuwo kowai sapuwo to, nou dorogora owera karo ie. Ina nio ro ibo, urubia dubu ro nou simara hodo kemasaubiai owera nama-esebea-ri, io modobo ie, ata ubauba tato ie. Ina nio ro urubia ibose to itamudiro-dumo, urubia dubu ro hodo kemasaubiai owera karo ato, gorodi nadi Tarena Moto ato na-iamo, nou masiro na-wapoi nou owera pupuwo kowai sapuwo to, taie nou ro neito koko ta-wowai, nou edi kemasaubiai owera ro ba-mobodoro.

¹⁷ Nio imese bokiki tato urubia ie! Pogo urubia ie! Auna nakomu etou ra, gorodi ra o Tarena Moto ra? Gorodi Tarena Moto ato na-iamotiti, neio Tarena Moto ro iwaititi tarena.

¹⁸ Ina nio ro ata tanaro ibose titamudiro-dumo, ata dubu ro kemasaubiai owera kutura ato, nou ro tarena patapata kimatowo moro masiro na-wapoi, nou owera pupuwo kowai sapuwo to, nou dorogora owera karo ie. Ina nio ro urubia ibose to itamudiro-dumo, urubia dubu ro hodo kemasaubiai owera karo ato, kimatowo namabu masiro na-wapoi nou owera pupuwo kowai sapuwo to, taie nou ro neito koko ta-wowai, nou edi kemasaubiai owera ro ba-mobodoro.

¹⁹ Nio imese pogo urubia ie! Auna nakomu etou ra, kimatowo nakomu ra o kimatowo patapata ra? Io, kimatowo patapata ie! Mabu dao patapata ro kiwai ie tarena, Godi aboto kiaiwo sapuwo to.

²⁰ Ina noudo ie etu ra tarena patapata masiro na-wapoi nou kemasaubiai owera pupuwo kowai sapuwo to, tarena patapata masiro se

apoi-ri pua, nou ro beda kiaiwo nakomu na-iamo patapata ato, nou masiro ibose to kiapoi ie.

²¹ Ina ibose etu ra Tarena Moto masiro na-wapoi nou kemasaubiai oweru pupuwo kowai sapuwo to, nou Tarena Moto masiro se apoi-ri pua, nou ro Tarena Moto goro ato etu ro imidirotiti, nou masiro ibose to kapoi ie.

²² Ina ibose etu ra Adiri sabowa masiro na-wapoi nou kemasaubiai oweru pupuwo kowai sapuwo to, nou Adiri sabowa masiro se apoi-ri pua, nou ro Godi edi komidiro nakomu ro ibose to kapoi ie, ina nedi komidiro nakomu ro etu ro nou ato na-imidirotiti, nou masiro ibose to kapoi ie.

²³ Parasi urubia Mose sabi kitamudiro urubia mutu, nio imese karatigi urubia ie! Nio ro auna ubauba amadimo-owea-ri. Nio ro pari ato kibouti ie ohona topo kiwaititi namabu kainakaina, idaibo gasaro. Nio ro kidabuti ie, takamai kiamotuti ie, kioputi ie ibose iato kihoduti ie. 10 soirio to na-ihoduti-dumo ata soirio Godi aboto kaiwai sekere. Kaupoti nou edi awawo sabi ro nio ro huru gimowou-rimo. Idaibo tuputupu tanaro nio ro kisioidiro pua arua urubia aboto, urubia nio ro nirimagare kimati pua, ibose nio ro Godi edi oweru ro durupi to mea se kisioidiro pua. Nedi awawo sabi ro nio ro ba-gibodoro-rimo. Ina ibose kainakaina sabi nio ro kibodoro modobo ie.

²⁴ Nio ro urubia iwaboi-dumo, kaupoti nio idomari pogo urubia ie! Nio idaibo sosoro ie, emume kaupoti obo panikere to korodobia ato, nio ro hio ito kidimai ie. Kaupoti nio ro kemoro

momuo se komodiai ie obo mutu kodio ie.

²⁵ Parasi urubia Mose sabi kitamudiro urubia mutu, nio imese karatigi urubia ie! Nio ro auna ubauba amadimo-owea-ri. Nio ro mereki ra panikere ra ohu se iwioutiti-dumo, maumo kiwiouti pua. Mabu arua urubia namabu nio ro pupuwo to iwasitititi-dumo, ina simara ubi tanaro ro iwaboioihiro-dumo.

²⁶ Parasi urubia, nio imese pogo urubia ie! Kibase nio ubauba aboudo ba-derewesegerai-mo. Nou idaibo sosoro ie, mereki ra panikere ra goro mea se kiwiouti-ma ato, taie ohu marea tato amadimo-oi-ri.

²⁷ Mose sabi kitamudiro urubia Parasi urubia mutu, nio ro auna ubauba amadimo-owea-ri. Nio pamo urubia bobo ede sosoro ie, keakea penita to ta-giadiriti-rimo. Bobo ohu urubia ro na-iauri-dumo imese meana ia ie. Kaupoti bobo maumo ato pamo durupi na-epuse soro mutu, nio idaibo sosoro ie.

²⁸ Nio urubia ro ohu takamai na-imiauri-dumo, taie nato karo ie ibo nedi urubia ro mea tuputupu urubia ie. Kaupoti nio maumo ato karatigi tanaro auna ia se isioidiro-dumo, ina sabi nio ro auna se isebo-dumo.

²⁹ Mose sabi kitamudiro urubia Parasi urubia mutu, nio karatigi urubia ie! Nio ro auna ubauba amadimo-owea-ri. Nio edi nasaio ro Godi ipusu owera urubia neio ro ta-iopiautiti-mo, ina neio bobo ohu ato nio ro awawo keremasoro namabu timesioidiro-titi-dumo. Ibose meamea tuputupu urubia neio bobo ohu ato kakamu nio ro imobouti-dumo.

³⁰ Nio ibo iaro-dumo nimo nasaio tau ato korowomidiro rasiri ie, neio ro Godi ipusu owera urubia edi tau ato iopiautiti-mo, nimo neio aboto aradabu-ri pua.

³¹ Nio abora nakara se noto orowapotai-dumo ibo nio simara nasaio ro giopiauti-rimo, nio hodo neio aboudo tirobu-die.

³² Nedi kiopiauti tanaro ro nio edi nasaio ro neio ro egea mere se ta-gowioidiro-mo. Ina nedi kiopiauti tanaro ro nio ro aise dowou-mo womu tato kiritomuai.

³³ Nio imese sibi bagawe sosoro ie, nio Godi ro ubauba urubia to ama-iapoi-ri. Nio korowadau gabu tato ie, nio nou ro era paruo to ama-iherai-ri.

³⁴ Ina noudo ie nio mo ro a-nimowapotai, mo ro ina Godi ipusu owera urubia, muro urubia, Godi owera kitamudiro urubia, nio aboto anama-imerio-ri. Neio arua nio ro amadimi-iopiauti-ri, arua nio ro ota kemowotowa ato amadimi-imopoguti-ri. Arua nio ro karadabu moto ato kerei to amadimi-ipesuti-ri. Arua nio ro sabowa gabogabo to amadimi-iaipirio-ri.

³⁵ Ina noudo ie iedi mea tuputupu urubia sirio ro na-iopiautiti-mo, iedi ubauba wisa ro nio ia ro amadimi-imidai-ri. Eiboro kebase naramu ro ta-gopia, ina iedi kororopiauti ro ioudo garatamuai-ro. Nou mea tuputupu dubu e ina nou karima ta-giroruwo imese mororuwo-ro Sekaraia to, nou Berekia mere ie. Nou nio nasa naminami ro gopia-rimo. Tarena Moto ina dao kimatowo patapata neitiro turituri ato neio ro nato gopia-rimo. Nedi tuputupu urubia ro

kiopiauti sapuwo to, iedi wisa ro nio ia ro amadimi-imidai-ri.

³⁶ Abora nio mo ro morobise owera mimowapotai-ro, nedi tanaro sirio ro neio ro na-gisioidiro-rimo imese mibo patu neio sapuwo to nio ia ro amadimi-iratai-ri.'

Iesu Ierusalem sabowa sapuwo to giropu mibo ro gorobai

³⁷ 'Ierusalem urubia nirimagare babio, Godi ro ipusu urubia nio aboto na-gimeirio-ro, nio ro giopiauti-rimo. Ibose owera sowake edi urubia ro goworohuti-rimo, nio ro nadi to giopiauti-rimo. Mo ubi sirio tau to owamotiti nio atu moro ato iwomidiro ri, mamu kakaba ro kainakaina tamu maumo ato beda mino to kiohidiro ra nio mo ro ibo iohidiro rie. Kaupoti nio simara ubi tato ie.

³⁸ Ina owera neito ma-dirorowai-rimo! Nio edi moro ro urubia tato moro to ama-ararapoi-ri, sawakuri ro ama-owamo-ri.

³⁹ Nio mo ro morobise owera nou ri nimowapotai, mo nio ro sosoro iauri-ri pua, womu tato nio ia ro karo ibo, "Oro Godi ro korosa ta-gomia. Abera Naramu pupuwo mutu oro nou se tou-die." '

24

Tarena Moto amadimo-ototoro-ri

¹ Iesu Tarena Moto na-gemeserai imese gosuruo-ro. Nou kowasoro urubia nou aboto nato gou-rimo, Tarena Moto owera mea sosoro sapuwo to gemowapotai-rimo.

² Ina neio Iesu ro nato gimodowa, 'Nio ro nedi Tarena Moto ro arua moto mutu neio

a-iauri-dumo ra? Nio mo ro morobise owera
mimowapotai-ro, nedi nadi moto ro
na-orowotoi, saiki ata urubia ro
amadimi-itotouti-ri. Nadi sirio
amadime-eresebuti-ri, goto ato kiamo kawa
ama-iamo-ri.'

*Womu tau ato beda tanaro sirio ro
amadimo-ororosioi-di-ro*

³ Iesu Oribi podo ohu to na-gioro, nakara
moro ato iato gomidi-ro. Taie nou kowasoro
urubia nou aboto nakara se nato gidiai-rimo.
Neio ro ibo, 'Nimo ma-dimowapotai-ro nedi
tanaro ro beda tau ato ama-ororosioi-di-ro? Ina
beda tanaro ro amadimo-ororosioi-di-ro nimo
umoro koi sapuwo to ibo, oro nedi tau ro nato
amadi-orowameai-ri, ibose duriomoro womu to
nama-ereredeai-ri?'

⁴ Neio Iesu ro ibo gimowameai, 'Nio mea se
ba-deremowotoi-mo, nio modobo pua arua
urubia ro kisaubuti.

⁵ Mabu urubia sirio amadidimo-oroho-ri, neio
ro ibo amadima-aro-ri "Mo Keriso nou se ie." Ina
urubia sirio neio ro amadimi-isaubuti-ri.

⁶ Nio ro ibose boso owera
amadimi-irowidi-ro aupi duriomoro ato
namadimo-ororosioi-di-ro. Ibose boso owera
arua urubia aboudo amadimi-irowidi-ro muso
duriomoro ato namadimo-ororosioi-di-ro.
Kaupoti nio tere nato oi ate, koko se aise
ba-dorowotoi. Nedi tanaro ro kebase
ba-mororosioi-di-ro-mo, kaupoti womu tau
simara se amadi-orowapotai-ri.

⁷ Ata duriomoro urubia ata duriomoro urubia
mutu amadimo-orobo-ri. Ibose ata owera urubia
ata owera urubia mutu amadima-arado-ri. Ibose
ohona tato tau sirio duriomoro ato

amadima-araremo-ri, urubia sirio sogoi ro ama-iwati-ri. Ibose erere duriomoro ato sopu momuruwo ro duriomoro erere tau ato amadimi-imuruwouti-ri.

⁸ Nedi tanaro sirio ro namadimo-ororosioi diro-ri, urubia orobo mere temeteme ro kowaibia na-watamuai, tanaro idaibo sosoro amadimo-ororosioi diro-ri.

⁹ Nio arua urubia ro gabamani tu to amadimi-iaremo-ri, ina neio ro ubauba mino to amadimi-iworohuti-ri, ina arua amadimi-iopiauti-ri. Nio erere duriomoro urubia ro masawe amadimi-iwia-ri, mabu nio ro mo nowasoro-dumo.

¹⁰ Iedi tau ro nato urubia sirio mo kimibiria gabo rido amadima-aragarewado-ri. Neio nakara se aise amadima-arasouti-ri arua urubia aboto iopiauti ri. Ibose neio amadimo-orohoio-ri.

¹¹ Iedi tau ro nato Godi ipusu oweru urubia to na-waratigi-dumo amadidimo-orowapotai-ri, urubia sirio neio ro amadimi-isaubuti-ri. Karasaubuti oweru neio ro nou amadimi-imibiria-ri.

¹² Ubauba tanaro urubia ro imese auna ia se amadimi-isioidiro-ri, ina noudo ie sirio urubia ro nirimagare kimati aboto niro turi ato imese aise ama-aragodo-ri.

¹³ Kaupoti womu tau nama-orobai-ri, beda urubia ro iwotoi-dumo koko se, neio ro womu tato womu tato keremiro amadimo-owea-ri.

¹⁴ Nedi mea oweru ro Godi edi kiwabo tanaro ro nou sapuwo to imese duriomoro gabogabo to namadimo-obodorouti-ri, taie womu tau nato amadi-ererede-ri.'

Auna ubauba tau ama-ererede-ri

¹⁵ Iesu ower a karo aise gowouwado nou ro ibo, 'Ina noudo ie Godi ro ower keba ia se garo Daniere aboto nou Godi ipusu ower dubu e. Nou ro ibo, Ata ubauba ia nakomu Tarena Moto ato urubia dubu ro ama-edea-ri saruto ama-owaititi-ri. (Kioputi urubia, ower maumo nio ro mea se ba-doi-mo.) Ina nedi ubauba ia nakomu ro nio ro Tarena Moto ato namadimo-owea-ri,

¹⁶ beda urubia ro orowomidiro Iudia duriomoro ato, neio podo duriomoro to aise ba-morowadau.

¹⁷ Etu ra moto tamu ato nama-omidiro-ri, nou modobo pua moto goro to karatea, namabu ata omidai ri, modobo ie nou aise kodau.

¹⁸ Ina ibose pari ato beda urubia ro namadimo-oroho-ri, neio modobo pua obotama kimowame, modobo ie pari rido korowadau.

¹⁹ Iedi tau ro nato niro ra mutu mamio ibose bamuai mutu mamio neio beda ito amadimo-orowati-ri? Nirimagare babio tanaro patu iedi mamio ro neio sapuwo to imese koko ia se ama-iamo-ri.

²⁰ Nedi tanaro ro nou sapuwo to, nio ro modobo ie Godi auna se kararatoro, idaibo tanaro modobo pua daroho tau ato kororosioidiro, ibose komidiro saiki ato kororosioidiro.

²¹ Mabu edi tau ro nato imese auna ia ubauba ro ama-ororosioidiro-ri. Godi ro duriomoro edi tau ato gosioidiro womu tato abora, idaibo ubauba ata ororosioidiro pua, ina idaibo sosoro tanaro ata ororosioidiro-ri pua ido.

²² Ina noudo ie Godi ro edi tau ro komukere

kowai tato rasiri ie, urubia sirio orowomidiro-ri pua. Kaupoti Godi ro edi urubia girapoi neio auna se timaragoidirotiti-die, ina noudo ie nou ro edi tau ro komukere kowai.

²³ Iedi tau ro nato, ata dubu ro nama-utura-ri nio aboto ibo, “Neito ma-dirarowea-rimo, Godi ro kohodowa dubu nou e.” O “Godi ro kohodowa dubu iato toroho-die,” kaupoti nou owera aise imibiria ate!

²⁴ Mabu Godi ro kohodowa dubu to na-waratigi-dumo amadimo-orowapotai-ri. Neio ro amadimi-isioidiro-ri erere awawo korosa tanaro. Nedi karasaubuti urubia ro gabo kowamo ato neio ubi ie Godi ro edi urubia girapoi-ro neio isaubuti ri.

²⁵ Ma-dirowidiro-rimo, nio mo ro nedi owera ro abora na-nimowauti, ido nedi tanaro sirio ro amadimo-ororosioioidiro-ri.

²⁶ Ina noudo ie arua urubia ro bagea to ibo namadima-aro-ri “Godi ro kohodowa dubu goto se duriomoro ato toroho-die”, nou osora ri aise ou ate! Ibose ata dubu ro nama-utura-ri ibo “Godi ro kohodowa dubu nedi moto ro ibi gugu ato toropiro-die”, nedi owera ro aise imibiria ate.

²⁷ Mabu Imese Urubia Kiauri Dubu nou namadi-orowameai-ri, penenio kerememiouti beda sosoro ra saiki kidiowado moro rido saiki korioduti moro to ibo amadimo-ororosioioidiro-ri. Imese Urubia Kiauri Dubu urubia sirio ro ibo amadimo-owea-ri.

²⁸ Pamo durupi bato korobu ra, banawario sirio nou nibo aboto ito ama-iroruwoidiro-ri.’

Imese Urubia Kiauri Dubu namadi-orowapotai-ri, beda tanaro ro amadimo-ororosioioidiro-ri

²⁹ *‘Tedi mibo tanaro sirio ro kororosioihiro saro gabo ato, tuturu to owamo-ri pua saiki pina iato aise ama-iasoperai-ri. Duriomoro gebari duwoduwo ro ama-ahidimai-ri, ina sogomi imewiti-ri pua. Ibose kiboni sirio toboro rido amadidima-araubuti-ri. Imese namabu patu toboro ato na-orowotoi neio aise amadimo-orowararioidiro-ri.*

³⁰ Nedi tau ro nato, ata tanaro toboro ato amadi-ororosioihiro-ri urubia umoro koi aboto ibo Imese Urubia Kiauri Dubu aupi ia se ie korowameai aboto. Ina nedi tanaro ro namadi-ororosioihiro-ri, urubia sirio neio idobi mutu aise amadimi-iroboreauti-ri. Imese Urubia Kiauri Dubu nou ia sosoro urubia sirio ro nato amadimo-owea-ri, tema ohu rido namadi-ororuwo-ri. Nou mea ia sosoro namadi-orowapotai-ri, nou auna ia pupuwo mutu amadi-ou-ri.

³¹ Humuko diamo auna ia se namadi-utura-ri, nou ro sowake urio nato ama-itioduti-ri Godi ro edi urubia girapoi-ro imese sirio duriomoro rido idabuti ri.’

Dewao ota ro ata tanaro kitamudiro ie

³² *‘Dewao ota ba-diauri-mo, ina ata tanaro neido ba-daratamudiro-mo. Puara na-orobiritai-dumo, ina orio puara ro kisuwoduti ie, nio umoro koi ie ibo, bunio saiki ama-otobowa-ri.*

³³ Ina idaibo sosoro ie, nedi tanaro sirio ro nio mo ro dese to na-nimowapotai, neio kororosioihiro aboto nio ro namadimi-iauri-ri, nio umoro nato ba-doititi-mo ibo, mo korowameai tau aupiaupi ro orobowado-die.

³⁴ Nio mo ro morobise owerā mimowapotai-ro. Iu urubia, nio ororoporeai-ri pua, tauo nedi tanaro sirio ro nou sapuwo to na-nimowauti, neio ro amadimo-ororosioidiro-ri kebase.

³⁵ Nedi duriomoro gebari ro toboro, sopu, imese sirio namabu patu, neio imese amadima-araraseperai-ri. Kaupoti mo edi owerā ro beda kararaseperai ra.'

Imese urubia kiauri dubu korowameai tau urubia umoro pua

³⁶ Iesu ro kowasoro urubia owerā iato gimowauti ibo, 'Imese urubia sirio umoro pua, iedi tanaro sirio ro edi tau ato namadimo-ororosioidiro-ri. Godi edi sowake urio sirio ro neio umoro pua, ibose Godi simara mere umoro pua. Mo edi abera ro nou nakara umoro ie.

³⁷ Noa tau ato beda tanaro ro gororosioidiro-rimo, ina Imese Urubia Kiauri Dubu edi tau ato namadi-orowameai-ri, idaibo sosoro tanaro ibose to amadimo-ororosioidiro-ri.

³⁸ Mabu Noa edi tau ato gomidiro, urubia kiho, kidio, kararemo gabo keremoworohuti, iedi tanaro ro nou gisioidiro-rimo, womu tato Noa ota bokose pe goro to ti-godoro.

³⁹ Neio umoro tato irowomidiro-titi ibo neio abato etou tanaro ro amadimo-ororosioidiro-ri, womu tato abata na-garapusia-ro, taie neio imese sirio se aise giopia. Ina Imese Urubia Kiauri Dubu edi tau ato namadi-orowameai-ri, idaibo sosoro tanaro amadimo-ororosioidiro-ri, urubia nou ro aise amadi-imuhia-ri.

⁴⁰ Ina nedi tau ro nato netewa teibo dubu teibo pari ato namado-oroho-ri, Imese Urubia

Kiauri Dubu namadi-orowameai-ri, ata ama-owagare-ri, ata amadi-emeserai-ri.

⁴¹ Ibose netewa teibo orobo teibo neitiro ohona kisioidiro moro ato namadi-iwia-mari, Imese Urubia Kiauri Dubu ro ata ama-orobai-ri, ata imese amadi-emeserai-ri.

⁴² Ina noudo ie sirio tau kiraroweauti modobo ie, nio umoro pua nio edi Abera Naramu ro korowameai tau.

⁴³ Kaupoti nio umoro koi modobo ie ibo, moto abera umoro kowamo rasiri ie piro dubu korowateai tau, nou ro moto aise ba-gemiro, moto esebea-ri pua.

⁴⁴ Nio ibose aise kiraroweauti modobo ie, mabu beda tau ato nio ro namadimi-imaragoidiro-ri ibo, "Nedi tau ro nato Imese Urubia Kiauri Dubu orowameai-ri pua," taie, iedi tau ro nato amadi-orowameai-ri.'

Etu ra morobise sowake dubu

⁴⁵ 'Ina eputa dubu woko mea se na-emesioidiro, mea kimaragoidiro mutu, beda sowake dubu ro kemesioidiro ra? Eputa dubu ro borubi sowake urubia mea se kiwarebai aboto nou kohodowa ie, ina mea tau ato, iedi mea sowake dubu ro borubi wisa tato woko urubia ohona to mea mino to ama-iwarebidirotiti-ri.

⁴⁶ Idaibo sosoro dubu meana nou ro ama-owea-ri, mabu nou edi eputa dubu ro namadi-orowameai-ri, nou ro ohona kimio moro ato amadi-owea-ri.

⁴⁷ Ina oweri neito ma-dirowidiro-rimo! Nedi sowake dubu ro eputa dubu ro beda mutu namabu sirio ra nou ro na-iworohuti, neio imese mea sowake dubu ro ama-emeauri-ri.

⁴⁸ Kaupoti nedi sowake dubu ro nou ro ubauba kimaragoidiro na-iworohuti, ina nou ro ibo, “Mo ro eputa dubu egea se nemasebidiro, mo aboudo tau se gararasoperai, etu umoro ra nou tau se orowameai-ri pua.”

⁴⁹ Taie nou ro borubi sowake koroho urubia aise iadotiti, ibose nou kidio urubia mutu kiho kidio nou iworohutiti.

⁵⁰ Eputa dubu edi tau ato namadi-orowameai-ri, ubauba sowake dubu beda tau ato namadi-imaragoidiro-ri ibo, “Mo eputa dubu hio to orowameai-ri pua”, taie nou aise amadi-emuhia-ri.

⁵¹ Taie edi sowake dubu ro eputa dubu ro tu ra sairo ra aise ama-owaubuti-ri, karatigi urubia matagoro karabowa idobi diamo edi moro ato imarotiti-dumo, nou neito aise ama-eherai-ri.’

25

Totomu 10 busere sapuwo to ie

¹ Iesu ro neio owera aise gimowautiwado, nou ro ibo, ‘Godi ro kiwaboi tanaro idaibo sosoro ama-owamo-ri, 10 awawo busere sosoro ie, neio orio marete dubu kemasebidiro aboto erempa erere se giwou-rimo iedi soriomu ro nou aboto.

² 5 busere muro tato busere ie, arua 5 busere neio muro busere ie.

³ Iedi 5 muro tato busere ro erempa erere se ta-gimidai-rimo sekere. Kaupoti neio ro didi keresini imidai pua aise gimeserai-rimo.

⁴ Arua 5 muro busere ie, neio ro didi keresini erere se ta-gimidai-rimo orio marete dubu kemasebidiro sapuwo to.

⁵ Kaupoti iedi dubu ro egea se gemasebidiro-rimo, hio to orowateai pua. Iedi kemasebidiro ro na-gemasebidiro-rimo, neio imese sirio se norou ro aise girobai, taie imese gututi-rimo.

⁶ Neio isana norou girobu duwo turi ato ata dubu nato giaia-ro, “Neito ma-dirarowea-rimo! Urubia dubu notou-die! Moto rido hio to memosuwoduti-ro!”

⁷ Taie iedi 10 busere ro iedi iamo ro norou maumo rido na-girorowai-rimo, neio aise girerubua-rimo. Taie erempa woiki hio to iato giwiourio-rimo.

⁸ Iedi 5 muro tato busere ro neio erempa keresini tato ri aise gorodouti-rimo. Taie neio ro ibo borubi busere aboto, “Nimo erempa keresini tato ri ta-worodouti-mo. Modobo ra nio ro kimaratuti?”

⁹ Neio ro ibo, “Marasio ia ie! Nio imaratuti-ri pua. Nimo simara modobo ato niwou-dioumo. Nio kimaratuti ato, nimo nio mutu atu se keresini tato anamadimo-oi-ri. Sitowa to se dou-mo ioudo ba-dimade-rimo.”

¹⁰ Neio isana sitowa to gorowabera-rimo keresini imade ri, edi dubu ro nato godoro-ro. Taie iedi 5 muro busere ro nou ro aise gidabuai-bi imese giwodoro-ibi iedi marete soriomu ro nou aboto. Taie iato etou ra magere sowake dubu ro aise gopai.

¹¹ Tuturu to eremasebidiro pua, iedi muro tato busere ro neio ro gorowameai-rimo. Neio ro ibo, “Auna dubu! Auna dubu! Nimo magere dimodobura-ro!”

¹² Kaupoti neio nou ro ibo gimowameai-ro,
“Tauo nio mo ro morobise owera
mimowapotai-ro, mo umoro pua nio!” ’

¹³ Iesu owera neito gopai, ‘Sirio tau aise
gi-iraroweauti-ri, mabu Imese Urubia Kiauri
Dubu korowameai saiki nio umoro pua.’

Totomu sowake dubu peteibi sapuwo to

¹⁴ ‘Ina Godi ro kiwaboi tanaro nou idaibo
sosoro ie, urubia dubu muso moro to na-gou.
Nedi dubu ro ido gasiriai, tauo keba se nou ro
sowake dubu peteibi girumai-ibi, nou namabu
kemeauri sapuwo to owera iato gimowauti-bi.
Taie nou ro neibi mani erere se iato gimio-ibi.

¹⁵ Nou ro keba dubu aboto 5 mani baiko
gaiiwai, ina ata dubu aboto netewa teibo mani
baiko teibo gaiiwai-ma. Ina ata dubu aboto
kaupoti mani baiko gaiwai. Mabu neibi edi
tanaro ro nou auna umoro ie, ina noudo ie neibi
simara modobo ato kimio-ibi. Taie nou iato
imese gasiriai muso moro to.

¹⁶ Keba dubu ro edi 5 mani baiko ro gimidai,
nou ro besinisi woko nouto gosioiido. Taie ata 5
mani baiko nou ro iato giwia, atu se na-gidabuai,
10 mani baiko ro gororosioidiro-rimo.

¹⁷ Ina ata dubu ro atu sosoro tanaro ibose to
gosioiido. Nou ro edi netewa teibo mani baiko
teibo ro na-gimidai-ma, besinisi woko nouto
gosioiido. Ina ata mani baiko teibo nou ro iato
giwia-ma.

¹⁸ Ina saro dubu ro edi na gomidai kaupoti
mani baiko, nou ro goto bobo gemoba iato
gedea.

¹⁹ Neibi edi eputa dubu ro tuturu tau to imese ta-gorohowado. Saro to iato gorowameai-ro. Nou ro sowake dubu peteibi nato girumai-ibi nou aboto ou ri, taie neibi nou ro iato gimodoruti-ibi neibi ro nou mani beda mino to gemoworohuti-bimo.

²⁰ Ina noudo ie iedi dubu ro gimidai 5 mani baiko, nou ro ibo, “Auna dubu, oro simara 5 mani baiko nou e, ina ma-dowea-ro oro didi 5 mani baiko ta-nemesioidiro, nou e.”

²¹ Eputa dubu ro ibo, “Oro morobise ie, mea tuputupu sowake dubu e, oro ro mea woko gosioidiro. Oro ro sipu tato namabu modobo ato nemoworohutiti, ina sirio namabu anama-iapoi-ri oro ro emoworohuti ri. Mo mutu modoro-rido soriomu ohona iho ri, neitiro kamade atu se iato anamadi-iworohuti-ri.”

²² Ina iato tuturu to pua iedi dubu ro gimidai-ma netewa teibo mani baiko teibo, nou ro gou-ro. Nou ro ibo, “Auna dubu, oro simara mani baiko teibo nou e, ina ma-dowea-ro, oro didi mani baiko teibo ta-nemesioidiro-ma, nou e.”

²³ Iedi dubu ro eputa dubu ro na-gowea, nou ro ibo, “Oro ibose morobise mea tuputupu sowake dubu e, oro ro mea woko gosioidiro. Oro ro sipu tato namabu modobo ato nemoworohutiti, ina sirio namabu anama-iapoi-ri oro ro emoworohuti ri. Mo mutu modoro-rido soriomu ohona iho ri, neitiro kamade atu se iato anamadi-iworohuti-ri.”

²⁴ Ina iato kaupoti mani baiko edi dubu ro gomidai nou ro gou-ro. Nou ro ibo, “Auna dubu mo tere ie, mabu oro koko dubu e. Ata dubu ro

kiedea ie edi namabu ro, oro ro nou kimade ie. Arua urubia ro kiwati woko, ina wisa oro ro kimade ie.

²⁵ Mo tere ie, oro ro edi kaupoti mani baiko ro nomia-ro, mo ro goto bobo nemoba iato owamotiti. Ina nou e noti nemowameai-die."

²⁶ Eputa dubu ro ibo, "Oro imese ubauba ia ie, pupuwo tato dubu e! Oro ro mo aboto idaibo oweri na-warō-die, ibo mo koko dubu e. Ata dubu ro kiedea ie iedi namabu ro mo ro kimade ie. Arua urubia ro kiwati woko, ina wisa mo ro kimade ie.

²⁷ Mani iopu oro ro banega to ba-gedei, didi mani kainai kosioidiro sapuwo to, oro ro nedi woko ro nou ba-gosioidiro. Mo oro ro nato ba-nemowameai-ro didi mani mutu."

²⁸ Taie eputa dubu ro arua sowake urubia iato gimowapotai ibo, "Iedi dubu ro mani dowasiri-rimo. 10 mani baiko edi dubu ro na-irobidiro nou domia-mo.

²⁹ Mabu mo ro beda awawo kimio ra mea se etio ro iworohuti-dumo, idaibo urubia ohu rido mo ro neio anama-imotomo-ri. Ibose neio abato namabu aise amadi-ma-aratuamuti-ri. Mo ro urubia beda kainakaina kimio ra ubauba se etio ro iworohuti-dumo, neio aboudo mo ro anama-iwagarewado-ri.

³⁰ Ina iedi pupuwo tato dubu ro mo mani goto ato na-gemoba, duwoduwo moro, temeteme idobi girigiri edi moro ato iwarotiti, neito deherai-mo." '

Iesu ro urubia soirio teibo to ama-ihoduti-mari

³¹ 'Imese Urubia Kiauri Dubu nou mea sosoro mutu amadi-orowameai-ri, simara sowake urio sirio mutu. Nou edi komidiro nakomu ro imese

meana ia ie. Nou ohu ia to nato
amadi-omidi-ro.

³² Imese beda mutu urubia sirio ra nou sosoro
gabo ato amadimi-idabuti-ri. Taie neio nou ro
nato ama-ihoduti-ri. Sipisipi kiauri dubu ro
beda sosoro kihoduti ra sipisipi ata sapuwo ato
kiwotobowa, nanigosi ata sapuwo ato, Imese
Urubia Kiauri Dubu ro imese urubia sirio idaibo
mino to ama-ihoduti-ri.

³³ Sipisipi nou ro tumodi sapuwo ato
ama-iwotobowa-ri, nanigosi nou ro pere sapuwo
ato ama-iwotobowa-ri.

³⁴ Tumodi sapuwo ato edi urubia ro
ama-orowotoi-ri, neio eputa dubu ro ibo
ama-imowapotai-ri. “Mo abera ro korosa nio
giwai! Godi edi kiwaboi tanaro maumo ro neito
imese ba-dodoro-rimo, abora nio ro
amadimi-irahidimai-ri. Nedi sopu duriomoro
gebari ro edi tau ato gosioi-ro, Godi ro kiwaboi
tanaro nio sapuwo nato gemododiai.

³⁵ Nio ro nou ri amadimi-irahidimai-ri mabu
mo sogoi ro na-nowatiti, ohona nio ro
nomio-mo. Obo sogoi ro na-nowatiti, obo nio ro
nemoworohotiti-mo. Mo apira dubu to
na-nararasorotiti, moto to nio ro
nowodoutiti-mo.

³⁶ Mo kiroidiro namabu tato na-nimidirotiti,
obotama nio ro nomiotiti-mo. Mo temeteme ro
na-nowatititi, nio ro nowarebidirotiti-mo. Mo
dibura ato na-nirohotiti, nio ro naraturiotiti-mo.
Nio ro Godi edi kiwaboi tanaro ro nou ri
amadimi-irahidimai-ri.”

³⁷ Taie iedi meamea tuputupu urubia ro eputa
dubu neio ro ibo amadime-emowameai-ri,
“Abera Naramu, oro sogoi ro beda tau ato

gowati, ina nimo ro na-nowarebai-rimo? Oro obo sogoi ro na-owatiti, ina nimo ro na-nemoworohotiti-mo?

³⁸ Oro apira dubu sosoro na-goroho, nimo ro bato nowodoutiti-mo? Oro kiroidiro namabu tato na-imidirotiti, nimo ro obotama beda tau ato nomiotiti-mo?

³⁹ Oro temeteme ro na-owatititi, nimo ro beda tau ato nowarebaititi-mo? Oro dibura ato na-irohotiti, nimo ro beda tau ato naraturiotiti-mo?"

⁴⁰ Eputa dubu ro neio ibo ama-imowameai-ri, "Nio mo ro morobise owera mimowapotai-ro! Beda kiwarebai tanaro ra nio ro na-gisioidi-ro-rimo mo edi dorogora urubia ro neio aboto, nio ro mo aboto gisioidi-ro-rimo."

⁴¹ Taie eputa dubu edi pere sapuwo urubia aboto ama-erewesegerai-ri. "Nio nedi urubia ro Godi ro keba se ta-giapoi ubauba wisa imade ri, mo aboudo neido daragare-mo! Womu tato womu tato edi era ro iriwaretiti Satani nou sowake urio mutu Godi ro edi era ro gimesioidi-ro, neito daratowo-mo.

⁴² Mabua mo sogoi ro na-nowatiti, ohona nio ro omiotiti pua. Obo sogoi ro na-nowatititi, nio ro emoworohotiti pua.

⁴³ Mo apira na-nirohotiti nio sabowa to, mo nio ro karamairi pua. Mo obotama tato na-nimidirotiti, nio ro obotama komio pua. Mo temeteme ro na-nowatiti, nio ro owarebidirotiti pua. Mo dibura ato na-nirohotiti, nio ro karaturio pua."

⁴⁴ Neio ro eputa dubu ibo amadime-emowameai-ri, "Oro sogoi ro

na-owatiti, nimo ro beda tau ato niaurititi-mo? Oro obo sogoi ro na-owatititi, nimo sabowa to apira na-irohotiti-ro, namabu tato na-imidirotiti, temeteme ro na-owatititi, dibura ato na-irohotiti, ina oro beda tau ato ra nimo ro kowarebidiro tato?"

⁴⁵ Neio eputa dubu ro ibo ama-imowameai-ri, "Nio mo ro morobise owera mimowapotai-ro! Beda kiwarebai tanaro ra nio ro kisioidiro tato mo edi dorogora urubia aboto, nio ro mo aboto isioidiro pua."

⁴⁶ Taie iedi urubia ro aise amadimo-ou-ri womu tato womu tato ubauba wisa imade ri. Kaupoti meamea tuputupu urubia womu tato womu tato keremiro to neio ro ama-irowomidiro-ri.'

26

Iesu opia ri gemahuomai-rimo

¹ Iesu ro nedi kitamudiro owera sirio ro kimowauti na-giporeai, taie nou ro ibo kowasoro urubia aboto,

² 'Nio umoro ie nimo Kimasaudai Soriomu kosioidiro aboto netewa teibo saiki teibo ro eremeserai-do. Iedi tau ro nato Imese Urubia Kiauri Dubu mo nou se ie, mo urubia aboto anamadima-apoi-ri ota kemowotowa ato emopoguti ri.'

³ Iedi atu tau ro nato Godi ra urubia ra turituri awawo urubia, duriomoro kiauri urubia mutu, Kaiapa edi auna moto ro nato garadabuai-rimo.

⁴ Iesu neio ro karasaubuti mino to orobai ri nato opia rie iedi owera ro neito geremowauti-rimo.

⁵ Neio ro ibo, 'Nou nimo ro soriomu kosioidiro saiki ato korobai modobo pua. Nou urubia ro amadimo-owairiai-ri. Neio modobo pua karadabuti ina karado nato karatamuai.'

Iesu eputa dehoru to ata orobo ro gemasia

⁶ Iesu Betani sabowa ato na-gomidiro nou Saimoni moto ato imidirotiti. Saimoni keba se katio ikoni mutu imidirotiti, ina Iesu ro meana ta-gowai.

⁷ Iedi moto ro nato Iesu ohona giho, ina iedi tau ro nato ata orobo mea nibo dehoru botoni mutu nato godoro-ro. Iedi dehoru ro nou ro auna mani to gomidai-ro. Taie iedi dehoru ro neito Iesu eputa to aise gemasia.

⁸ Iedi orobo ro kowasoro urubia ro na-gowea-rimo, neio nou aboto kamade tato goi-rimo. Taie neio nato gutura-rimo ibo, 'Oro ro edi dehoru ro nouto Iesu eputa dorogora mabu ato emasia!

⁹ Iedi dehoru ro arua urubia ro mani to a-sowomidai-mo, ina namabu tato urubia neito a-siwarebai.'

¹⁰ Neio ro edi owera to geremowauti-rimo, Iesu keba se umoro ta-goi. Taie neio nou ro nato gimowapotai, 'Nedi orobo ro nio ro mibo etou mabu ato omio-dumo? Nou ro mea ia tanaro osioidiro-die mo aboto.

¹¹ Namabu tato urubia nio abato imese tau ama-irowomidiro-ri. Kaupoti mo nio mutu nato omidiro-ri pua.

¹² Nou ro edi tanaro ro na-osioidiro eputa to dehoru na-nemasia, mo nou ro idaibo a-nemododiai pamo durupi sapuwo to.

¹³ Ina nio mo ro morobise owerá mimowapotai-ro. Mea owerá mo sapuwo to kimibiria urubia ro amadimo-obodorouti-ri imese duriomoro to. Ina beda duriomoro ato nedi mea owerá ro namadimi-imowauti-ri, nou ro edi tanaro ro na-osioidi-ro-die, nou eremasoro na neio ro ibose to amadimi-imowauti-ri.'

Iudasi ro ubi to gomidai Iesu kapoi aboto

¹⁴ Tuturu to owamo pua Iesu 12 kowasoro dubu ata, masiro Iudasi, nou Kerioti sabowa dubu e, nou imese gou Godi ra urubia ra turituri awawo urubia aboto.

¹⁵ Neio nou ro nato gimodowa, 'Mo ro Iesu nio aboto nama-apoi-ri, mo nio ro etou nakomu namadimo-omia-ri?'

Taie neio iato mani se gimidai-rimo iato gioputi-rimo 30 siriba mani ti-gorobai, Iudasi nou gomia-rimo.

¹⁶ Taie nedi tau ro neido Iudasi ro Iesu korobai gabo giosora neio aboto nato apoi rie.

Iesu kowasoro urubia mutu Kimasaudai Soriomu gosioidi-ro-rimo

¹⁷ Keba saiki Patapata Beredi Kiaupai Tato Soriomu saiki ro gowamo. Iedi tau ro nato Kimasaudai Soriomu nato kisioidi-ro-ie. Taie Iesu kowasoro urubia nato gou-rimo nou aboto. Nou neio ro nato gemodowa-rimo ibo, 'Kimasaudai Soriomu oro ro kiho sapuwo to nimo ro beda moro ato namadimi-imododiai-ri?'

¹⁸ Neio Iesu ro ibo gimowameai, 'Auna sabowa to ba-dou-mo. Ata dubu nio ro iato amadimo-owea-ri, ina nou nio ro ibo ba-demowapotai-mo, "Nimo kitamudi-ro-die dubu ibo utura-die, Godi ro edi tau ro gohodowa-ro

mo sapuwo to aupise ta-gorobai-die. Mo ubi ie Kimasaudai Soriomu kowasoro urubia mutu oro moto ato kosioidiro.” ’

¹⁹ Iesu ro beda owera garo kowasoro urubia aboto, tanaro ibose to gororosioi-di-ro-rimo, taie soriomu ohona iato aise gimododiai-rimo.

²⁰ Adimo saiki ato Iesu kowasoro urubia mutu atu moro ato na-gomititi-rimo, ohona imese giho-rimo.

²¹ Neio kiho moro ato Iesu ro neio ata owera nato gimowapotai. ‘Nio mo ro morobise owera mimowapotai-ro. Mo nio ata ro anama-apoi-ri ubauba urubia aboto opia ri.’

²² Kowasoro urubia ro nedi owera ro na-girorowai-rimo, neio iato auna kamade tato ro girobai. Taie neio ro nou erere se nato gemodoruti-rimo ibo, ‘Abera Naramu, oro mo ro apoi-ri pua ra?’ Neio ro erere se garo-rimo idaibo owera.

²³ Taie neio Iesu ro ibo gimowameai, ‘Mo beredi nou mutu atu se namadi-idobia-ri, io urubia dubu nou se ie, mo nou ro anama-apoi-ri.

²⁴ Imese Urubia Kiauri Dubu nou ama-araburai-ri, owera Tarena Buka ato keba se idaibo sosoro ta-gisioidiro-rimo. Kaupoti nedi kapoi dubu ro nou aboto auna ubauba tanaro ro amadimo-ororosioi-di-ro-ri. Mo kapoi dubu nou koroto tato rasiri ie, nedi ubauba ro nou sapuwo to kainai ie. Kaupoti beda ubauba wisa ra nedi dubu ro Godi aboudo nou ro nama-owea-ri, nou imese auna ubauba ie.’

²⁵ Taie iato Iudasi ro gutura-ro, ‘Kitamudiro dubu, oro mo ro apoi-ri pua ra?’

Iesu ro nou ibo gemowameai, 'Io, oro ia ro notutura-die.'

Abera Naramu ohona kiho

²⁶ Neio ohona edi kiho ro na-giho-rimo, Iesu ro patapata beredi na-gomidai-ro nou ro eso owera iato garo Godi aboto. Taie edi patapata beredi ro na-gekekeouti kowasoro urubia aise gimio. Nou ro ibo, 'Dimade-mo! Nou mo durupi ie, ba-diho-mo.'

²⁷ Ina waini obo panikere iato gomidai-ro, taie eso owera iato garo Godi aboto. Nou ro ibo, 'Nedi waini obo ro panikere ato na-omidiro, kodio to nio ro imese ba-demosuwo-mo.

²⁸ Nedi waini obo ro mo ro orio hodo nasaubiai urubia aboudo mo karima nama-isuputi-ri, sirio urubia ubauba kimatopeamuti sapuwo to ie.

²⁹ Nio mo ro morobise owera mimowapotai-ro, waini obo mo ro ido odio-ri pua, womu tato orio waini obo ido nio mutu atu se tinamadimi-idio-ri mo abera edi kiwaboi tanaro ro nou maumo ato.'

³⁰ Taie neio Godi kemowabu ohare kemabodo na-goporeai-rimo, neio atu se Oribi podo to aise gidiai-rimo.

Kowasoro urubia ro Iesu amadime-ebedidiro-ri

³¹ Ina Iesu ro kowasoro urubia ibo gimowapotai, 'Nedi duwo ro nato mo nio ro emedio-ri pua, nio ro anamadime-ebedidiro-ri. Mabu idaibo owera Tarena Buka ato kebase ta-gisoidiro-rimo. Godi ro ibo gutura-ro, *Sipisipi kimowotoi dubu mo ro anama-audurai-ri, ina sipisipi erere moro to amadimo-owadaudiro-ri.*

³² Ina Iesu ro ibo, 'Mo pamo aboudo Godi ro namadi-owameai-ri, mo Gariri duriomoro to keba gabo moro to anama-aimai-ri. Mo nio ro iato anamadimo-owea-ri.'

³³ Pita ro Iesu ibo gemowameai, 'Oro arua kowasoro urubia ro kebedidiro ato, oro mo ro beda kebedidiro pua!'

³⁴ Ina Iesu ro Pita ibo gemowapotai, 'Oro mo ro morobise oweru nama-emowapotai-ri, Pita! Nedi duwo ro nato kakaba oweru ido to amadimu-utura-ri, mo oro ro netewa didi tau to anama-aratiuti-ri. Oro ibo ama-aro-ri mo umoro pua Iesu.'

³⁵ Kaupoti Pita oweru mutu pupuwo ta-goi. Nou ro ibo, 'Mo oro mutu pamo koweia ato, ata oweru tato ie. Oro mo ro beda karatiuti ra, neitiro pamo atu se kiwia modobo ie.' Ina idaibo sosoro oweru arua kowasoro urubia ro ibose to garo-rimo.

Iesu Godi mutu geremowauti-rido Getesemeni pari ato

³⁶ Iesu kowasoro urubia mutu atu se imese gou-rimo Getesemeni pari to. Neio ito na-gorowateai-rimo, neio Iesu ro ibo gimowapotai, 'Nio nato ba-dorowomidiro, mo ito nama-ou-ri Godi mutu eremowauti rie.'

³⁷ Taie nou ro Pita se gadabuai Sebedi mere teibo mutu, neibi atu se ibo gou-birimo. Iedi tau ro nato Iesu natonato durupi ta-geremowateai. Ibose nou giropu imese mibo ia se goworohuti.

³⁸ Nou ro ibo, 'Mo kimaragoidiro patu imese ubauba ta-woi-mo. Ina noudo ie mo neio ro anamadimo-ohuruti-ri. Nibi mo mutu atu se mirarowo-birimo, norou utua ate!'

³⁹ Taie Iesu neibi aboudo egea mere se giaubai, nou iato aise gorodiriti woidomari goto to aise giwaposowa. Taie Abera aboto iato gararatoro. Nou ro ibo, 'Modobo ra nedi ubauba tanaro sirio ro mo aboto kororosioihiro tato? Kaupoti ibo pua mo simara ubi, oro ubi beda sosoro to owamo ibose ba-mororosioihiro-mo.'

⁴⁰ Taie nou kowasoro dubu peteibi aboto iato gorowameai-ro, neibi nou ro norou kirobu-bi moro ato giwia-ibi. Nou ro ibo Pita aboto, 'Nibi aboudo modobo pua ra mo mutu egea mere se kirarowo, a?

⁴¹ Kiraroweauti mutu Abera aboto ba-dararatoro-mo. Modobo pua nibi ubauba sirio ro kiwaibirioi-bi. Nibi ubi sekere meamea tanaro kisioidiro, kaupoti nibi durupi pupuwo tato se iamo.'

⁴² Iesu ina iato gorowameai Godi aboto araratoro ri. Nou ro ibo, 'Nedi temeteme ro idaibo sosoro ie karakara obo kodio. Idau, gabo kowamo tato nedi karakara obo ro mo aboudo kowagare aboto, taie modobo ie, anama-odio-ri. Oro ubi beda sosoro owamo, aise ba-mororosioihiro-mo, ibo pua mo simara ubi.'

⁴³ Iesu ina kowasoro urubia aboto iato gorowameai-ro. Neibi ina nou ro norou kirobu-bi moro ato giwia-ibi. Mabu neibi idomari kimahitai aboto imese mibo ia se giamo.

⁴⁴ Taie Iesu imese gorowameai Godi mutu ina atu oweri to eremowauti ri.

⁴⁵ Nou kararatoro na-goporeai, nou ina aise gorowameai-ro neibi aboto, neibi ina norou kirobu-bi moro ato giwia-ibi. Nou ro ibo, 'Nibi norou kirobu-bi iporeai pua ra? Ma-diwia-bimo!

Imese Urubia Kiauri Dubu nou tau
ta-worobai-ro, urubia dubu ro neio aboto
ama-apoi-ri ina neio ro nato amadimo-orobai-ri.

⁴⁶ Direrubua-birimo! Neio aboto
mosiomai-birimo! Daio mo kapoi dubu tou-die.'

Iesu urubia sirio ro gorobai-rimo

⁴⁷ Iesu kowasoro urubia aboto owerā karo
oporeai pua, iedi atu tau ro nato Iudasi nato
gorowateai-ro, nou Iesu ata 12 kowasoro dubu
nouse ie. Nou urubia sirio mutu gou-ro, neio
giri, gamini nou mutu gou-rimo. Nedi urubia ro
Godi ra urubia ra turituri awawo urubia,
duriomoro kiauri awawo urubia mutu, Iesu
aboto neio ro gimeiriai-rimo.

⁴⁸ Iedi urubia ro kapoi dubu ro owerā keba se
ta-gimowapotai ibo, 'Mo ro beda dubu nosomeai,
urubia dubu nou se ie, ba-dorobai-mo.'

⁴⁹ Taie Iudasi aise gemobodiai Iesu nou ro aise
gohiai. Nou ro ibo, 'Kitamudiro dubu, mea duwo
ie.' Taie Iesu nou ro iato gosomeai.

⁵⁰ Iesu ro ibo, 'Nanutuna, oro edi ubi ato
na-wou-die, aise dosioidiro.'

Taie urubia sirio ioudo na-gou-rimo, Iesu neio
ro aise gorobai-rimo.

⁵¹ Iesu ata kowasoro dubu nou abato ibose to
gou, nou giri na-gaubidiro-ro iato Godi ra urubia
ra turituri auna dubu nou edi sowake dubu ro
sawuwo gare giri to aise gowatua.

⁵² Iesu ro ibo, 'Giri natara moro to dowameai.
Mabu giri to edi urubia ro iadotiti-dumo, saiki
ata neio giri to amadimi-iopiauti-ri.

⁵³ Oro ibo a-imaragoidiro ra mo aboudo
modobo pua ra Abera Godi karahuomai, ina nou

ro kimeriai ie boso sowake urio sirio ota puara morobiritai-mo, mo neio ro kowairiai ie?

⁵⁴ Kaupoti mo ro idaibo tanaro kosioidiro rasiri ie, Tarena Buka ato owera na-iamo ibo nedi tanaro ro aise amadimo-ororosioioidiro-ri, neio morobise to beda sosoro to kororosioioidiro ra?

⁵⁵ Taie nou aise gerewesegerai urubia sirio aboto, neio nou ro nato gimowapotai ibo, 'Nio giri ra gamini ra mutu na-wou-dioumo, mo orobai ri a-wou-dioumo ra? Mo nio piro dubu ra? Mo saiki gabogabo Tarena Moto goto didiri ato nitamudiroititi. Iedi tau ro mo nio ro nato ba-norobai-rimo.

⁵⁶ Kaupoti nedi tanaro sirio ro na-ororosioioidiro-dumo, Godi ipusu owera urubia ro edi owera ro na-gisioioidiro-rimo Tarena Buka ato, neio owera morobise to ororosioioidiro ri.'

Iesu mutu edi kowasoro urubia ro na-gou-rimo, Iesu neio ro emedio pua, aise gorowadau.

Iesu Iu eputa urubia ro gemodoruti-rimo

⁵⁷ Iesu edi urubia ro gorobai-rimo, nou neio ro imese gowou-rimo Kaiapa moto to Godi ra urubia ra turituri eputa dubu. Mose sabi kitamudiro urubia, Iu eputa urubia neio Kaiapa moto ato dese to garadabuti-rimo.

⁵⁸ Ina Pita ro Iesu musomuso se gobodoro-ro, womu tato Kaiapa edi moto ro neito ti-gorowateai-ro. Nou goto didiri ato, kimotoi urubia abato aise gomi, atu se imese gorowomidiro. Iesu aboto beda tanaro ro

amadimo-ororosioi diro-ri, nou ro urubia ioudo gimowotoi-ro.

⁵⁹ Godi ra urubia ra turituri eputa urubia, Iu urubia awawo koto kiauri urubia mutu Iesu bagea mabu neio ro iato gemosora-rimo, taie nou neio ro nato opia rie.

⁶⁰ Sirio urubia bagea oweru mutu ta-goroho-rimo sekere, kaupoti nou neio ro mea mabu emowea pua. Tutura to owamo pua netewa teibo dubu teibo oweru mutu nato gou-rido,

⁶¹ neitiro ro Iesu nato gowauti-rido. Neitiro ro ibo, 'Nedi dubu ro ibo ta-garo "Mo aboudo modobo ie Tarena Moto kototoro, ina netewa didi saiki ato mo ro kididi to koporeai ie." '

⁶² Nedi oweru ro Godi ra urubia ra turituri auna dubu ro na-girorowai, nou sea rido aise geribidiro. Nou ro ibo Iesu aboto, 'Nedi dubu teibo ro edi oweru to aro-dioudo, oro korowairiai oweru pua ra? Oro ata oweru ata aro-ri pua ra?'

⁶³ Iesu ro edi oweru ro na-girorowai, nou muro se gotoi, ata oweru ata utura pua.

Taie Godi ra urubia ra turituri eputa dubu ro Iesu ibo gemowapotai, 'Keremiro Godi ohu ia ato na-imidirotiti-die mo ro nou masiro nouto nemowapotai, nimo oro ro dimowapotai-ro, oro Godi ro kohodowa dubu nou se ra? Ina ibose oro Godi mere ra?'

⁶⁴ Iesu ro nou ibo gemowameai, 'Io oro beda sosoro utura-die. Kaupoti nio mo ro nedi oweru ro nou mimowapotai-ro, Imese Urubia Kiauri Dubu mo nouse ie, ina saiki ata imese pupuwo ia Godi mo nou tumodi sapuwo ato

namadi-omidiro-ri. Ibose mo neito
namadi-owapotai-ri Adiri sabowa rido tema
ohu ato anamadi-ou-ri.'

⁶⁵ Godi ra urubia turituri eputa dubu ro nedi
owera ro na-girorowai, nou masawe ri simara
obotama aise gorowabowa. Nou ro ibo, 'Nou ro
na-warodie ibo "Mo Godi sosoro ie", nou ro Godi
masiro ubauba owai! Nimo ro ina irowidiro-ri
pua arua owera nou sapuwo to. Ma-dowea-mo,
nou ro Godi masiro ubauba owai, ina nio ro noti
emororowai-dumo.

⁶⁶ Nio beda sosoro imaragoidiro-dumo?'

Neio ro ibo, 'Nou kopia modobo ie! Mabu nou
ro auna ia ubauba owera aro.'

⁶⁷ Neio nou aboto na-goroho-rimo gase to iato
gamoruti-rimo. Arua ro a-gado-rimo, arua ro
a-giatoiauti-rimo.

⁶⁸ Neio ro ibo gemasosowado-rimo, 'Oro Godi
ro kohodowa dubu nouse ra? Nimo oro ro
ma-dimowapotai-ro, oro etu ro ado?'

Pita ro Iesu a-garatiouti

⁶⁹ Pita isana moto araradi ato gomidiro. Ata
sowake besere Pita aboto nato gou-ro, nou ro
ibo, 'Tedi Gariri dubu ro Iesu, oro mutu
ta-irohhotiti-do.'

⁷⁰ Kaupoti Pita ro urubia sosoro gabo ato Iesu
nou ro a-garatiouti. Nou ro ibo, 'Oro edi owera
to aro-die, mo umoro pua.'

⁷¹ Taie iedi moro ro Pita ro aise gemeserai-ro
kodouti moro to imese gou. Ina nou iato ata
sowake koroho besere ro ibose to gowea. Taie
urubia nou ro nato gimowapotai ibo, 'Nasareta
dubu Iesu, nedi dubu ro nou mutu
ta-irohhotiti-do.'

⁷² Pita ro Iesu ina iato garatio. Nou ro ibo, 'Mo ro Godi masiro nouto nimowapotai, mo umoro pua nedi dubu ro!'

⁷³ Taie tau egea mere se ta-gaudomaidiro, arua dubu Pita abato na-gorowotoi, neio ro ibo, 'Morobise ie oro ata nou se ie Iesu mutu oro ro irohotiti. Mabua oro oweru kodu Gariri urubia oweru karo sosoro ie.'

⁷⁴ Pita ro ibo, 'Mo nama-arasaubuti-ri, Godi ro mo ubauba wisa ba-momia-ro.' Nou idaibo ubauba nakara se gorowai. Nou ro ibo, 'Mo ro Godi masiro nouto nimowapotai, mo umoro pua nedi dubu ro!'

Pita oweru karo oporeai pua, iedi tau ro nato kakaba oweru nato gutura.

⁷⁵ Taie Pita kimaragoidiro nato giwameai Iesu ro beda oweru garo nou aboto, 'Kakaba oweru ido to amadimu-utura-ri, tauo mo keba se oro ro netewa didi tau to anama-aratiuti-ri.'

Taie nou ioudo aise gosuwoidiro-ro, auna idobi nou giroto.

27

Iesu Pairiti aboto gowou-rimo

¹ Godi ra urubia ra turituri awawo urubia, duriomoro kiauri urubia mutu, saiki na-gowaroho Iesu kopia aboto aise gapoi-rimo.

² Taie Iesu neio ro tu teibo iato gemotohiti-rimo imese gowaboi-rimo Pairiti aboto, Pairiti Roma auna gabamani dubu e.

Iudasi na-garasaubiai

³ Iesu kapoi dubu Iudasi, nou umoro na-goi ibo Iu eputa urubia neio atu se Iesu gapoi-rimo

pamo kowea aboto, taie iato Iudasi auna ia kamade tato mibo ro gahidimai. Taie nou ro iedi 30 siriba mani iopu ro aise giwameai edi urubia ro neio aboto.

⁴ Nou ro ibo, 'Mo ro ubauba tanaro nosioidiro. Nou ata ubauba tato dubu e, nio tu to na-nedea opia ri.'

Neio ro ibo, 'Oro beda ra? Oro simara mibo ie.'

⁵ Taie Iudasi ro 30 siriba mani edi na gimidai-ro Tarena Moto aboto aise giherai, iato nou aise gosuruo-ro. Nou ioudo na-godau-ro, iato aise garasaubiai.

⁶ Godi ra urubia ra turituri awawo urubia ro nedi 30 siriba mani ro ta-giwoiti-rimo. Neio ro ibo, 'Nedi mani ro isarena mani ie urubia dubu kopia aboto. Nedi mani ro nimo ro Tarena Moto mani bokose to kiedea modobo pua, sabi ie.'

⁷ Taie neio owera iato geremowauti-rimo. Neio ro ibo, 'Nimo ro ata goto kere namadimo-omidai-ri mereki kisioidiro dubu aboudo nedi mani iopu ro neito.' Neio ubi ta-goi-rimo daimodaimo urubia pamo durupi iedi goto kere ro iato imobuti rie. Taie iedi mani iopu ro neito goto kere aise gomidai-rimo.

⁸ Nedi tau ro neido urubia ro nedi goto kere ro 'Karima Kiroruo goto kere' to asoro-dumo, mabu urubia dubu kopia mani to gomidai-rimo.

⁹ Neio ro nedi tanaro ro na-gosioidiro-rimo, Ieremaia Godi ipusu owera dubu nou ro owera keba se na-gisioidiro, morobise to noti gorosioidiro-dumo ibo, *Neio ro 30 siriba mani iopu na-gimidai-rimo, nedi mani iopu ro urubia dubu kapoi mani iopu e, Isiraere urubia ro nedi wisa ro nou na-gemapoi-rimo.*

10 Neio ro edi mani iopu ro nouto goto kere se gomidai-rimo mereki kisioidiro dubu aboudo, mo Abera Naramu ro kebase beda sosoro nemowapotai-ro.

Iesu Paireti ro gemodoruti

11 Iesu Paireti sosoro gabo ato aise gowotobowa-rimo, Paireti Roma gabamani eputa dubu e. Taie nou ro Iesu nato gemodowa ibo, 'Oro ia nouse ra Iu urubia eputa dubu?'

Nou ro Paireti ibo gemowameai, 'Oro beda sosoro utura-die, io mo nou se ie.'

12 Taie Godi ra urubia ra turituri eputa urubia, duriomoro kiauri urubia mutu, neio ro ibo 'Nou ro ubauba tanaro ta-gisioidiro.' Kaupoti Iesu ro neio oweru imowame pua.

13 Taie Paireti ro ibo, 'Oro sapuwo to beda oweru aro-dioumo? Neio oweru oro ro imerewidiro pua ra?'

14 Kaupoti Iesu ro neio ata oweru ata imowameai pua. Iedi gabamani eputa dubu ro Iesu na-giauri oweru tato se na-gotoi, nou auna ia kimaragoidiro ro gopia.

Iesu Paireti ro gemeiriai kopia aboto

15 Kisimisi gabogabo ato Iu urubia Kimasaudai Soriomu na-isioidiro-titi-dumo, Iu urubia sirio ro beda dubu ubi emedea-dumo dibura rido kowosuruwo aboto, Roma eputa dubu ro nou kemeiriai ie sabowa to.

16 Ina iedi tau ro nato ata ubauba dubu dibura ato ibose to irohotiti, masiro Barabasi. Sirio urubia auna umoro ie Barabasi ata ubauba dubu e.

17 Taie iedi urubia sirio ro atu moro to nato garadabuti-rimo. Neio Paireti ro nato gimodowa, 'Nio ro beda dubu masiro apoi-dumo dibura rido mo ro kowosuruwo aboto, nou mo ro sabowa to aise anama-emeiriai-ri? Nio ubi ra Barabasi kowosuruwo, o Iesu, Godi ro kohodowa dubu to na-wasoro-dumo, nou kowosuruwo?'

18 Paireti iedi tau ro nato umoro mutu gomidiro ibo nedi lu eputa urubia ro, Iesu neio ro oriori giauri-rimo, ina neio ro nou mabu ato gowou-rimo opia ri.

19 Iedi tau ro nato Paireti koto sea to na-gomi neio koto owerā imerewidiro rie. Tuturu to owamo pua Paireti orobo ro ata owerā nou aboto nato gemeiriai-ro. Nou ro ibo, 'Oro ro Iesu aboto ata ubauba tanaro ata osioidiro ate, mabu nou ata ubauba tato dubu e. Nedi duwo ro nato nou mo ro hiwo to ta-nemibia. Nou mo ro hiwo to na-niauri, mo auna tere ro norobai.'

20 Kaupoti Godi ra urubia ra turituri awawo urubia, duriomoro kiauri urubia mutu, neio ro urubia binio to ibo gimedeawado-rimo, 'Nio Paireti ro namadi-imodowa-ri ibo "Mo ro dibura rido beda dubu namadi-owosuruwo-ri?", nio ro Barabasi masiro ba-dapoi-mo, ina nou ba-demowapotai-mo Iesu opia ri.'

21 Taie Roma gabamani eputa dubu Paireti nou ro urubia sirio nato gimodowa, 'Nedi dubu teibo ro neitiro sapuwo to nio beda sosoro imaragoidiro-dumo? Dibura rido mo ro beda dubu owosuruo-ri ra?'

Ina urubia sirio atu se nato giaia-rimo ibo, 'Barabasi ro mosuruwo-ro!'

²² Ina Paireti ro ibo, 'Ina Iesu, Godi ro kohodowa dubu to na-wasoro-dumo, mo ro beda mino to nama-oworohuti-ri?'

Neio imese sirio se auna se nato giaia-rimo, 'Ota kemowotowa ato meremopoguti!'

²³ Neio Paireti ro ina iato gimodowa, 'Ina Iesu ro beda ubauba tanaro gosioidiro nou sapuwo to emopoguti ri ra?'

Kaupoti neio auna se nato giaiauti-rimo, 'Ota kemowotowa ato meremopoguti!'

²⁴ Paireti umoro keba se ta-goi ibo nou ro nedi tanaro ro kodiobo modobo pua, mabu neio ro boso katamuai gemaragoidiro-rimo. Paireti iato obo barugu se gerememidai-ro, urubia sirio sosoro gabo ato tu iato giwiouti. Nou ro ibo, 'Nio ro nedi ubauba tanaro ro namadimo-osiodiro-ri, nedi dubu ro nio ro namadimo-opia-ri, mo nio aboto aradabuai-ri pua, nio simara mibo ie.'

²⁵ Taie sirio urubia ina auna se nato giaia-rimo, 'Nimo simara aramio merebusere mutu nimo simara mibo ie nou kopia sapuwo to.'

²⁶ Taie iato Paireti ro Barabasi sabowa to aise gemeiriai. Kaupoti Paireti ro boso koroho urubia iato gimutura Iesu neio ro kerei to epesuti ri ina emopoguti ri ota kemowotowa ato.

Iesu Roma boso koroho urubia ro gemasosowado-rimo

²⁷ Roma boso urubia ro Iesu na-gorobai-rimo gabamani edi moto ato imidirotiti, goto didiri iato ta-gowamo nou neito gowodoro-rimo. Taie neio ro arua boso koroho urubia iato girumai-rimo iedi moro ro neito aradabuti ri.

²⁸ Neio ro Iesu obotama iato gowopurutai-rimo, eputa urubia neio karima obotama beda sosoro wiroidirotiti-mo, nou gowoiti-rimo.

²⁹ Neio ro unuunu kumabo na-gemawiauti-rimo eputa to iato gemamitiai-rimo. Eputa urubia beda sosoro hato iroidirotiti-dumo, nou idaibo sosoro gowati-rimo sete mino to. Ibose eputa urubia ro gonopu beda sosoro irobidirotiti-dumo, neio ro tumodi tu to idaibo sosoro gonopu nou gemowateai-rimo orobidiro ri. Taie neio bagea to iato giroboreauti-rimo nou sosoro gabo ato, iato gemowabu-rimo. Neio ro ibo gemasosowado-rimo, 'Tu eputa dubu, oro tuturu tau to imidirotitiwairi.'

³⁰ Taie nou gase to iato gamoruti-rimo, nou saro gabo ato gonopu iato gowasiri-rimo ina iedi gonopu ro neito eputa to iato gaupokoko-rimo.

³¹ Taie kemasosowado saro gabo ato, karima obotama na-gowopurutai-rimo, simara obotama iato gowoiti-rimo. Taie nou imese gowaguwo-rimo kemopoguti moro to.

Iesu ota kemowotowa ato gemopoguti-rimo

³² Iesu neio ro na-gowaguwo-rimo kemopoguti moro to, ipi gabo ato neio ro ata dubu nato gowea-rimo. Nou Sairini sabowa dubu e masiro Saimoni. Nou neio ro nato gemowapotai-rimo Iesu ota kemowotowa emaratai ri.

³³ Neio ioudo gidiai-rimo womu tato Gorogota podo ohu to ti-gorowateai-rimo. Gorogota podo maumo owamo ibo, urubia dubu eputa soro sosoro ie.

³⁴ Taie Iesu neio ro waini obo iato gomia-rimo. Iedi waini obo ro karakara meresini obo mutu ta-gemeboguouti-rimo, temeteme kemadibiai aboto. Nou ro nedi meresini ro na-gowaibia, iato nou ubi tato aise goi kodio aboto.

³⁵ Nou neio ro aise gemopoguti-rimo, ina nou saro gabo ato, boso koroho urubia nou obotama sapuwo to iato gorio-rimo.

³⁶ Taie neio aise gomititi-rimo, Iesu se gemotoi-rimo. Iesu eputa ohu ato arua titi ota to nou gematiti-rimo.

³⁷ Iedi tau ro nato Iesu etou mabu rido gopia-rimo, nou eputa ohu ato iedi titi ro neio ro giamo ibo, *nou Iesu e Iu urubia eputa dubu e.*

³⁸ Ibose netewa teibo piro dubu teibo Iesu mutu atu se ta-gimopoguti-marimo. Ata tumodi sapuwo ato gororidiro, ata pere sapuwo ato gororidiro.

³⁹ Iesu ota kemowotowa to na-gamototaidiro, nou edi urubia ro gorohudirio-rimo, neio ro nou ubauba oweru to iato gematebuti-rimo. Neio ro na-gemasosowado-rimo eputa se giweisorowado-rimo.

⁴⁰ Neio ro ibo, 'Oro Godi mere ra, a? Oro ibo na-garo Tarena Moto oro ro kototoro ie, ina netewa didi saiki ato oro ro kididi ie. Ma-derebedai-ro ota kemowotowa rido!'

⁴¹ Ibose Godi ra urubia ra turituri awawo urubia, Mose sabi kitamudiro urubia, duriomoro kiauri urubia mutu, nou neio ro ubauba oweru to ibose to gematebuti-rimo.

⁴² Neio ro ibo, 'Nou ro arua urubia iwarebidirotiti, ina abora nou nakara se korowarebai beda ra? Nou Isiraere urubia eputa

dubu e. Nou abora ota kemowotowa rido
merebedai-ro, ina nimo ro nato
anamadimi-imibiria-ri ibo nou Godi ro
kohodowa dubu e.

⁴³ Nou Godi sapuwo to timibiria. Godi ubi koi
ato, ba-mapopo-ro, mabu nou ro ibo garo “Mo
Godi mere ie.” ’

⁴⁴ Ibose iedi piro dubu teibo ro giateidiro-ma
Iesu neitiro ro ubauba owera ta-gomio-rido.

Iesu na-garaburai

⁴⁵ Iedi tau ro nato saiki turi ato gotoi, iedi
duriomoro gebari ro duwo ro aise gahidimai
womu tato adimo saiki ti-gorobai.

⁴⁶ Iedi tau ro nato Iesu ro auna iamo nato
gutura. Nou ro ibo, ‘Eri, Eri, rama sabakatani!’
Nou maumo owamo ibo, ‘Godi, Godi, mabu boira
mo oro ro na-nemauriai-die?’

⁴⁷ Korowotoi urubia ro nedi owera ro
na-girorowai-rimo neio ro ibo, ‘Etu umoro ra,
nou ro Eraia orumai owarebai ri.’

⁴⁸ Taie ata dubu hio ito na-girario-ro, nou ro
obotama karakara waini obo to aise gemodobia,
taie iedi karakara waini obo ro gonopu to
na-gemamitiai, Iesu ro imusubo ri gonopu to
imese gemowioro.

⁴⁹ Kaupoti arua urubia iato na-gorowotoi, neio
ro ibo, ‘Sianu, nou idomari to aise diauri-mo, etu
umoro ra Eraia amadi-ororuwo-ri nou owarebai
ri.’

⁵⁰ Iesu auna ia iamo nato gutura, taie nou iato
aise garaburai.

⁵¹ Tarena Moto ato auna obotama
ta-wororidiroititi, ibi gugu kainai imese tarena ia
ie, iedi obotama ro Godi sosoro nou ro

owasioidirotiti. Iesu pamo na-gowea, nedi obotama ro turi ato aise gerekekeai-rido. Ohu rido garatamuai-ro sopu to aise gororuwo-ro. Ibose iedi duriomoro gebari ro sopu momuruwo ro aise gomuruwouti. Iedi tau ro nato, nadi gebarigebari turi ato aise gararapepe-rimo.

⁵² Ibose pamo urubia edi bobo ato girobu nadi magere aise gorodobuti-rimo, taie sirio tarena urubia etio ro gorowaburo-rimo kebase, neio durupi Godi ro pamo rido aise giwameai-ro.

⁵³ Iesu pamo rido Godi ro edi tau ato gowameai-ro, nou saro gabo ato nedi tarena urubia ro imese godoro-rimo Ierusarema tarena sabowa to, neio sosoro urubia sirio ro iato aise giauri-rimo.

⁵⁴ Iedi sopu momuruwo ro, arua tanaro mutu, boso eputa dubu ro na-giwiia, ibose edi boso urubia ro Iesu na-gemotoi-rimo neio mutu atu se auna tere ro girobai. Taie neio ro ibo, 'Morobise ie nedi dubu ro Godi mere ie!'

⁵⁵ Sirio mamio ibose to ta-gou-rimo, iedi tanaro ro na-gororosioidiro-rimo, neio ro muso rido neido giauri-rimo. Nedi mamio ro Iesu neio ro gobodoro-rimo Gariri duriomoro rido nou kowarebai sapuwo to.

⁵⁶ Nedi mamio ro neio aboudo arua neibi ie, Maria nou Magadara sabowa orobo ie, ata Maria Iemisi ra Iosepa ra nou neitiro mamu e, ibose Sebedi edi mere teibo ro neitiro edi mamu ro, nedi orobo Peteibi ro nedi mamio sirio ro neio mutu atu se ibo gou-rimo Iesu owarebai ri.

Iesu pamo durupi nadi bobo to gibiria-rimo

⁵⁷ Adimo na-gereredea-ro, ata suana sirio dubu masiro Iosepa nou Aramatea sabowa dubu e, nou Iesu kowasoro dubu to ta-gararapoi,

⁵⁸ nou imese gou-ro Paireti aboto. Nou ro nato gararatoro Iesu pamo durupi nou ro ebedai ri ota kemowotowa rido. Taie Paireti ro boso koroho urubia iato gimutura Iesu pamo durupi ota kemowotowa rido owororuo ri ina Iosepa aboto aiwai ri.

⁵⁹ Taie Iosepa ro Iesu pamo durupi marea tato obotama to iato goupiriamuti.

⁶⁰ Nou simara nadi bobo keba se ta-gosioihiro orio na ie, Iesu pamo durupi ito gibiria. Taie nou ro auna nadi magere mea se na-gopai, iedi moro ro aise gemeserai.

⁶¹ Iesu bobo ata sapuwo ato netewa teibo orobo teibo iato gomidiro-rido, neitiro ro Iosepa ioudo giauri-rido. Nedi orobo teibo ro neitiro ie, Maria Magadara sabowa orobo ie, ina ata Maria neitiro ibo ie.

Paireti ro gimeiriai kemotoi urubia Iesu bobo emotoi ri

⁶² Ata kowaroho Iu urubia komidiro saiki ato, Godi ra urubia ra turi awawo urubia Parasi urubia mutu Paireti aboto nato gou-rimo.

⁶³ Neio ro ibo, 'Auna dubu, nimo ro ti-nemaragoidiro-dumo iedi karasaubuti dubu ro Iesu, nou keremiro ato idaibo owera nou iarotiti. "Netewa didi saiki nama-orobai-ri, mo ina keremiro to anamadi-orowameai-ri."

⁶⁴ Oro emodowa ri nou-dioumo ibo modobo ra oro ro kemotoi urubia kimeiriai Iesu bobo neio ro emotoi ri womu tato netewa didi saiki namabimo-oroporeai-ri? Kemotoi urubia oro ro

kimeiriai tato, kowasoro urubia amadimo-ou-ri, Iesu pamo durupi neio ro amadimo-owopirowa-ri. Urubia neio ro ibo amadimi-imowauti-ri Iesu pamo rido Godi ro ta-gowameai-die. Tanaro idaibo sosoro namadimo-ororosioidiro-ri, abora nedi karasaubuti oweri ro auna ama-oi-ri, keba karasaubuti oweri nou ro ama-emasaudai-ri.'

⁶⁵ Paireti ro neio ibo gimowameai, 'Modobo ie kemotoi urubia ba-dirobai-mo! Nio simara umoro to neio mea se ba-diwtoburio-mo!'

⁶⁶ Taie turituri awawo urubia, Parasi urubia mutu, neio ro kemotoi urubia imese giwou-rimo Iesu bobo to. Taie, nedi awawo urubia ro nadi magere ato isabuna neio ro iato giedea-rimo, ibose neio ro kemotoi urubia iato giwtoburio-rimo, modobo pua arua urubia piro se kodoro.

28

Iesu pamo rido na-gowameai-ro

¹ Iu urubia komidiro saiki na-gororoporeai, ina ata saiki Sande kowaroho duwoduwo ato, Maria Magadara sabowa orobo ie, ata Maria mutu Iesu bobo emowea ri imese gedei-rido.

² Pua ie! Auna soku momuruwo nato goromuruai. Mabu nedi tau ro nato Abera Naramu edi sowake urio ro nou aboudo gororuwo-ro, nou Iesu bobo to aise gemobodiai, nadi magere na-godobura iato aise gomi.

³ Nou sosoro woidomari imese penenio sosoro gerememiuti. Ibose nou edi obotama giroidiro ipakea musuga sosoro imese keakea ia ie.

⁴ Iesu bobo edi boso urubia ro gemotoi-rimo, neio ro na-giwia-rimo nedi tanaro ro, neio soro aise gorowamaro-rimo tere ri, iato sapuwo pamo imese girobu.

⁵ Sowake urio ro ibo nedi orobo teibo ro neitiro aboto, 'Nitiro tere na ie! Mo umoro ta-noi ibo nitiro etou mabu ato oudio-do neito. Nitiro idaibo Iesu osora-dioudo, ota kemowotowa ato na-gemopoguti-dumo.

⁶ Nou bobo ato pоторо ie, Godi ro ta-owoubua. Nou kowoubua owera nio aboto ta-irowautititi. Nou edi moro ato gowotodai-dumo tauo nitiro ro simara idomari to ma-dowea-rido.

⁷ Nitiro abora neido aise dorowameai-do kowasoro urubia ba-dimowapotai-do ibo, "Nou pamo rido Godi ro ta-owameai-ro. Nou Gariri duriomoro to keba moro to ta-waimai, nio ro saro rido ba-dowasoro-mo. Nou nio ro iato amadimo-owea-ri." Owera nouse ie, nitiro umoro noti niwai-ma.'

⁸ Taie iedi orobo teibo ro bobo rido neido hio ito imese gorowarario-rido. Neitiro sapuwo tere ro giwati-ma, kaupoti neitiro abato auna kamade ro gowamo. Neitiro edi korowarario na-gorowarario-rido kowasoro urubia owera imowauti ri,

⁹ ipi ato Iesu ia ro aise giwotobowa-ma. Nou ro ibo, 'Mea kowaroho ie nitiro aboto.'

Neitiro Iesu aboto na-gosiomai-rido nou sairo mabu ato aise gohiai-rido, taie iato gemowabu-rido.

¹⁰ Iesu ro ibo, 'Nitiro tere na ie, mo edi urubia ro nowasoro-dumo io neio mo niramio ie, ba-dou-do neio imowapotai ri ibo neio Gariri

duriomoro to ba-mou-mo. Mo neio ro iato anamadimo-owea-ri.'

Iesu bobo kemotoi urubia ro gorowauti-rimo owerera

¹¹ Iedi orobo teibo ro neitiro isana ipi gabo ato gou-rido kowasoro urubia owerera imowapotai ri. Kaupoti arua bobo kemotoi urubia kebase gorowarario-rimo auna sabowa to. Bobo abato beda tanaro ro gororosioidi-ro-rimo Godi ra urubia ra turituri awawo urubia neio iato gimowauti-rimo.

¹² Taie turituri awawo urubia, neio duriomoro kiauri urubia mutu, owerera iato geremowauti-rimo, neio ro iato gimediai-rimo karasaubuti owerera aro ri. Awawo urubia ro bobo kemotoi urubia auna mani to giahodorai-rimo, bagea karasaubuti owerera aro rie Iesu sapuwo to.

¹³ Neio ro ibo, 'Urubia nio ro ibo ba-dimowauti-mo, "Nimo isana norou ro niwagumaidiro, nou kowasoro urubia duwo turi ato na-wou-dioumo Iesu pamo durupi neio ro nato owopirowa-dumo."

¹⁴ Nedi owerera ro gabamani auna dubu ro nama-irorowai-ri, nou nimo ro kamade neito anamadimo-owai-ri. Nio owerera ro irobai-ri pua.'

¹⁵ Taie iedi boso urubia ro iedi isarena mani gebari ro na-gomidai-rimo, taie neio kitomuidiro modobo bagea owerera urubia iato gimowauti-rimo. Iedi tau ro noudo, idaibo karasaubuti owerera Iesu pamo durupi simara kowasoro urubia ro piro to kowosuruwo owerera, Iu urubia abato nou ro gorobodorouti. Abora

nedi atu karasaubuti oweru ro neio abato nou ro owamotiti.

Iesu ia ro gimeriai kowasoro urubia nou bobo ato

¹⁶ Taie edi 11 kowasoro urubia ro Iesu oweru gabo modobo edi podo ro gimapoi Gariri ato na-wotoi neito imese gidiai-rimo.

¹⁷ Iesu sosoro neio ro na-gowea-rimo, nou iato gemowabu-rimo, kaupoti arua kowasoro urubia kimaragoidiro teibo giworohuti-marimo.

¹⁸ Taie Iesu neio aboto aise gosiomai-ro, nou ro nedu oweru ro neito gimowapotai, 'Imese pupuwo korosa Godi ro ta-nomia-ro, Adiri sabowa kiauri aboto ibose sopo duriomoro kiauri aboto.

¹⁹ Ina noudo ie nio mo ro a-nimowapotai, ba-dororoburutai-mo erere duriomoro to, urubia sirio mo kowasoro urubia to ba-diwesegere-mo. Obo to ba-diwarumiauti-mo Abera, Mere, Tarena Urilo neibi do to ba-mararasoro-mo.

²⁰ Nio mo ro edi oweru to nimowautiti, neio ba-ditamudiro-mo isioidiro ri. Dirorowai-mo! Mo nio mutu anama-imidirotiti-ri womu tato womu tau nama-orobai-ri.'

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4